

BRIEF TRAICTE'
DE LA
PHARMACIE
PROVINCIALE
ET FAMILIERE:

Suiuant laquelle la Medecine peut estre faicte
des remedes qui se treuuent en chaque
prouince, sans qu'on soit contrainct
les aller mandier ailleurs.

*Dressé & faict vulgaire par M. ANTOINE
CONSTANTIN, D. en Medecine
à Aix en Prouence.*



30461

A LYON,
PAR THIBAUD ANCELIN,
IMPRIMEUR DV ROY,
M. D. XCVII.



UNITED STATES

OFFICE OF THE SECRETARY OF THE ARMY

WASHINGTON, D. C.

1917

Approved for publication by the War Department, Washington, D. C., 1917.

Copyright, 1917, by the War Department, Washington, D. C.



1917

PRINTED BY THE WAR DEPARTMENT, WASHINGTON, D. C.



A MES SEIGNEURS

DE LA COVR DE PARLE-
ment de Prouence.



Es Seigneurs c'est l'ordinaire des hommes qui font profession des lettres, principalement de ceux qui recelent beaucoup plus à l'interieur qu'ils n'en portent au front, d'estre long temps suffoquez & cōme enseuelis parmi les tenebres des plebees, si quelque grand personnage ne les souleue & leur soustienne le menton. C'est quasi aussi l'ordinaire entre ceux qui courent en mesme lice, de mesdire & detracter des labeurs & actiōs d'autrui. Et c'est pour autāt qu'un chascun desirant sa renommee nager au dessus & gagner le haut, tasche par tous moyens mettre à fons & enseuelir la memoire non seulement de ses contemporains, mais voire mesme de ses antecesseurs. Peu s'en est falu que ceste enuie ne

nous aye priuez des œuvres du diuin Platon, les
idees duquel le mirent à la malegrace d'Aristo-
te ayant alors le vent en poupe & poussé de la
faveur du grand Alexandre. Ce vice a faict que
nostre medecine a perdu les escrits d'un Hero-
phile, d'un Crisippe, d'un Diocle, d'un Prodi-
que, d'un Praxagore, d'un Erasistrate, d'un
Themisso, d'un Thessale & d'une infinité d'au-
tres qui sans doute l'eussent de beaucoup illu-
stree & augmentee. Les liures de nostre Hippo-
crate pleins de saine doctrine, eussent passé le
mesme hazard, ne fust qu'ils tumberent entre les
mains de Galen, qui soustenu lors des Empereurs
Romains, contendoit la primauté contre ceux de
son temps, en interpretant & dilatant l'anciēne
& obscure doctrine de son Hippocrate. Si donc
les detractions ont eu tant de pouuoir sur les
œuvres de tant & tant de renommez persona-
nages, que doibs-je esperer de ce petit surgeon,
sinon de le voir assailli par les morsures empe-
stees de plusieurs mesdisans, plus addōnez à de-
tracter du labeur d'autrui, que diligens & cu-
rieux de mieux faire. Ce m'est tout un, mes Sei-
gneurs, pourueu que la gloire de Dieu & utilité
publique (lesquelles ie me suis seulement propo-
sees) soyent à iceluy cōiointes, & qu'il vous plai-
se de fauoriser ce tresriche, tresiuste & trespui-
table

table dessein. Ce que à bon droit ie m'estois promis long temps deuant l'entreprise, m'assurant que tels mesdisans & mal affectionnez aux la-beurs d'autrui, considerans les merites & grandeurs de vostre tres-auguste compagnie, pleine d'humanite, de doctrine, de prudence, de pieté, de foy & de religion tout ensemble : seront contraincts poser les armes & caler les voiles, le voyet esclous sous la protection & sauuegarde, de ce tres-illustre & royal senat. Prenez donc, mes Seigneurs, en gré, ie vous supplie tres-humblement, ce qui vous est offert de la part de celuy qui vous reueré, vous honore, vous admire, & qui vous souhaite à tous le comble de toute felicité.

Vostre à iamais tres-humble
& tres-obeissant seruiteur,

A. CONSTANTIN



ADVERTISSEMENT *au Lecteur.*

NE pense pas, ami lecteur, cōbien que ce traicté semble s'adresser seulement aux Prouëçaux, qu'il ne soit aussi basti pour toutes les prouinces de la France, & ne se puisse encores estendre plus loing. L'auteur l'a fait vulgaire & dedié à son pays pour le desir qu'il a de profiter à sa republique, & à ceux parmi lesquels il exerce la medecine, & encores pour inciter les autres de sa profession de faire le semblable chacun en son pays, estimant que les principes & axiomes fondemens de la medecine (desquels il ne se despart aucunement) peuuent aussi bien estre verifiez par l'vsage & application des remedes domestiques & prins de nostre creu, que par ceux qu'on va mandier ailleurs parmi les estrangers.



SVR LA PHARMACIE

PROVINCIALE ET FAMILI-

liere de M. Antoine Constantin, D. en Medecine.

SONNET.

*Amoureux Apollon, ta suppliante voix
Finiſſoit en ces mots, ie te ſacre les plantes,
Lors qu'à ieunes rameaux, tu vis changer les plâſes
Qui verdiſſent ton front, ta lyre, & ton carquoix.
Ton cher fils, Apollon ſubit pareilles loix,
Conſtantin eſt eſpris de nos ames fuyantes,
Embaſme de neſtar leurs eſcorces mourantes,
Les transforme, & iouyt de leur eſtre François.
Je crains, qu'un Dieu ialoux ne retranche ſon âge,
Sa main prime Caron de l'importun naulage,
Eaque aux chāps herbeux n'attent plus le mortel.
Je ne deſire pas qu'il devienne Epidaure,
Mais vieillard qu'il deſloge, ainſi que le Centaure,
A qui, meſmes les Dieux redreſſent un autel.*

DE-GALLAVP.

AVTRE SONNET SVR
le mesme fujer.

*Dites nous Indiens qui vous rend estonnez,
Quelle est vostre douleur? Quoy vos drogues moïsies
Ainsi qu' auparauant ne seront plus choisies,
Ny vos fruits abuseurs dans nos haures trainez?
Dites nous Indiens vous qui nous martinez
Quelle, quelle fureur tient vos ames saisies,
Qui lasche à vos esprits ces folles phrenesies
Qui de mille malheurs vous tiennent encheuez?
Je le sçay, vous n' auez earessé la vieillesse
Du cher fils d' Apollon, qui despitte vous laisse
Pour se rendre aussi tost nostre amé iardinier.
Il domestique à tous les cayers de ce liure
Qui resserroit l'esprit du simple familier,
Du simple qui sans fin nos corps fera reuiure.*

N. Perrin Aduocat en Parlement.

Autre Sonnet sur l'anagramme de
l'auteur, par le mesme.

*Hippocrate nous rend par mille & mille escrits
De son diuin sauoir vn diuin tesmeignage,
Et pource son renom florira d' aage en aage,
Hommage sanctement des plus doctes esprits.
Le fils de Coronide à doctement appris
Soubs le docte Chiron, & cest apprentisage
Comm' il le fit chenu, il le rendit si sage
Qu' il raut à son maistre & la gloire & le pris.*

*Le Pergame diuin chasse-mal de l'Asie,
Presque de tous ces deux rend la gloire moisie,
Qu'c'est aussi soy-mesme en son art surmonie.
Nul d'eux eut ioutesfois l'autorité si grande,
Que nostre Constantin, que des lors qu'il commande
Aux malades il donne incontinent santé.*

Autre Sonnet sur ladite Pharmacie.

*Fidelles gardiens du recours de la vie,
Sacres-saincts heritiers de l'Epidaurien,
N'alez plus outre mer rechercher nostre bien,
Ny relisez plus tant les secrets d'Arabie.
Ce liure seul pourra contenter vostre enuie
Sans relire sans fin le diuin Galien,
Et fournira pour vous & au Pharmacien
Le rheubarbe & la casse en vostre champ sortie.
Cacochimes François vous en estes aussi,
Et vous ô Prouençaux lisez ce liure icy,
Car sur tout c'est pour vous qu'il est mis en lumière.
Ce Constantin sans coust autre que son travail
Vous redonne santé par vostre propre esmail,
Et retrenche le cours de l'onde mariniere.*

B. BERNARDI Aduocat au
Parlement de Prouence.

Nec flamma nec ferro.



IN LIBRVM D. CONSTANTINI
*Doct̃oris Med. Aquensis de abro-
gandis exoteris medicam,*

CARMEN.

HYppocratis quodã deuicta potētibus armis
Mors penē inuictum cesserat imperium,
Sæpē suo doluit frustratam pondere cymbam
Terribili stygias, qui rate sulcat aquas:
Et penitus nullis accrescere manibus vmbra
Defleſſet cui fors tertia regna dedit,
Si non sparsa forent totum quærenda per orbem
Pharmaca, quæ nostræ iura salutis habent:
Ast dum serus Arabs lacrymas, absynthia Pōtus,
India dat nardum ferius ipsa suum,
Dum reliquæ gentes medicos spoliantur in vsus,
Venit & è longis herba perita plagis:
Copia sera datur Medico post fata medendi,
Materia gnaras destituentē manus:
Et pretium auctæ longinquo è limite mercis
Diuitibus æquē est, pauperibusque graue:
Morsq; vetus reparat toto conamine regnum,
Insurgitq; nouis imperiosa minis:
Heu quoties cecidit letho detrusus ad orcum
Implorans vanis quæstibus æger opem;
Qui nunc spectaret iucundum lumen & auras
Cerneret & sobolis tempora longa suæ:
Si non vana fides medicos lusisset inertes,
Pharmaca è longinquis esse petenda locis:
Omnibus

Omnibus haud terris nasci foeliciter herbas
Omnes, quæis nostra est restituenda salus.
Hactenus at stultas error caligine mentes
Luserit hic mortis tristia regna iuuans.
Non ita delusus posthac nece concidet orbis:
Est cum morte liber, qui noua bella gerat.
Ille tuus liber est ô Constantine furenti
Qui sæuæ iniiciet fortia vincla neci:
Ille inquam liber est, qui fert noua lumina mûdo,
Atq; vetustatis nubila cæca fugat:
Qui docet, antiqui, quod non videre parentes,
Non videre, suis nec docuere libris.
Namq; probat cûctas producere germina terras,
Quæ possint Medicis vsibus esse satis:
Maxima tutanda pandit compendia vitæ,
Et breuius monstrat nosce salutis iter:
Imminuit sumptus, vitæ communia iura
Seruandæ diti pauperibûsq; facit:
Intentas auido quærendis remige succis
Frustra, mille rates in statione tenet,
Quas fera tempestas alio merfisset in orbe
Longius à patria, pignoribûsq; suis.
Inuidus ergo tibi tenebris quid condis opacis
Tantum opus, & nihili publica damna facis?
Dignus luce frui liber est vitaq; perenni
Quo noua lux mundo, vitâq; longa datur.

Tuus discipulus,

LYDOVICVS TILIANVS.



P R E F A C E.

DANS tous les arts & sciences qui sont eslongnees du deshonneſte & ſordide gain, la medecine ſemble ſeulement ſe pouvoir glorifier d'avoir la certitude & ſtabilite immuable : car eſtant dependante de la philoſophie naturelle, elle contemple, admire & lit comme dans un tableau au theatre de la nature la maieſte, la puiſſance, la bonie & la ſapience de Dieu createur de toutes choſes. La nature ſeul appui de la medecine eſt à bon droit eſtimee l'idee & le miroir de tous les arts, inuentions & industries humaines, de laquelle celles qui ſe deſpartent & s'eſloignent tant ſoit peu, ne peuvent aucunement avoir ceſte certitude : & c'eſt pourquoy on la proclame la moderatrice & la regle de tous les arts pour la vulgaire propoſition, ars imitatur Naturam. Et combien que cela ſoit en general de tous les arts, ſi eſt-ce que ceſte imitation ſe void plus clairement & plus parfaitement obſervee en la medecine, qu'en aucun autre : Car en quoy ſauroit on mieux contrefaire les oeuvres de Nature, qu'en reſtituant la ſante à l'homme chef d'oeuvre de la Nature ; & le rendre, en tant que faire ſe peut, en telle integrite que naturellement il avoit eſte compoſe. Les loix quoy qu'elles ſemblent avoir ce fondement, ſi n'ont elles pas telle ſtabilite, d'autant qu'elles ſont la plus part dependantes
des

des volontez humaines, qui sont pleines d'inconstances
& mutabilitiez. L'art militaire n'a pas cest obiet non
plus que l'industrie & inuention de mistionner les ve-
nins, d'autant qu'elles tendent à deffaire les hommes &
ruiner leur naturelle structure, plustost qu'à les conseruer
& restituer en Nature. Ceste certitude des choses natu-
relles est tresgrande aux corps celestes, car en leurs cours
& mouuemens nous obseruons vn merueilleux ordre,
aux reuolutions des années, des mois, des iours, des heu-
res & moments. Tesmoins de ceste stabilité immuable
sont aussi les elemens, les saisons, la propagation des
plantes, la production des fruits, la generation des ani-
maux. Bref tous les effects qui reüssissent de la Nature
par ceste tres-feconde voix de son auteur, Producat
terra herbam virentem, crescite & multiplicami-
ni & replete terram, demonstrent que toutes choses
se font en Nature avec ordre, pois & mesure. Nous
donc ne faillirons en rien si estans appuyez sur ceste fru-
etisante & vniuerselle voix, à l'imitation de Nature,
nous empolyons & mettons en usage, pour la restaura-
tion de la santé, les remedes qu'elle a produit, & quasi
en vn mesme lieu & en vne mesme ventree engendrez
avec les malades. A cecy ont visé ceux qui ont ietté les
premiers fondemens de nostre medecine, laquelle ils ont
asseuree sur des propositions vniuerselles & inexpugna-
bles, la verité & certitude desquelles a esté comme es-
clarcie & approuuee par les applications des facultez
agissantes aux passives, des matieres les plus prochai-
nes, plus domestiques & plus familières qu'ils pouuoient
promptement choisir. De cecy sont tesmoins tres-suffi-
sans les escrits des Grecs & Arabes medecins anciens,
desquels de main en main la medecine est venue ius-
ques

ques à nous, & si bien conseruee en son entier, que tout ainsi que par nous rien n'a esté adionsté, diminué, ny changé de ce qu'appartient aux propositions fondamentales: aussi sommes nous si exactes obseruateurs de leurs ordonnances, que nous n'estimons point ceux la faire bien la pratique qui ne les suivent de point en point, & n'y emploient leurs receptes. Et combien que nous ayons retenu des anciens Grecs quelques medicamens, comme la theriaque d'Andromach, l'emplastre phenicinum & la hiera de Galen &c. Si est ce que les Arabes & leurs fauteurs, en ce qui appartient aux medicamens, ont si bien gagné le dessus que nous voyons encores auourd'huy le mesme Galen, Aëce, Oribase, Trallan, Paul Aeginette estre postposéz à Auicëne, à Rbasis, à Aliabas, à Auenzoar, à Mesué, à Albuerase: de sorte que leurs drogues sont si bien employees presque par toute la Chrestieneté qu'elles semblent auoir esté faictes plus pour nous que pour eux, tout ainsi que lesdits auteurs semblent plustost auoir escrit & experimenté leurs simples pour les estrangers, que pour ceux de leur nation. Il est certain que si tels rares personages & exactes inquireurs des secrets de Nature tât Grecs que Latins eussent escrit & fait la medecine aux provinces de la France, qu'ils n'eussent employé ny prescript autres medicamens que ceux qui se peuuent trouuer en France. Ceste consideration couuee des long temps en mon estomach, m'a fait en fin ietter aux champs, & mettre la main à ce labeur, lequel alors me sembla de si peu de merite, que ie n'eusse osé le mettre en lumiere, n'eust esté que plusieurs de mes amis ont gagné ce poinct sur moy, me remonstrans que le public pourroit auoir interest à telles defiances. A cela m'a incité aussi beaucoup l'esperoir que

i ay que ce suiet qui n'a esté encores exactement touché, sera plus diligemment manié & mené à perfection (de laquelle il est tres-capable) par quelque autre amateur de sa republique , & plus docte & mieux versé en ces choses que ie ne suis. Celuy qui sans passion voudra estre inge de ce fait, estimera que ie suis bien fondé, & que ma cause est fauorable, d'autant que les escrits de ceux cōtre lesquels ie plaide m'ont fourni de pieces & defences.



TABLE DES CHAPITRES

contenus aux trois Liures de la premiere
partie de la Pharmacie
Prouinciale.

L I V R E. I.	
Ch. 1.	Qu'en chascque prouin- ce la Medecine peut & doit estre faicte des remedes qui y sōt nour- ris, & que lon n'a au- cune necessité de les aller chercher ailleurs. page 1
II.	Que la Prouence est fournie de tous les sim- ples necessaires pour la guarison des maladies qui peuuent aduenir. 12
III.	Qu'en ce país peuuent estre treuuez plusieurs medicamens propres pour purger toutes les humeurs. 21
IIII.	Que nous pouuons fai- re la medecine sans le succe. 27
V.	De la preparation des medicamens, desquels est faicte mention cy apres. 34
VI.	Du cocōbre sauuage. 40
VII.	De la catapuce. 45
VIII.	Du tithymale. 50
IX.	De la thymelea & chamelea. 54
X.	De l'ellobore. 58
XI.	Du turbith. 64
XII.	De la flamme ou gla- yeul. 68
XIII.	Du sureau, & hieble. 71
XIIII.	De la brionia ou colu- utree. 73
	XV.

XV.	De la laureole.	77
XVI.	Du pied de veau.	79
XVII.	De la geneste.	82
XVIII.	De l'aristolochie.	86
XIX.	De l'oignon marin.	88
XX.	Du chou marin.	91

LIVRE II.

DES MEDICAMENS qui purgent sans faire aucune violence ou bien peu au corps humain.

I.	De la diuision des medicamens en quelques especes & differences.	95
II.	De la frangula.	98
III.	Des roses.	102
IIII.	Des violettes de Mars.	109
V.	De l'epithyme ou goutte duthym.	112
VI.	De l'absinthe.	115
VII.	De la fumeterre.	117
VIII.	De la mercuriale.	120
IX.	Des clochettes.	122
X.	Du carthame ou saffra bastard.	124
XI.	Du polipode.	127
XII.	De l'agarc.	130
XIII.	Du cabaret ou asaron.	133

LIVRE III.

DES MEDICAMENS, qui outre ce que ils purgent le corps, ont aussi quelque pouuoir de le nourrir.

I.	De la diuision des alimens.	136
II.	Du pain.	140
III.	Des lentilles.	145
IIII.	Du fenugrec.	150
V.	De la manne.	152
VI.	Du petit lait, autrement appelle la mesgue.	157
VII.	Du ius du coq enuieilli.	162
VIII.	Des prunes.	167
IX.	Des figues.	171
X.	Des raisins.	174
XI.	Des cerises & meures.	179
XII.	Des melons & cocombres.	184
XIII.	Des oignons domestiques.	187
XIIII.	Des bettes.	190
XV.	Des arroches & blettes.	193
XVI.	Des espinars.	196
XVII.	Des chous.	198



PREMIERE PARTIE DE LA PHARMACIE PROVENÇALE.

Qu'en chasque Prouince la Medecine peut & doit estre faiçte des remedes qu'y sont nourris, & que nous n'auons aucune neceſſité de les aller chercher ailleurs.

CHAPITRE I.

LA Medecine , eſtant le plus grand & plus ſigné benéſice (après celuy de la creation & redemption) que Dieu ait eſlargi aux humains , a ſes facultez tant riches & abondantes , que elles s'eſtendent par tout l'vniuers , profondent les entrailles de la terre. fendent les abifmes des eaux, & montent par deſſus les nuees. Si que par tout, touſiours , & de tout ce que le monde eſt orné & rempli, elle treuve dequoy entretenir & reſtaurer la ſanté des hommes , qui eſt le principal but auquel ſon auteur l'a eſtablie. Auffi eſtoit-il très-conuenable à la grandeur d'un tel

ourrier, & de la chose meſme, que l'ayant ordonnee pour la neceſſité : & à icelle (ou pour eſtre recogneu des hommes, ou bien pour les faire entrer en la cognoiſſance d'eux meſmes) les ayant tous ſoubmis, leur fuſt donné en tous lieux le moyen de s'en ſecourir & ſoulager. Ainſi que leur ayant attiſé vn feu continuellement deſtruifent l'huile radical de leur vie, & reueſtus d'vne molleſſe offenſable, tant par les rigoureuses qualitez de l'air, que par vne infinité d'autres ineuitables externes iniures, ne leur reſuſe en aucun endroit les alimēts pour reparer, tant qu'il eſt poſſible, la perte dudit humeur radical, ny les matieres & engins pour abatre leſdites iniures.

Nous ſeuls en ces contrees, entre tous les miniſtres d'vne choſe ſi ſaincte, auons voulu (non ſans lamentable perte de pluſieurs, tresgrand intereſt de la choſe publique, & grieue offenſe enuers les dieux) auons, di-je, voulu arceſter l'immenſité de ceſte largeſſe, & relegué le pouuoir de ſes plus beaux & rares effets, aux plus eſloignees prouinces, & reputé les noſtres deſnuces, veſues & ſteriles. Dequoy ſommes autant iuſtemēt moquez & blaſmez de ceux qui peuuent tant ſoit peu exactement iuger des choſes, comme les autres qui ont l'adminiſtration de la republique, ſemblēt vituperables, ne nous en auoir (ainſi que iadis les Romains par moindre occaſion) exilez & bannis, quoy que ne ſoit pas vray que les Medecins ſoyent eſté challez de Rome. Car outre le blaſpheme qui eſt directement prononcé contre le Tout puiffant, c'eſt l'eſtimer imprudent,

imprudent, & plus foucieux des animaux irraisonnables, (aufquels, & iufques aux plus contemptibles, il a baillé par tout les remedes neceffaires & oportuns) que des hommes, pour l'utilité & fervice defquels, non feulement iceux, mais encores la terre, le ciel, & iufques aux Anges ont esté créés. Outre dif-je, qu'il eft absurde de penfer que le fouuerain medecin, (luy qui par fa mifericorde accouftumee nous afflige de maladies corporelles, pour nous rendre foigneux de la guarifon de nos ames languiffantes, par les péchez que nous commettons contre fa majefté, & de recourir aux medecins comme difpenfateurs de tant de beaux & bons remedes, que la nature, laquelle Platon appelle *diuinitatis instrumentum*, produit) foit fi illiberal, qu'estans les hommes pecheurs, & par confequent fubiefts à beaucoup d'infirmitez, il ne leur baille en tous lieux lefdits remedes. Et qu'il vueille eftre fi mal representé par les chofes naturelles, lefquelles (comme dict le mefme Platon) feruent de portraits & exéplaires aux effets de la diuinité. In Tymao.

Nous fommes affeurez par l'expres témoignage de l'efcripture faincte, que la medecine a esté faicte indifferemmét pour tous, & qu'à ceste raifon la terre a esté benie: affin qu'estant rendue frœcôde par telle benediction, elle nous produife à tous, & en tous endroits les medicamens neceffaires. L'Ecclefiafte môstre affés clairement, que les medicamens viennent à fuffifance en toutes contrees, quand il dict que d'iceux les hommes fages fe feruiront, & fecourrôt en leurs Ecclefiaft. chap. 38.

necessitez. Autrement puis qu'il n'y a que les riches qui puissent fournir aux frais, & recouurer les drogues de si loing apportees, ceux qui n'ont dequoy les acheter, ne pourroyét, (ô grande absurdité) estre appellez prudents. Dauantage cela peut estre plus clairement verifié, en ce que nostre Seigneur n'a faict que bien peu de choses pour la nourriture des hommes : & toutesfois il n'y a rien de créé par son infinie puissance en cest vniuers, depuis la region eleménaire iusques au centre de la terre, qui ne puisse seruir à la medecine pour la guarison de nos infirmitéz & pour la conseruation de nostre santé. Tellement que non seulement toutes autres choses, tant animees que inanimees, mais aussi les hommes mesmes, c'est à dire leur chair & graisse, est encores aux hommes medecinale. Et qui plus est les excremens & superfluitez du mesme homme, ou de quelque membre d'iceluy, peuuent estre employez pour la guarison du corps & des membres du mesme homme.

C'est merueille que nous qui faisons profession d'espellucher, contempler & admirer de plus pres les effectz de la nature, ayons tant voulu retrancher de sa gloire : veu qu'au contraire (& sans sortir de ce subiect) nous la voyons iusques là soigneuse, que de produire copieusement en chasque region les remedes des maladies auxquelles les hommes sont plus particulièrement subiects : voire aux maux qui seroyent le plus souuét incurables, sans prompt secours (comme sont les picqueures & morsures des bestes venimeuses,

meufes, ferpens, fcorpions, chiens enragez) nous donner noſtre propre & prompte ſaliue, noſtre vrine, & les meſmes animaux ou parties d'iceux, pour y eſtre medicablement applicquez.

C'eſt encores plus eſmerueillable, que nous nous eſtimions indigents de remedes, depuis que les ruſtiques & les ſimples femmelettes en preſchét & en cognoiſſent la terre par tout tref-abondante: & que pis eſt, de ne nous en ſervir, puis qu'eux ordinairement & en toutes leurs infirmitéz (combien que non ſans peril, à faute de les ſçauoir preparer) s'en ſervent & mediquent.

Les Medecins qui nous ont deuancé, qui avec gloire ont faiët la medecine, & deſquels nous nous honorós d'eſtre diëtſ diſciples, n'ont deſdaigné les remedes que leurs terres produiſoyët, ni paſſé leurs confins, pour en preferer d'autres, à ceux qui croiſſoyët en leurs contrees. Tellement qu'en leurs admirables & trefrenommees cures, ils ont pluſtoſt employé les leurs que les eſtrangers remedes.

Noſtre Dieu meſme en la compoſitió de l'on- *Exod. cha.*
guent tant precieux & aromatique, (duquel il ^{30.}
vouloit que le grád Pontife fuſt oingt) mit-il en
peine Moyſe d'aller chercher aux terres loing-
taines & eſtranges les ingrediens, ou s'il ne ſe
contenta de la cacia, de la mirrhe, & du cina-
mome, qui ſont drogues qui ſe treuent ſur le
lieu?

Moyſe pour chaſſer l'amertume des eaux & *Exod. cha.*
les rendre potables, manda-il ſes droguiſtes aux ^{15.}
Antipodes (comme nous faiſons à tout propos).

plustost que d'experimenter la vertu de l'arbre voisin du fleuve?

Lin. 4. des Elisee, mundifia-il les eaux de Iericho avec
Rois ch. 2. autre drogue, qu'avec celle qui est en chasque maison vsuelle & familiere, assauoir avec le sel?

Chap. 11. Thobie le ieune pour curer la cecité de son pere, de quel collyre, ou de quelles autres drogues vsa-il en ceste operatió, que du fiel du poisson, qu'il pescha dans le fleuve voisin?

Lin. 4. des Esaye ne fit-il pas la cure admirable, d'ame-
Rois ch. 20. ner à cicatrifation l'vlcere maligne du Roy Escchias, avec le cataplasme, faiët des seules figues?

Chap. 14. Daniel pour empoisonner le Dragon pestrit-il ses pilules, qu'avec choses viles, & aíses à recouurer, qui sont la poys, la graisse, & le poil?

Toutes lesquelles operations, & plusieurs autres mentionnees en la sainte escripture, pourroyent estre estimees du tout miraculeuses, si quand au bois, l'escripture n'adioustoit, *A ligno indurcata est aqua*, si la vertu du sel n'estoit à tous manifeste, la propriété du fiel du poisson appelé Collionyme ou Hiene, la puissance des figues seches, la force des ingrediens aux dites pilules.

Salomon lequel, selon le tesmoignage de la sacree escripture, n'a rien ignoré de la propriété & vertu des choses medecinales, depuis le cedre iusques à l'hyssope, quels remedes pour l'entretenement de la santé a il ordonnez, que les plus familiers qu'on scauroit excogiter, qui sont la diete, l'abstinence & le vomissement, lors que la repletion est onereuse?

Les Arabes lesquels le plus souuent nous imi-
 tons

tons en practiquant, & fuiuant leur dispensaires, noz boutiques pharmatiennes sont dressees) nous monstrent à l'œil, s'il nous faut sortir hors de noz terres, pour exercer nostre art de medecine. Car ores qu'ils soyent les plus copieux entre tous les practiciens, si n'vsurpent-ils autres simples en leurs receptes, ny bastissent leurs grands dispensaires d'autres drogues, que de celles de leur propre país.

Galen nostre palæmon, n'a iamais faict autrement, i'aoit qu'en plusieurs lieux entre ses œures, il fasse mention de beaucoup de simples, qu'il n'auoit pas en main: voulant par cela monstrier, que le Medecin doit estre disposé à practiquer, en toutes parts où il se pourroit treuuer, des medicamens qui se presentent. Car lors qu'il a mis la main à l'œuure, ses escrits tesmoignent, qu'il n'a vsurpé aucuns autres, que ceux du país. Nous luy ferions aussi grand tort, d'estimer, que estant luy venu à Rome, il n'eust sceu faire la medecine qu'avec les remedes gregaux, ou de Pergame lieu de sa natiuité, & non avec ceux que la terre Italiéne produit: veu mesme, qu'estât luy appellé aux champs, le plus souuēt se seruoit des medicamens que le lieu & la saison luy pouuoit fournir. La cure qu'il fit, soy treuuant aux champs chez vn villageois des tophes & nodes, aduenues aux ioinctures, avec le fromage vieux *Liv. 10. des simples.* & vermoleu. La playe recente qu'il mena à cicatrisation, avec le seul fromage frais. La playe *Liv. 3. ch. 2. de la cōp. des med.* semblablement, faicte aux nerfs, qu'heureusement il guarit par la meslange du propolis avec *selon les genres.*

le leuain : & vne infinité d'autres experiences, qu'il a faictes des medicamens vulgaires & familiers, monstrent allés la verité de ma proposition. Briefles tresbeaux & tresprofitables liures qu'il a faits, *de paratu facilibus*, ne semblent pretendre autre chose, que nous persuader, que la terre est en tous endroits pleine de medicamens, & aussi que la multitude de remedes est superflue & vaine, lors qu'en ce que peut estre faict par peu & familiers, nous en employons beaucoup, trop exactement preparez, & avec trop de fraiz recherchez. Ce que Pline a aussi condamné, comme chose ridicule, & plus propre pour enrichir les Apothicaires, que pour donner soulagement aux malades, par ces paroles, *Hinc ex terra nascentibus nata medicina, hec sola natura placuerat esse remedia parata vulgo, inuentu facilia, & sine impendio, ex quibus vivimus. Postea fraudes hominum & ingeniorum captura, officinas inuenire, in quibus sua cuique homini vanalis promittitur vita. Statim compositiones & inexplicabiles decantantur. Arabia & India in medio aestimatur, vlcerique paruo medicina à rubro mari importatur, &c.* Et en vn autre lieu. *Nos nec Indicarum, nec Arabicarum mercium aut externi orbis attingimus medicinas : non placent remedia tam longè nascentia, non nobis gignuntur, imò ne illis quidam alioquin non venderent, &c.*

Li. 1. ch. 1.

Oribase Medecin non moins excellent qu'ancien, semble n'auoir pas esté moins curieux en la recherche des medicamens. Pour autant que la plus part des œuures que nous auons siennes, sont employées, tant à descrire ceux que luy
mesme

mesme a experimentez, qu'aux autres, qu'il a receus de la main de ses ancestres. De sorte qu'apres Galen, il se glorifie, d'auoir en toutes oportunittez de temps & de lieux, abondance de remedes. Hypocrate tant honoré des Philosophes (& duquel Galen affirme n'auoir rien ignoré, luy attribuant le titre de diuinité, & de superiorité entre tous les Philosophes, qui a marché par toute la Grece avec admiration de tout le monde,) n'a iamais (ainsi qu'appert en ses œuvres) vsuré les medicamens estrangers. Tant s'en faut que ses ordonnances sont toutes pleines des plus vulgaires & familiers remedes.

*Lib. quod
animi mo
res, ca. 7. 8.*

Il est certain & personne ne le scauroit nier, que la terre ne soit par tout pleine, des medicamens alteratifs à toutes intensions : Mais quand à ceux qui sont dediez aux purgations, nos Prouinces (selon l'opinion de plusieurs) en sont destituees; & si en icelles on en treuue quelques vns, ils sont si pleins de malignité, qu'ils ne peuvent estre accommodez à l'vsage des hommes, & de là vient (disent-ils) que la necessité nous contraint, d'aller mandier les estrangers; D'auantage combien que les medicamens, qui sont en vsage par toutes les Prouinces de l'Europe Chrestienne, soyent la plus part Arabesques & Orientaux, on les met neantmoins plustost en besongne, comme ceux desquels on a desia de long temps faict experience. Ioint aussi que nos Medecins abhorrent ceux, desquels les effects nous sont incertains, & incogneus.

Telles & semblables obiections ont accoustu-

mé faire ceux, qui soustiennent le parti des Arabes en ce faict, ausquels il n'est pas difficile de respondre. Premièrement l'experience (qui n'est de peu d'efficace, principalement aux choses qui concernent la medecine) nous sert de suffisant tesmoignage, qu'il n'y a ny plaine, ny môtagne, voire aux prouinces plus infertilles, en laquelle les vns & les autres ne croissent suffisamment. N'est pas vray semblable, que celuy qui a créé toutes choses, aye pourueu nos regions des vns, les laissant destituees des autres, veu que en ses dons il y a toute perfection: & depuis qu'il est dict de luy & de nature, n'auoir rié faict en vain, ne faut point estimer, qu'il aye faict les vns sans les autres: depuis que les alteratifs, se raportent si bien aux purgatifs, que l'vsage des premiers est le plus souuent tres-dommageable, si quand & quand l'emotion par eux faicte, n'est par les seconds appaisée. En ce que nous remarquons, & deuons auoir tousiours deuant les yeux, le soing que Dieu a de nous, nous cherissant comme ses enfans. Ayant establi par vn merueilleux ordre la permanence & succession des choses corporelles, pour nostre proffit: & desquelles il est curieux iusques là, & nous ayme si tendrement, que mesme au pais là où la canicule eschauffe par trop, il mande annuellement le vent Ethide pour rafraeschir l'air, & le rendre aux habitans plus favorable. Quand à ce qu'on ameine de l'vsage des medicamens desia experimentez: il est certain qu'avec plus d'assurance ils peuuent estre exhibez aux malades, que ceux là, les effects desquels
sont

font incertains, & fans aucune preuue. Mais tout ainsi que les Grecs, les Arabes, & autres anciens Medecins, ont premierement par longues & assidueles experiéces recogneu la faculté de leurs simples : ainsi doit faire chasque Medecin en sa prouince : & principalement ceux qui habitent aux villes, là où les lettres sont en estime, & les vniuersitez ont esté anciennement erigees.

Cóme de ma part ie n'ay iamais espargné, ny les meilleures heures, ny le peu de facultez que Dieu ma donné, depuis le temps que i'exerce ceste profession, & ne feray a l'aduenir à mon possible, à l'honneur de Dieu, & pour l'vtilité publique.

Entre plusieurs autres occasions, qui nous deuoyent esmouuoir, de nous approprier & rendre nos remedes familiers & domestiques, sont infinis inconueniens, qui arriuent tous les iours, par la violence d'aucuns medicamens nostres : & mesmement par l'vsage des drogues estrangeres, tant pour cause qu'a peine les receuons nous qu'adulterees & vermolues, que pour autant que nous les ordonnons, estimans qu'elles soyent à present telles, que les anciens les ont experimentees, sans nous prendre garde, que leurs qualitez sont entierement alterees par le changement des temperatures des Prouinces. Lequel changement est faiët, par la mutation des aspects celestes, procedans du mouuement de trepidation. De sorte que les païs qui estoient fertilles, deuiennent par cela steriles, & au contraire. Les hommes mesmes (cóme les Histoires
nous

nous font foy) changent de corpulence, de force, & de complexion. Exemple, anciennement que le païs des Gaules estoit fous Mars, les hommes estoient grands comme Geants, blancs, &c. C'est pourquoy Dieu qui faict toutes choses à poids & à mesure, a baillé à tous indifferemment les remedes propres, lesquels il accommode, change & façonne par ses causes secondes, suivant le naturel des hommes.

*Que nostre Prouence est fournie de tous les
simples necessaires pour la guarison. des
maladies qui peuuent aduenir.*

CHAPITRE II.



Vand on voudroit bien faire se tort à la nature, de l'accuser, qu'elle eust laissé quelques côtrees despourueuës & indigentes, de remedes necessaires à la conseruation, & restauration de la santé des hommes qui les habitent: oserions nous dire cela de nostre Prouence? De laquelle semble que la mesme nature ait voulu faire vn abregé de tout le monde, & y enfermer la fœcondité, de tout ce qu'elle a esparsement distribué, entre toutes les autres du globe. Elle nous produit, toutes les especes de grains, vins, huiles, sels, bestails, poisons, & toutes sortes de fruiçts, soyes, laines, brief tout ce qui est propre pour la nourriture, entretien, & plaisir des hômes. Elle nous exhibe
le ver

le vermeillon, le safran, quand bon nous semble, la soude, le pastel, la guesde. Elle nous presente pierre de toutes sortes, pour bastir & edifier, plastrer, mouldre, crufer, & à faire verres. Le bolus encores, le tale, le iayet, le coral, la croye, & ocre. Elle enferme dans ses flancs l'or, l'argent, le mercure, le plomb, le soufre, le fer, le vernis, & le charbó naturel, (qui est vne spece de bitumé) pour purifier & rendre tous lesdicts mineraux propres à nostre vsage. Et pour la guarison de plusieurs maladies, par autre artificee incurables, elle nous elixe dans ses entrailles, de bains naturels & tres-salutaires, à Digne & dans ceste cité d'Aix. Et neantmoins quoy que nous habitons vne tant fertile prouince, & si apte à la production de toutes choses: nous ne voulons confesser estre abondans & tres-riches de remedes. Et pour autant que des choses susdittes, les vnes suiuent naturellement les païs chauds, les autres les froids, aucunes les temperez, plusieurs les secs & moëttes, quelques vnes les sales, d'autres les doux, les gras, les maigres, &c. Nostre Dieu a prouueu ceste prouince, en diuers endroits, de toutes celles temperatures: car l'Orient & les Indes ne sçauroyent estre gueres plus chauds, que sont les cartiers d'Hieres, de Toulon, &c. Plusieurs lieux des montagnes de ce païs, ne cedent rien en froidure, au païs de Suede, de Danemarc, de la Flandre, &c. Quand aux lieux qui n'excedent aucuns limites de temperature, on en treuve aussi beaucoup en ceste prouince.

Et pour retourner aux medicamens desquels
les

les Medecins vsent coustumieremēt, ou doiuent vsfer, pour la guarison des maladies, qui affligent les Prouençaux, nous en parlerons, prenant la diuision generale, qui est seulement de deux membres. Aſçauoir, que les medicamens sont ou preparatifs & alteratifs ſeulement, ou bien purgatifs enſemble: laiſſant pour le preſent ceux qui ont quelque pouuoir d'alimenter le corps, & de produire autres effects, tant externes que internes.

Les puiſſances des premiers ſont la chaleur, la froidure, l'humidité, la ſechereſſe, l'appertion, l'occluſion, l'incifion, l'inuiſcatio, l'attenuation, l'incrassation, & ſemblables operatiōs, qui procedent des premieres & ſecondes qualitez. Quand aux autres facultez, qu'on attribue aux medicamens de ce genre, d'auoir eſgard à telle ou à telle humeur, à telle ou à telle partie, mon intétion n'eſt pas d'en parler en ce lieu. L'action des ſeconds eſt principalement la purgation des ſuperfluitez & excremens moleſtes au corps humain: combien que en iceux ſe treuent auſſi les puiſſances premieres.

Or que nous ayons les premiers en abôdance, il eſt ſi notoire que perſonne ne l'oſeroit mettre en controuerſe. Meſmes que les apozemes, les ſyrops, & vne infinité d'autres compositions, que nous mettons ordinairement en beſongne, à ſemblables intentions, en ſont ſuffiſante preuue. Mais (*proh dolor*) nous auons eſtimé iuſques à preſent noſtre Prouence ſi ſterile & deſpourueuë des purgatifs, que n'auons daigné de chercher,

cher, pour voir si en son magasin, nous pourriõs choisir les drogues conuenables, pour l'expurgation des excremens & superfluitez, qu'elle mesme semble auoir occasionnez, & qui plus est, disposez à mesme intention. Tant s'en faut, qu'en telles necessitez aymons mieux recourir aux empruns, à cent pour cent, que de prendre de nostre creu, & d'vser des drogues que nostre tres-fœconde mere nous produit.

Et depuis que la faculté purgatrice des medicamens (au moins de ceux qu'on dict purger par attraction) ne peut estre cognüe, que par la seule experience, n'ayant en cela la raison aucun lieu. N'est-il pas chose digne d'admiratiõ, ou plustost de vitupere, que les estrangers & barbares nous surmontent de diligence? d'auoir si bien examiné & approuué la puissance des leurs, que nous, ignorans ce que peuuent les nostres) soyons contraints d'en vser comme des nostres propres. Je ne doute point que si Platon estoit viuât qu'il n'eust tres-suffisant argument de nous blasmer & reprendre, comme infracteurs de la Loy, qu'il louë tant: par laquelle estoit prohibé à tous, d'aller querir de l'eau chez son voisin: que premiere-ment ils neussent creusé dans leur fons iusques à l'argille, c'est à dire qu'ils fussent assurez de n'en pouuoir recouurer chez soy.

Le vulgaire, & mesmes les femmelettes semblent en cecy auoir esté plus curieuses & diligentes que nous: car elles ont mises les facultez de plusieurs medicamens en lumiere, lesquelles nous estoient auparauant incognües. Et quand

aux

aux purgations, le plebee coustumierement mesprise les estrangers, vsé de la catapuce, de la laureole, du tytimal, de l'hieble, & autres que la necessité leur a faict experimenter.

Brief la populace met en besongne les medicamens produits en nostre Prouence, tant aux internes, qu'aux externes maladies, quelquefois avec meilleur succès, & tousiours avec moins de frais que nous, qui preferans le rheubarbe, les tamarins, les mirobolans, la casse, & autres drogues estrangeres, adulterees, ou vermoïues & chassies de vieillesse, outre le trouble que donnons aux malades à cause de l'odeur & du goût maufade, odieux & ingrat; Sommes cause que les Apothicaires sont contrainsts (estans les drogues estrangeres si cherement achetees) d'espuiser la bource des pauvres malades; tellement que nous en voyons plusieurs, ceder plustost à l'impetuosité des maladies, & aymer mieux mourir, que de recourir à nous, comme aux propugnateurs de la santé des hommes, sachans fort bien qu'ils ne pourroyent euites les drogues Orientales, & Indiennes, ny le registre des Apothicaires.

La coustume ancienne de faire la medecine, combien qu'elle fust moleste aux Medecins, & de beaucoup de travail: elle estoit neantmoins tres-salutaire aux malades, & de beaucoup de profit à la republique: car lors qu'un mesme homme (docte toutesfois & expérimenté) faisoit l'office de Medecin, de Chirurgien, & d'Apothicaire, les malades en receuoient plus de soulagement, & si encores estoient immunes du triple salaire,

salairé, duquel maintenant sont chargez.

Les Apothicaires, quand en ce faict, doiuent estre deschargez de toute accusation & blasme. Car ils ne peuuent, ni doiuent, meubler leurs boutiques, d'autres drogues, que de celles, que les Medecins mettent ordinairement en pratique. Lesquelles estant acheptees cheres, ne peuuent estre vendues qu'a cher pris.

Je ne veux pas aussi mesdire des medicamens Orientaux, Indiens, & Arabesques, autant accommodez & conuenables aux hommes de ces contrees là, (pour lesquels principalement, ils sont esté faicts) que sçauroyent estre à nous les nostres. Mais i'oseray bien dire, qu'a peine pourrons nous euitier le crime d'ingratitude, ou de negligence, ou plustost, d'estre dictz peu soucieux du profit public, de n'auoir faict long temps y a vne diligente recherche par tous les endroits de ceste prouince, laquelle (suis asseuré) nous fourniroit en affluence de tresbons & beaux medicamens, tant purgatifs (desquels nostre intention est seulement de parler en ce lieu) qu'autres, d'où nous receurions autant, & voire plus de profit, que des estrangers, moins propres & accommodez à nostre complexion. Car il est tres-certain, que les animaux, les plantes, & toutes autres choses, d'où nous choisissons les alimens & medicamens, iouïssans de mesme influence celeste, de mesme air, & presque de mesme alimens & nourriture, respondēt mieux à nostre temperament, & naturelle complexion, que celles qu'on nous apporte des païs estrāges.

Ceux qui ne ſçauent faire la medecine qu'à la mode des Arabes , ne peuuent nier qu'il n'y aye en ce païs bonne prouiſion de ſimples medicamens, & meſmement des purgatifs. Mais diſent-ils , leur vehemence eſt tant ſuſpecte , qu'ils ne peuuent eſtre donnez aux malades , qu'avec detrimēt de leurs perſonnes , & haſard de leurs vies , comme ſi la correction n'auoit pas lieu en iceux, tout ainſi que l'eſcammonēe, le turbith, & autres qui ne cedent rien aux noſtres en malignité, ont eſté corrigez par les anciens Arabes.

Quels remedes plus propres pour les purgations pourroit-on trouuer, que le cocombre ſauage en toutes ſes parties , que l'hyeble, la catapuce, & autres, que nous mettrōs cy apres, pourueu qu'ils ſoyent bien maniez , preparez & deueſtus de leurs vehemens & malignitez , par l'induſtrie de l'Apothicaire? Tout ainſi dōc que les Medecins tant Grecs qu'Arabes , au temps iadis , ont trouué le moyen d'accommoder leurs medicamens , quelque vehemence & qualité eſtrange qu'ils euſſent , à l'vtilité de leurs citoyens : à quoy tiendra-il que nous n'en faiſions autant faire des noſtres , au profit de noz compatriotes? voire meſme ſans emprunter les ſortes du poiure, ny le gingembre, ny la canelle, ny le macis, ny les muſcades, & vne infinité d'autres ſpeces que les Orientaux ont employees pour la correction de leurs drogues malignes & vehementes.

Sur quoy nous magnifions touſiours plus les raretez de ceſte prouince , & admirons la prouidence

dence de nature, ou plustost de Dieu autheur d'icelle : car à mesure qu'il nous a baillé de medicamens purgatifs, peut estre plus violents qu'aux autres, aussi nous a-il pourueu de correctifs pour brider & arrester leurs vehemens , plus qu'en autre part : car outre la familiarité des coins, desquels nous abondons , nous auons encores dans les forests & lieux champestres, infinis pomiers, poiriers , & pruniers sauuages , qui produisent leur fruit , tres-vtile pour ce faict , en quantité non comparable. Nous auons encores les corneilles , cuernis en Prouence, les nesses, les cormes, ou sorbes en Prouençal , ie laisse les aromatiques , qui ne seruent de peu à ceste intention, tant pour le regard des medicamens , que pour les parties du corps, ausquelles ils seruēt comme de rampars pour empescher lesdictes vehemens : deiquels correctifs si nous sommes aussi riches que les Orientaux mesmes, i'en laisse le discours aux plebees. D'auantage le vin-aigre (qui est de grand efficace à surmonter l'excessive chaleur & mordacité des simples) se faict de soy-mesme en ce pais, & plus genereux qu'en aucune autre part.

Ie ne puis omettre vn propos veritable , & digne d'estre remarqué, suiuant ce poinct , d'un sieur Conseillier , disant que nostre Dieu a si bien prouueu ce pais de toutes choses vtiles aux hommes, que iusques aux corneilles , cormes, & autres semblables , se treuent en maturité , iustement au temps, que les hommes sont plus subjects aux disenteries, lors que l'usage, ou plustost

abus des melons, raisins, & autres semblables fruits, ou bien l'acrimonie des humeurs, par trop eschaufez, au temps de la canicule, la peut exciter.

Quel contentement & profit seroit-il à la republique, que les Medecins, chacun en sa province fussent si diligens & curieux, d'accommoder les medicamens, au profit de leurs concitoyens, comme ont esté iadis les Arabes, & principalement Mesues, qui a surmonté en ce faict tous les autres de son temps: selon les regles duquel nous deuons & pouuons preparer nos medicamens, tant par la meslange de ceux qui ont contraires vertus, que par la coction, trituration, lotion, incineratiõ, & autres telles preparations, faictes par le labeur & industrie du Pharmacien.

S'ensuit donc, que despuis qu'avec beaucoup moins de despée, & autant ou plus de commodité, nous pouuons faire la medecine en ce pais, des medicamens, qui sont en iceluy nourris, nous faisons tort à la nation Prouençale, de la frustrer des biens, que nostre Seigneur semble auoir seulement preparez pour elle, & desquels nous auons esté faicts les fides dispensateurs: Comme aussi les Apothicaires & droguistes, ont dequoy se plaindre de nous, de ce que nous les contrainons nauiger iusques aux extremittez de la terre, pour recouurer avec grands perils, frais & despens, ce que se peut sans danger, sans grand pourchas, & à bon conte recouurer en ce pais.

Qu'en ce païs peuuent estre treuuez plusieurs medicamens propres pour purger toutes les humeurs.

CHAPITRE III.

L n'est donc pas en controuuerse que la terre Prouençale produise suffisamment les medicamens alteratifs, necessaires à toutes intentions, mais qu'en icelle se puissent treuuer les drogues conuenables pour les purgations vtils & assurees, plusieurs le treuuent impossible, ou difficile. Ausquels nous tacherons de respondre & satisfaire, au present chapitre. En premier lieu faut noter, que les humeurs & excrements subjects à la purgation, ou sont bilieux, ou phlegmatiques, ou melancholiques, d'où est venu que nous appellons les medicamens purgatifs, cholagogues, phlegmagogues, & melanagogues, leur attribuant le nom des humeurs, que (comme l'on dict) naturellement ils purgent.

Quand à ceux qui tirent le sang hors des veines, que les Grecs appellent hemagogues, Galen confesse n'en cognoistre point, & combien qu'il en eust la cognoissance, il estime n'estre point licite, de le diuulguer, non plus que les venins & poisons, ne deuoyent iamais estre tant diuulguez, & faicts si familiers, que iusques aux plus idiots & ignares, aujourd'huy en abusent: au grand interest de la republique, & scandale de la Chrestienté.

Si donc nostre intention & scope tend à purger la bile, de quelque genre qu'elle soit, nous auons de medicamens à ce propres, & desja experimentez, & iceux tant benins, que vehemens: combien que ie ne fais pas doubte, qu'il ne s'en trouuast chez nous beaucoup plus, n'estoit que nostre negligence faict, que nous nous contentons de la curiosité, & diligente recherche des anciens.

En premier lieu entre les benins cholagogues, nous auons les prunes, la manne, la fumeterre: nous auons d'abondant plusieurs especes de roses, toutes bonnes pour purger l'humeur bilieux, & les serositez, avec plus ou moins de vehemence. Il est certain que plusieurs autres fleurs, des herbes & arbres, feroient le mesme, si la coustume estoit d'en faire les syrops, comme l'on faict des roses incarnates, & des violettes de Mars. Dauantage l'absinthe croist dans nos iardins, autant recommandé pour ce faict qu'aucun
1. des simp. autre, selon Mesues.

Le petit laict, que les Latins appellent *serum lactis*, le vulgaire la gaspe, n'a pas moins d'efficace de purger ladite humeur: & principalement si on la separe de la recuite ou brouille, les bergers s'en purgent souuent, non sans profit. Ceste liqueur est rendue capable de purger toutes humeurs, moyennant la maceration qui est faicte des medicamens propres en icelle. Et pour ce que souuentefois il arriue, que l'on rencontre des complexions auxquelles les medicamens furnommez, ou autres de mesme genre, ne font point

point ou bien peu d'operation, alors il faudra augmenter leur aigreur, par l'addition de quelque autre des plus vehemens: comme de l'ellébore blanc, le cocombre sauvage, le petit centaure, & autres que nous deduirons en son lieu.

Pour la pituite nous auons l'agaric femelle, qui à cause de sa bonté, est appelé par Democrite medecine de famille: i'ay bien osé le mettre au nombre des nostres, pour les raisons que i'ameneray en son lieu. La Tapsia aussi croit chez nous, laquelle (comme sera monsté) n'est autre chose que le turbith.

Pour la melancholie, nous auons le polypode, la fumeterre encores, la brionia, le pithime, & le thym mesme, & autres, qui se peuuent aussi accómoder, pour la purgation de la pituite. S'il aduenoit (comme dit est) que ceux ci ne fussent suffisans, comme souuentefois aux plebees & ruraux, ne causent autre chose que l'emotion: nous augmenterons leur dose, ou plustost accroistrons leur veheméce par l'addition de conuenable quantité de ceux qui les surmontent en force & vigueur: ayant premierement receu les preparations & corrections telles, que nous monstrerons en son lieu: car i'estime, & la verité est telle, qu'il n'est moins facile de les accommoder à nostre vsage, que de faire les trochisques alahandal de la colocynthe, & le diagredium de l'escammonce.

Depuis donc que les medicamens nous sont si familiers & domestiques, qu'en tous lieux & en toutes saisons nous en pouuons recouurer

auec peu & quelquefois sans point de despence: quelle necessité y a il d'aller mandier entre les barbares infideles, l'escammonce, le turbith, l'aloës, le rheubarbe, les tamarins, la casse, & autres qui ne sont pas meilleurs, ny voire si bons que les nostres, & sont de despence à plusieurs intollerable, principalement le rheubarbe, l'amertume duquel, les Barbares nous font trouuer si douce, que quelquefois, & le plus souuent, les Apothicaires n'en peuvent recouurer qu'auec grande peine & cherté. Tellement que s'ils veulent faire les separations requises, vne liure leur reuient quelquefois à plus de cinquante escuz, de laquelle cherté, (pour dire vray) nous autres Medecins sommes cause. Car nous l'auons mis en telle reputation, qu'à grand peine trouueroit on dans les liures des Apothicaires vne recepte pour purger, que le rheubarbe n'y fust entremellé, comme poil en gasteau.

Les Medecins tres-anciens (entre lesquels) nostre Hippocrate est le plus renommé, pour auoir mis le premier lustre à la medecine, laquelle auparauant estoit assez rude, & obscurément sans methode traitée, Archigenes, Apollonius, Crito, & autres qui sont venus quelque temps apres Hippocrate, & mesme Galien (qui a cōduit la medecine en son entiere perfection.) Ces Medecins (dis-je) tres-anciens & renommez, ont practiqué aussi legitimement, & sans comparaison auec plus grande gloire, que scauroit faire maintenant le plus renommé du monde: de sorte que nous estimons aujourd'huy,
celuy

celuy estre le plus parfait, qui de plus pres peut atteindre leur doctrine & experience. Et toutefois, quand il a esté question de donner aux malades medecine purgative, se sont contentez de l'ellobore, du peplion, de l'elaterion, & de quelques autres, qui aussi croissent chez nous: toutesfois à cause de leur vehemence, avant que les exhiber, ils les preparoyent si bien & duëment, qu'ils les rendoyent capables, pour estre employez à tous sexes, & à tous aages.

On dira qu'en nostre siecle les hommes sont si delicats, qu'on ne leur auseroit donner tels & semblables medicamens; lesquels neantmoins les Medecins surnommez, ne craignent point d'exhiber alors, pour estre les hommes plus robustes & gaillards, & plus difficiles à esmouvoir. Nous respondons que la pouldre de mercure, l'antimoine preparé, le retumber (que nous appellons) la catapuce, qui sont medecines vulgaires & communes de nostre temps, montrent clairement que les hommes de maintenant, ne sont pas moins capables de soustenir la vehemence des medicamens, qu'estoyent ceux de ce temps là: car il est certain, que l'antimoine & la pouldre de mercure excèdent en malignité & vehemence tous les autres, nonobstant toutes corrections & preparations.

Et d'abondant si la cacochimie & abondance des humeurs, ioincte avec les forces, seruent de quelque chose, pour soustenir la violence des medicamens, quel aage a-il passé, auquel les hommes fussent plus farcis & pleins de toutes

sortes d'excremēts, qu'est le nostre? Et de là vient qu'au lieu que les anciens, purgeoyēt aill's competemment avec vn seul simple, nous sommes quelquefois, voire le plus souuent contrains, de mesler tous les genres des medicamens ensemble, pour faire vne deuë purgation: tant est grande la varieté & l'abôdance des excremens, qui règnent aujourd'huy aux hommes. Et tout ainsi que la sobrieté & temperance des hommes de ce temps là, faisoit que les maladies n'estoyēt pas si frequentes, ny tant meslees & impliquees, ainsi la dissolution & voracité des hommes de nostre temps, est cause que les maladies sont si diuerses, variables & de beaucoup de sortes. D'auantage les anciens ne furent iamais si diligens & curieux à corriger les medicamens, que sont les Medecins de nostre temps, lesquels nous manions & preparons si industrieusement, que sans crainte ils peuuent estre donnez presque à tous & en tous estats des maladies, eu toutesfois esgard aux circonstances: quoy que les anciens n'exhibassent les leurs que bien rarement. Et pour retourner au rheubarbe, drogue tant en estime, nous ne le trouuons point si frequent aux receptes des Grecs, ny presque iamais, voire despuis le temps de Galen en ça, comme ont esté Paul Aeginete, Aëce, Actuere, &c. ausquels il a esté cogneu non moins que de nostre temps: ny les Arabes mesmes, de la main desquels nous le receuons, ne l'ont pas en si grand estime, que de le donner comme vne chose si exquise, comme nous faisons.

Reste donc que nous nous cōtentions de nos remedes, laissant aux estrangers les leurs:& tout ainsi que les Medecins,tant Grecs, que Arabes, ont tousiours faiët la Medecine des drogues de leurs païs,aussi seroit-il chose tresconuenable & necessaire , que nous fissions le mesme , chascun en sa prouince.

*Que nous pouuons faire la medecine
sans le sucre.*

CHAPITRE IIII.



Ombien que les anciens ayent iadis aussi eu la cognoissance du sucre, cōme aujourd'huy nous le cognoissons (ainsi que l'on peut veoir aux escrits de Dioscoride, tres-ancien , & tres-excellent simpliste , de Galen & des autres qui sont venus apres,) toutesfois ils ne l'ont pas tant celebré, ny l'ont eu en si grād estime, que nous l'auons de nostre temps , principalement en ce qui concerne la medecine : car nous ne lisons point qu'ils l'ayent mis en aucune de leurs receptes: auquel ils ont tousiours preferé le miel comme beaucoup plus idoine , selon les intensions , suiuant lesquelles on a de coustume de meslanger les autres medicamens avec iceluy.

Le sucre donc , par ordonnance des Medecins est meslé avec les medicamens , pour deux raisons principalement : l'vne qui regarde la
conserua

*Livre 2.
chap. 72.
Li. 7. simpl.
med.
Paul. l. 7.
cap. 3.*

conseruation d'iceux, l'autre le gouſt du malade, pour autant que le ſuccre par ſa ſauueur rend les medicamens (qui autrement ſont ingrats) plus agreables. Or que le miel puiſſe faire l'un & l'autre, autant & plus à profit, il eſt ſi notoire, que ne ſemble auoir beſoin d'aucune preuue, car pour le regard de la conſeruation, nous auons le theriaque, le mithridat, & pluſieurs autres compoſitiōs formees avec le miel, en façon des opiates, qui ſont de ſi longue duree, que la longueur du temps ne les ſçauroit mener à corruption, pourueu que le miel ſoit bien choiſi, bien meſlé, & bien cuit, ſelon les preceptes de la pharmacie. Quand au gouſt, l'experience teſmoigne, qu'il n'y a rien qui l'excede en douceur : toutesfois avec la ſauueur douce, on recognoit certaine acrimonie en iceluy, nō toutesfois exceſſiue, laquelle eſtant moderee par la meſlange du miel avec l'eau de la decoction, & par la coction meſme, n'eſt aucunement moleſte aux malades. Nous auons encores d'autres liqueurs, pour conſeruer & faire treuuer agreables leſdits medicamens : comme ſont le ius des panſes, des coirs, des prunes, que les Arabes nomment du nom general, *Mina*, l'attribuant à chaſque ſpece : comme quād on diſt *Mina cidoniorum*, *Mina paſſularum*, &c. Et entre autres le vin cuit à perfection, qui n'eſt de peu d'efficace pour la duration & ſauueur des medicamens. Et pour retourner à noſtre miel, non ſans cauſe les anciens Medecins en ont fait ſi grand conte, pour autant qu'outre les deux commoditez ſuſdites, il eſt de grand profit,

pour

pour raison des deux intentions principales, là où tendent les Medecins en l'exhibition des medicamens.

Le miel donc conioint avec les medicamens, de quelque genre qu'ils soyent, purgatifs ou alteratifs, meliore beaucoup la composition; car par sa vertu absterfue, conioincte avec l'acrimonie, la puissance purgatrice est augmentee, & pour le regard des medicamens, qui ne causent autre effect en nostre corps que l'alteration, le miel aporte aussi ses vtilitez: & pour autant que les medicamens de ce genre, ne pretendent principalement que deux choses, à sçauoir l'ouerture des opilations, & l'attenuation & incision des humeurs: le miel adioute quelque chose du sien à ces deux intentions. Je sçay bien que ceste proposition sera trouuee absurde, de dire que les medicamens alteratifs, tendent seulement à ces deux fins, veu que ie laisse les autres operations qui procedent des premieres qualitez, laquelle nous confirmerons: ayant au preallable suppose, que les medicamens sont magistralement meslangez, & composez pour estre reseruez & gardez dans les bouriques, en temps de necessite (laissant à part les autres intentions qui suiuent ceste composition, comme ne seruant de rien à nostre propos.) Et d'autant qu'il n'y a auourd'huy aucune composition plus frequente, au moins de celles qu'on faict avec le sucre, que les syrops, nous nous arresterons du tout en iceux: ausquels si nous verifions nostre proposition, à peine pourra elle estre esbranlee, par les autres

autres confections succees.

Nous disons donc que des syrops, qui doyent estre conseruez dans les boutiques, les effects que nous (principalement) en deuons pretendre, sont les deux ja dits, desquels s'ensuit la verité de ceste proposition: que lesdits syrops sont beaucoup meilleurs, si on les compose avec le miel, qu'avec le sucre: & pour confirmation de ce faut presupposer, que lors que les champs nous peuent fournir les simples necessaires pour faire les decoctions eschaufantes, refrigerantes, humectantes, desséchantes, & autres effects procedans tant des qualitez premieres, que secondes, (ce qui est au printemps, en esté, & la plus grande partie de l'automne) nous n'auons que faire des syrops: d'où s'ensuit qu'en hyuer seulement nous deuons vser desdits syrops. Aussi en ce temps là abondent plus les excremens cras & glutineux, & par consequent les obstructions sont plus frequentes en hyuer, qu'en autre saison de l'annee. Pour la preparation, apertion, & deliurance desquelles dispositions, qui est celuy qui voudroit nier, que les syrops *de duabus radicibus, de quinque radicibus, de fumoterre, de betonica, de stecade, &c.* ne fussent meilleurs, estant faits avec le miel, qu'avec le sucre?

On dira par contr'eschange, que le syrop violat, de limons, de granades, du ius d'oseilles, des raisins verds, &c. ne doiuent estre faits qu'avec le sucre, pourautant qu'on a de coustume, de les donner seulement aux febricitans, ou seuls, ou avec l'eau: tant pour esteindre la chaleur excessiue,

cessive, & pour brider l'impetuosité de la bile, que pour corriger la secheresse, qui suit pas à pas les fieures, & principalement celles, qui sont continues & ardentes, & consequemment pour estancher la soif : ausquels effets, nous ne pouuons nier, que le miel n'endommageasse plus qu'il ne scauroit profiter.

A cela nous respondons, que tous lesdits soulagemens reüssiroient avec plus de contêtement aux malades, & de profit encores, par le breuuage de l'eau simple, ou cuitte avec l'orge, ou quelque vne des semences froides mondees, qu'avec lesdits syrops.

Les femmes ont inuenté vn breuuage pour les causes susdittes, le plus agreable, tant au goust qu'à la veüe, qu'o pourroit excogiter, faict de la racine rougeastre d'oseille legerement boiillie avec l'eau : tellement qu'avec iceluy elles trompent bien souuent les malades, à cause qu'il represente en couleur le vin clairer.

Galen (lequel en toutes choses qu'appartiennent à la medecine, deuroit estre imité) n'a treuvé meilleur breuuage pour appaiser la soif des febricitans, que l'eau pure, & fresche: & mesmement alors, qu'il ne craint, ny inflammation, ny durté, ny tension, ny aussi imbecillité aucune de l'estomach, du foye, ny d'autre partie du ventre inferieur.

Aussi repugne elle à la fieure, de toutes ses proprietéz, plus qu'aucune autre chose, moyennant qu'elle soit choisie telle, que Galen la descrit en plusieurs parts de ses œuvres : toutesfois
s'il

s'il aduient que leſdites circonſtances nous empeſchent de donner l'eau, la ferons boüillir (comme dict eſt) avec l'orge ou autres choſes ſuſdittes, ou ſans icelles, pour n'eſtre moleſtes aux malades, qui en breuage plus qu'en toute autre choſe doiuent eſtre aucunement ſatisfaits; la plus part deſquels ont les ſyrops en ſi grand deſdain & horreur, qu'ils n'en veulent pas ſeulement ouyr parler.

Quel Medecin y a-il iamais eu, plus diligent & curieux, d'inuenter les potions vtils & plaiſantes aux malades, qu'Hippocrate? avec lequel noſtre Galen eſt ſi bien d'accord en cecy, que tous deux enſemble font vn catalogue des breuages conuenables aux malades, entre leſquels les ſyrops ny le ſuccre ne ſont point mentionnez, quoy que Galen (comme a eſté dict auparauant) aye auſſi bien cogneu le ſuccre que de noſtre temps. Ils n'ordonent donc autres liqueurs pour la ſoif des febricitans, & pour autres conſiderations cognues aux Medecins, que l'eau ſimple, la ptifane, l'oximel, l'hydromel, l'eau miellée, le vin debile & de peu de vertu, que les Grecs nomment *oligophoron*. Deſquelles potions, ils donnoient tantost de l'une, maintenant de l'autre, ſelon la maladie, & diſpoſition du malade: & tout ainſi que Galen, ſelon ſon Hippocrate, n'oſe conceder aucune potion miellée aux fieures ar dentes & aiguës, pource que facilement ſe transforme en bile, & s'enflamme quand & quand: de meſme deũs nous craindre de donner les ſyrops & breuages ſuccez, tant pour les raiſons ſuſdites,

*Lin. de la
diete aux
maladies
aiguës.*

*Comm. 4.
lib. de vict.
in acutis.
Part. 5.*

sufdites, que pource qu'il redouble quelquefois
les obstructions. Nous deuôs aussi auoir suspect
l'vsage de routes choses fort douces, grasses, hui-
leuses & de trop facile transmutation, pour les
causes cy dessus touchees. Tellement que les sy-
rops de *limonibus*, de *agresta*, de *granatis*, & autres
semblables, qu'on reserue aux boutiques, qui
coustumierement ne sont employez, que pour
appaier l'alteration, qui suit les sieures, en doi-
uent estre chassez & bannis, comme vne chose
non necessaire, ou dommageable.

S'il est donc ainsi que nous puissions faire la
medecine sans le sucre, & sans les syrops faicts
auec iceluy: de mesme pourrons nous traicter
nos malades sans conserues, condits, dragees,
formules, & autres confitures faictes au sucre,
lesquelles tant s'en faut que seruent de quelque
chose pour la guarison des maladies, qu'elles
l'empeschent & retardent, & que pis est rendent
quelquefois les maladies plus griesues, outre
qu'elles ne sont agreables à pas yn de cent ma-
lades. De sorte qu'il n'y a celuy de nous, qui
n'aye veu souuent les dresseoirs es chambres de
malades, ou les rabas & cornisses des chemi-
nees, pleines & empeschees de semblables
confections.

Le ne veux potrant reietter le sucre comme
du tout inutile à l'vsage des hommes, sachant
fort bié que ne pourrions trouuer aucune chose
plus propre, pour faire confitures tant liquides,
que solides, pour le contentement des riches, en
temps de santé; car (comme dict est) en mala-

die il s'en treuve bien peu, qui à la seule veüe ne les abhorrent.

Ayant donc considéré la bonté & vtilité du miel, touchant les occasions auparavant deduites, & les proprietéz qu'Hippocrate & Galen lay attribuent, nous le prefererons au succe, & mesmemét celuy de ce país, lequel estant amassé par les abeilles sur les herbes & plantes de suauve odeur, (desquelles ce país est plein) asçauoir le thym, le rosmarin, l'origan, &c. excède en bonté, tous les autres, tellement que nous le pourrions esgaller au miel Attique d'Hippocrate.

Suffira d'auoir demonstré, que nous en faisant la medecine en ce país, nous pouuons aussi bien passer du succe, que des autres drogues estrangeres, tout ainsi que les anciens Medecins, & principalement nostre Galen, lequel, ny en ses ordonnances, ny en celles qu'il recite de ses ancestres, pour les causes auparavant deduites, ne fait iamais mention que du miel.

De la preparation des medicamens, desquels est faicte mention cy apres.

CHAPITRE V.



Euant que passer outre, en la description des medicamens purgatifs, que nous voulôs deuoir, & pouuoir estre employez, pour les purgations necessaires à la nation Prouençale, semble estre fort

fort

fort conuenable, de deſcrire les moyens, de les deſpouiller & expurger, de la malignité, de laquelle ils ſont accuiez. Car ſi les alimens, qui reſpondent beaucoup, & ont grande ſimilitude avec noſtre temperament, & naturelle complexion, ne peuuent, ſans offence de noſtre corps eſtre receus, que premierement ils n'ayent eſté bien apreſtez, par le labeur du cuiſinier, & par l'action du feu, à plus forte raiſon les medicamens qui n'ont rien de ſemblable à noſtre naturel, doiuent eſtre bien corrigez & preparez, afin que tant les ſains, pour la precaution des maladies, que les malades, pour la guarifon d'icelles, les puiſſent receuoir ſans aucun danger.

Tout au commencement nous noterons ceſte diuiſion, qui eſt à ce propos conuenable, par laquelle les medicamens purgatifs ſont diſtinguez en deux claſſes: l'une eſt de ceux qui ſont benins, leſquels ont pluſtoſt beſoin d'eſperon, qu'il eſueille & haſte leur laſcheté, que de bride. L'autre eſt de ceux qui ont vne malignité naturelle, ſi eſlongnee & ennemie de la complexion des hommes, que ſi l'induſtrie du pharmacien, (qui eſt ſelon Galen le cuiſinier de la medecine) ne l'en approche quelque peu, l'experience n'en peut eſtre que bien dangereuſe.

La vehemence donc des medicamens a ſon fondement ou aux qualitez premieres & manifeſtes, ou à celles que nous diſons eſtre occultes proprietez, d'où nous tirons ceſte conſequence, que les choſes deſquelles on ſe ſert, pour la correction & amendement de telles vehemences,

doyuent auoir esgard, tant aux occultes, qu'aux manifestes qualitez : & pource que lescdites puissances occultes, sont si ardues & difficiles à cognoistre, qu'il n'y a ratiocination aucune, qui puisse atteindre le but de leur demonstration: nous sommes contrains de nous taire, & confesser nostre ignorance, lors que par quelque curieux, les causes de tel ou tel effect, nous sont demandees. Il est tres-certain, que s'il fust esté necessaire aux humains d'auoir telles cognoissances, que Dieu, qui a fait toutes choses pour eux, n'eusse pas permis qu'elles fussent voilees de tât de nuees d'obscurité. Luy (dis-je) qui a voulu que l'homme penetrat iusques aux plus hauts, & intimes cabinets du ciel, qui a daigné se faire cognoistre soy-mesme, triple personne en vne essence : n'eusse iamais celé les choses qui sont moins d'importance, en ce qu'il semble approuuer la diligence & curiosité des Medecins, touchant la recherche de la propriété des medicamens; par preuues & experiences assiduelles. Et combien qu'il nous faille croire aux auteurs (en ce qu'appartient aux facultez occultes) & avec Galen receuoir la leçon de leurs escrits: si est-ce que l'experience nous est aussi libre qu'a esté iadis aux anciens. Et pour dire clairement ce que m'en semble, (combien que suis asseuré, on le croira comme yn paradoxe) ie ne trouue point qu'il soit necessaire d'enfreindre les puissances purgatrices des medicamens, sinon en diminuât leur dose: veu qu'il est difficile, de trouuer choses contraires, par lesquelles telles infractions se puissent

puissent faire: tout ainsi que (comme dict est) la cause de semblables vertus nous est incognüe; joint aussi que seroit ridicule, de vouloir détruire la cause; par le moyen de laquelle nous espérons la iouissance de l'effect. Comme par exemple, l'Agaric par vne faculté occulte, procéda de sa forme spécifique, purge la phlegme, lequel depuis que nous employons seulement pour cest effect: à quel propos nous peinerons nous de chercher les choses qui, comme contraires se poutroyent opposer à nostre dessein?

Je sçay bien que l'on bride l'escammonce avec le coing, nous aussi enseignerons les moyens d'arrester la vehemence des medicamens du premier genre, avec les fruiçs adstringens, & quand & quand froids. Mais ce n'est pas s'opposer aux qualitez occultes; ains plustost aux manifestes, qui procedent des qualitez premieres ou secondes, & desquelles la forme spécifique se sert comme d'instrumens: lesquelles estant enfreintes & diminuees, les effets des autres sont aussi affoiblis. Parquoy nous concluons que depuis que la vehemence des medicamens purgatifs, prouient des manifestes qualitez, la correction doit auoir esgard seulement à icelles.

Les symptomes & nuisances, qui sont causees par la ptinse des medicamens, desquels nous parlons maintenant, montrent assez la verité de mon dire: car elles sont effets des qualitez manifestes, non des occultes.

Le premier desquel's symptomes, est le travail & agitation de l'estomach, par lequel nous

voyons le malade , estre affligé d'un facheux vomissement. La cause de ce est rapportee à certaines acres & piquantes vapeurs , engendrees par l'action de la chaleur , aux choses humides, desquelles lescdites vapeurs apportent quand & soy les qualitez , y adioustant neantmoins le medicament , quelque mauuaise qualité de sa part. A ces symptomes preuient Mesues, quand il enferme l'escammonée dedans un coing, ou dans une pomme creuse, avec le fenouil, le persil, le daucus, cuisant ladite pomme ou coing, ainsi remplis, & enuelopee de paste, dans le four, ou sur les charbons vifs.

Le second est la fièvre: car par leur acrimonie & chaleur, ils enflamment si bien les esprits, que le corps en deuient totalement eschauffé & alteré. A ceste fièvre on peut obuier, en apprestant les medicaments, avec choses qui ayent puissance de refroidir, comme sont les mucilages des prunes, des semences froides, l'eau rose, les violettes de Mars, le jus du coing, l'huile rosat, le violat, &c.

Le troisieme est le flux de ventre, quelquefois si immodéré, que le malade est en danger de sa vie, duquel symptome, non seulement la faculté attraitrice du medicament doit estre accusée: mais aussi l'acrimonie & excessiue chaleur qui est coustumierement en iceluy, laquelle neantmoins de soy-mesme ne causeroit pas cela. Ce symptome sera preuenu par la meslange des choses adstringentes, comme sont plusieurs fruits que nous auons, tant domestiques, que agrestes. La coction aussi, la maceration du medicament

en vinaigre, & l'assation, ont mesme efficace.

Le quatriesme est la dysenterie, les tranchees de ventre, le tenesme aussi, qui est vne vaine cupidité de venir à selle, desquelles affections la cause prochaine est, l'excoriation & raclement des boyaux, laquelle l'acrimonie du medicamēt, meslee avec celle de l'humeur peccante peut auoir causée. A quoy on peut obuier, moyennant que l'on prepare lesdits medicamens, avec les choses humides, grasses, & visqueuses: comme sont l'huile des amandres douces, les roses, la chair des prunes, les mucilages des-ja mentionnez, le bouillon de la chair, la decoction d'orge prise apres y remédie aussi. Lesquelles choses outre que temperent l'acrimonie du medicament, font qu'il ne seiourne pas long temps dans l'estomach, ny dans les boyaux.

Finalemēt on adioustē que les medicamens qui purgent avec telles violences, nuisent au cœur, au foye & à l'estomach, de leur propre naturel & de toute leur substance, & non seulement par leurs qualitez manifestes. Toutes-fois, combien que ie ne vueille pas nier les antipathies & sympathies, de diuerses choses ensemble: si est-ce qu'il est vray semblable, & ie n'en fais point de doute, que l'acrimonie & excessiue chaleur, conjointe avec la vertu purgatrice, n'en soit plustost cause. Aussi n'est pas merueille si ces parties là, se ressentent de l'esbranlement, & agitation causée par ledit medicament: car outre ce qu'elles sont voisines, & bien proches l'une de l'autre, elles ont certaines accointances & parti-

cipations ensemble: tellement que les troubles des vnes se communiquent facilement aux autres. Et non seulement icelles, mais encores la reste & toutes les parties exterieures du corps, ont leur part à semblables troubles, tant pour les raisons susdites, qu'à cause des esprits eschauffez & alterez plus que de coustume, diuagants par toutes les parties du corps, plus alors qu'en autre temps.

Je tairay pour le present, la correction, qui se faict par le labeur & artifice du Pharmacien: car i'esperé (moyennant l'ayde de Dieu) d'en parler amplement, en la partie qui suivra bien tost ceste cy, s'il ne suruient autre empeschement.

Du cocombre sauvage.

CHAPITRE VI.



Yant (selon nostre aduis) assés amplement demonstté en general que nostre Prouéce est pourueüe de tout ce que sçauoit estre necessaire pour faire la medecine, & principalement des medicamens qui sont necessaires pour la purgation: desquels nous auons proposé de parler seulement en ce petit traitté, esperant de parler des autres à l'aduenir. Reste que pour l'assurance de la verité de nostre proposition, nous descédions aux preuues particulieres, faisant vn catalogue des medicamens purgatifs, que nostre Prouence

tres-fertile, nous produit & prepare, sans que nous y mettions grand travail, & avec leger despençe.

Et d'autant que le cocombre sauuage, est vn des plus insignes, & plus familiers que nous ayons: car non seulement il croit tout proche des murailles, presque de tous les lieux de ce païs: mais aussi entre maugré nous iusques aux iardins, desquels il ne peut bonnement estre extirpé, dans l'enclos desdittes murailles: nous le mettrons tout au commencement de nostre toolle, ce que toutesfois ie n'oserois faire avec tant d'asseurance, n'estoit qu'Hippocrate, Galen, Dioscoride, & encores plusieurs des Arabes, l'ont eu en singuliere estime: car leurs escrits font preuue suffisante, qu'ils l'ont mis plusieurs fois en ieu: tellement qu'à bon droit, on s'esmerueille, comme est-ce que nous preferions l'escammonée à cestuy-cy, despuis que par l'autorité desdits auteurs tres-renommez, & par les experiences infallibles, nous sommes certains que cestui-cy a aussi puissance de purger la pituite, & la bile, tout ainsi que l'escammonée. Nous ignorons, au moins n'en sommes pas bien asseurez, quelle chose est l'escammonée, & Dieu sçait si ce qu'on nous apporte, sous ce titre, est plustost quelque autre simple: car à peine y a-il personne en ce païs, qui puisse dire au vray, auoir veu la plante d'où ceste drogue que l'on achete est extraicte, & mesme que les herboristes recens, confessent n'en sçauoir rien. Quant à nostre cocombre sau-

Enschini.

tient à l'histoire) ce qu'il est : & quand à ses facultez, si ne voulons croire à ce qu'en ont escrit les auteurs, il est à nostre pouuoir d'en faire l'expérience, ie dis encores de tous les autres, desquels nous ne cognoissons point les proprietéz. Premièrement (ainsi ay-ie voulu faire de la plus part de ceux cy) sur quelque beste, comme sur les pourceaux, les chiens: secondement en la personne de quelque ruraux, robuste, & gaillard vilageois: en dernier lieu sur nous mesmes, à l'exemple de Galen, & ce pour euitier les calomnies, lesquelles tant s'en faut que les Medecins mal habiles puissent euitier, que les plus aduisez y tumbent quelquefois. Lesdites preuues ne doiuent iamais estre faictes, qu'au preallable les preparations & corrections necessaires ayent precedé selon l'art & la raison.

Nous vsferons donc de nostre cocombre sauvage (le vulgaire l'appelle cocomerasse) tantost des fueilles tirant le ius par expression, tantost des racines, desquelles i'auois de coustume former de pilules au temps de la peste, fort propres aussi contre la vermine des enfans. Du ius aussi desdites racines, on en peut faire vn medicamēt, qui n'a son pareil contre l'hydropisie: pareillemēt le suc qui est extraict du fruiēt de ceste plante, peut estre mis en vsage, tout ainsi que Dioscoride l'enseigne, faisant des fondrilles ou residences d'iceluy, de petites formules, qu'il appelle trochisques, desquels il baille iusques à vne dragme, pour purger l'humeur pituiteux & cholérique, tant par le fondemēt que par la bouche.

C'est

C'est l'elaterion qu'Hippocrate vsurpe si sou-
 uent à mesmes intentions. On dira possible que
 l'autorité d'Hippocrate ny des autres premiers
 Medecins, ne nous doit esmouuoir en cecy, pour
 autant que, ou ils ont ignoré les medicamens be-
 nins, que nous auons aujourd'huy, & par conse-
 quent estoient contrains d'vser de ceux cy, ou ils
 auoyent les malades plus difficiles à esmouuoir,
 par les medicamens purgatifs, ou bien qu'ils fai-
 soient la medecine à l'hasard, à la façon des em-
 pyriques de nostre temps, qui baillent sans dis-
 cretion leur antimoine, leur precipite & autres.
 A ces obiections nous respondons, que combien
 que les anciens Medecins, n'ayent pas cogneu
 quelques vns des medicamens, qui nous sont
 maintenant familiers: ce n'est pas à dire pour
 cela, qu'ils les ayent tous ignorez, & qu'ils ne
 purgeassent iamais leurs malades, qu'avec ceux
 desquels nous parlons maintenant, & principa-
 lement nostre Hippocrate qui (comme auons
 dict auparauant) a esté en estime de n'auoir rien
 ignoré: d'inferer aussi qu'il aye esté si hasardeux,
 de donner à tout propos, sans obseruation d'au-
 cunes circonstances les medicamens: ce seroit
 faire tort à sa renommee, d'autant qu'il a esté si
 aduisé & si scrupuleux, qu'il ne donne pas seule-
 ment la prisane, ny voire l'eau aux malades, sans
 meure deliberation. Quand à ce qu'on dict de la
 facilité, ou difficulté des hommes du temps pas-
 sé, & de ceux de maintenant, il y a esté répondu
 auparauant..

Pour retourner à nostre cocombre sauage,
pour

pour autant que les fruiçts de ceste plante, excellent en chaleur & vehemençe les autres parties, Dioscoride met plus de façon à leur correction qu'aux racines, ny aux fueilles : la methode qu'il tient pour faire les susdites formules est telle, Il prend le ius tressaillant, ou exprimé des petits cocombres, lequel il faict secher au soleil, iusques à l'entiere consumption de la partie aigueuse, & du residu il faict comme dict a esté.

*L. simpl.
med. purg.
cap. 9.*

Mesues, Medecin Arabe, mesle les especes aromatiques orientales, pour la correctiõ de cestuy-ci & des autres semblables. Mais nous qui ne pretendons point sortir hors de nos limites, pour faire la medecine, nous contenterons des nostres, qui pour ce regard ne cedent en rien aux orientales. Parquoy afin que nostre elaterion n'engēdre tortions de ventre, ou qu'il n'offence l'estomach, nous ferons vn petit sachet de menthe, d'absinthe, mentastre, de saulge, d'origan, de charuis, anis, &c. le tout estant bien puluerisé: lequel sachet trempera autant de temps dedans le ius desdits cocombres, qu'il est requis pour la perfection de l'elaterion. Et d'autant que par la tenuité de ses parties, ioincte avec certaine acrimonie, il ouure les orifices des veines (c'est pourquoy il est dict par Galen prouoquer les mois aux femmes) & par consequent excite les hemorrhagies: nous obuierons à ces inconueniens, si nous meslons nostre elaterion, préparé comme dessus, avec le ius ou chair de coings, ou d'autre fruiçt stiptique & astringent, ou avec les mucilages tirees de la graine des coings, du psilion, le
iaune

jaune d'œuf à demi cuit, & semblables choses conuenables pour arrester l'impetuosité & viresse de cestuy cy, & des autres.

L'elaterion & autres parties du cocombre sauage, ainsi preparees & accommodees, ne pourront causer aucuns accidens, à ceux qui les receuront avec les circonstances requises.

Il est aussi à noter, que l'elaterion ainsi préparé, ne doit estre mis en vsage, auant six mois passez apres sa preparation: tellement que selon l'opinion de Plin, le plus enuieilli est le meilleur, & si nous voulons croire à Theophraste, sa duree s'estend iusques à deux cens ans. Dioscoride (à qui ie m'arreste plus) tient que l'elaterion ne vaut rien à purger, que depuis deux ans iusques à dix.

Liure 20.
chap. 1.

De la catapuce.

CHAPITRE VII.



NE ne m'arrestera y pas à descrire l'histoire de la catapuce, non plus que des autres simples, desquels i'ay deliberé de parler, tât pour ce qu'ils sont cogneus presque de tous, & mesmement du vulgaire, qu'à cause que les herboristes recens, en ont suffisamment escrit. La populace qui sans discretion, pour se purger, vse tantost de l'un, tantost de l'autre, euiteroit plusieurs inconueniens où elle se precipite quelquefois, si n'estoit qu'elle

qu'elle ignore les moyens de les aprestez, & la dose ou quantité qu'ils doiuent estre exhibez.

Quand à la catapuce, faut premierement noter, que les herboristes en ont remarqué de deux sortes, l'une qui est grande, qu'autrement nous appellons *ricinus*, à cause que sa graine represente vn petit animal liuide, qui s'attache aux beufs, aux cheures, & autres bestes: on l'appelle en nostre langue prouençale cascaillons. Le vulguaire nomme ceste plante, *palma christ*, l'autre spece est petite, qui proprement est celle que nous appellons *catapucia*, Galen la nomme *lathiris*.

Toutes ces deux especes, ont puissance de purger la pituité, la bile, & les eaux: ie dis sans beaucoup molester le corps, pourueu qu'elles soyent bien preparees & maniees, selon les deux especes de preparation, notees auparauant. Et combien que la graine du *palma christ*, soit tres-facheuse à l'estomach, toutesfois nous auons par experience (confirmée encore de l'autorité de Mathiol) que si nous la faisons rostir, & estant icelle meslée avec le fenoil, le charuis ou l'anis (qui croit chez nous depuis peu de temps) la baillôs avec bouillon de polet ou autre liqueur en breuusage: tant s'en faut, qu'elle soit moleste, comme dict est, qu'elle n'est plus vomitiue, & purge seulement par le fondement, sans grande emotion; & combien que constumierement, on n'employe de ceste spece que la graine, si est-ce que les fueilles, les racines, & voire encores la rige ne sont pas inutile: car outre le profit qu'on en peut tirer, pour estre employées aux medica-

mens alteratifs, elles peuvent estre aussi diuerſement preparees pour les purgations, tantost d'une façon, tantost de l'autre. André Mathiol tres-curieux en l'experience des simples, faiſt vn médicament tres-vtile pour les hydropiques, de l'infuſion des fueilles du *palma chriſt*, dâs la meſgue ou gaſpe, ou pluſtoſt dans le laiſt recentemente tiré, laquelle infuſion il donne au patient.

Quand à la *catapucia minor*, (que les Prouençaux entendent ſeulement par le nom de caquapuce, les François la nomment eſpurge) combien que le vulgaire n'en vſe que de la graine, ſi eſt-ce que les fueilles & les racines ne laiſſent pas d'eſtre vtiles auſſi: l'admire vne choſe en la greine de ceſte *catapucia*, qu'eſtâs tous les autres medicamens de ceſt ordre, amers, acres, ou mordicans, odieux à l'odorat, ſadite graine ſe treuve douce, n'ayant aucune ingratitude, ny au gouſt, ny à l'odeur, en quoy nous admirôs touſiours la ſagacité & prenoyance de la nature, qui ſemble auoir eu eſgard à pluſieurs gens qui ſont ſi difficiles & delicates, qu'ils mourroyent pluſtoſt que de prendre vne potion amere, & de gouſt extravagant, tel que les autres medicamens ont, quoy que les Medecins tachent de couurir & pallier (ce qui eſt difficile) leſdites ingrattitudes, par choſes douces ou aigres. De ceſte graine donc, nous pourrons compoſer, ou breuuages, eſtant premierement conſite avec le vinaigre roſat pulueriſee, & priſe avec le vin blanc ſans ſieure, ou avec quelque decoction conuenable, ſi la ſieure y eſt, comme de cichoree, des endiuës, panſes
entieres,

entieres, quelque peu de semences chaudes; on en ferons opiates avec le miel cuit & escumé, & avec autres liqueurs; les pilules aussi pourront estre formées de ladite graine puluerifée, tant avec le vin cuit, ou rub de raisins, qu'avec la chair des coings, des prunes, &c. On preuoit aussi aux accidens que pourroyent exciter ces deux especes de *catapucia*, & principalement la *palma christ*, en cuisant leur semences, incluses dans vne pomme, ou coing sous les cendres chaudes, avec le fenouil, le charuis, la graine des pastinaques sauvages, les fruits aussi du genre femelle sont de grand efficace pour ce faict. Faut noter, que plus exacte preparation requiert, la grande catapuce, que la petite: car la petite à cause de sa saveur douce, semble auoir son temperament non point tant esloigné du nostre, comme l'autre: aussi les accidens qu'elle excite, sont fort dissimilables à ceux de la *palma christ*, & tresfaciles à tolerer, voire mesme, si elle n'est prise en grande quantité, n'en excite le plus souuent aucuns.

Quand aux fueilles de ceste cy, rien n'empeschera qu'elles ne puissent estre accommodees en plusieurs formes de medicamens, pourueu qu'on les puluerise diligemment, en ostant les nerfs & membranes, qui se trequent parmi lesdites fueilles: comme aussi l'escorce des graines, tant de l'une que de l'autre, & mesmement de la grande, doiuent estre separees, lors que nous les voulons mettre en pratique, estans puluerifées: car à ceux qui craignent la foiblesse de l'estomach, il les faut exhiber toutes entieres, premierement

mierement temperces dedàs le vin, ou vinaigre, ou le laiët, ou le vin cuit: les rustiques prennent, sans faire difference aucune, de l'une ou de l'autre, iusques à douze ou quinze grains puluerisez, faisans avec le leuain recent, de pilules qu'ils prennent avec bon succès: ausquelles s'ils adiou-
stoyent (comme i'ay faiët quelquefois) de laiët d'amandres douces, ou de cheure, ou plustost de brebis, ou de femme, seroit vn remede plus as-
seuré.

Celuy qui vouldra vser de ces medicamens & des autres ne doit pas ignorer, qu'il n'y a rien plus difficile & plus incertain, en l'art de medecine, que de les ordonner en dose ou quantité conuenable, eu esgard aux circonstances. Telle-
ment que la dose de ces deux especes de catapuce, Lin. 4. ch. 145.
ne doit pas estre semblable, car Dioscoride donne de la petite, six ou sept grains, avec les figues seches, & de la grande il en baille iusques à trente: ce que s'il entend des grains dudit simple, à mon aduis, la dose seroit trop excessiue, d'autant que sa graine est beaucoup plus grosse, que celle de la petite catapuce, & encores sa vehemence. Mais si les grains sont entendus selon le pois & la balance, sans preparation, seroit aussi excessif, & avec icelle seroit raisonnable.

D

Du tithymale.

CHAPITRE VIII.



Ombien que le vulguaire n'a pas en si frequent vſage le tithymale que la carapuce, ſi eſt-ce qu'il n'eſt pas moins cogneu, ny de moindre vtilité qu'icelle. C'eſt la plante que les barbares appellent *efula*, les Latins *laſtica caprina*, *herba capraria*, les François l'herbe à l'aict, & les Prouençaux, lachuſcle. Les Medecins qui ont eſcrit des ſimples medicamens comme Dioſcoride, Oribaſe, & deuant luy Galen, de noſtre temps Leonard Fuſch, André Mathiol, & pluſieurs autres, tous d'un commun accord confeſſent qu'il en y a de ſept eſpeces, toutesſois Fuſcius dit n'en cognoiſtre que trois. Ores qu'en ce païs, à mon opinion, nous ayons toutes les ſpeces, tant aux parties maritimes, que es montagnes; nous prèdrons neantmoins celuy qui nous eſt plus à port, qui croit par tout, iuſques aupres des murailles des villes & villages, és lieux cultivez & incults, & n'eſt autre que celuy, que Mathiol & Dioſcoride appelle *helioſcopius*, qui eſt en malignité & vehemence inferieur aux autres eſpeces.

Il n'y a en ceſte plante partie aucune, qui ne puiſſe eſtre employee, pour purger la phlegme & la bile, par le fondement: & encores, ſelon Mathiol, l'humour melancholique, & les eaux des hydropiques; bié eſt vray que toutes leſdites parties,

parties ne sont pas esgales en pouuoir, car le ius (semblable au laiët) est tres-fort & surmonte les autres parties, tant en chaleur & acrimonie, qu'en amertume: la graine fuit de bien pres ledit laiët, & les fueilles de mesme, mais les racines, combien qu'elles participent ausdites qualitez, si est-ce que leur vehemence est moindre, & plus facile à corriger: par ainsi jacoit que le laiët soit si acre & mordicant, & chaud, qu'il brule quasi comme le feu les parties, voire les exterieures: il y a toutesfois moyen de l'adoucir & temperer, par choses suauës, plaisantes & douces, c'est pourquoy Dioscoride l'incorpore avec les figues seches, ou la cire, là on le laisse seiourner long temps deuant que s'en seruir: le mesme on pourroit faire, avec les choses adstreingentes & refrigerantes, comme les coings & autres semblables fruiëts. Quand aux fueilles à l'exemple d'A-Li. 5. ch. 8. ctuere, nous les ferons rostir dans vn vaisseau de terre, & d'icelles puluerisees, en donnerons vne dragme, plus ou moins, avec la ptisane, la polëta qui est la farine d'orge ou d'auoine mouillee & sechee, & l'eau simple. Il y a mille autres moyens de donner lescdites fueilles ainsi rosties, ou en opiates, incorporant icelles puluerisees, avec le miel, ou le resiné, que nous appellons le rub en ce pais, ou la chair des panfes extraicte, ou bien avec quelque decoction, cōme d'un poulet, &c. ou en pillules formees avec le vin blanc, le ius d'absinthe, de la melisse, &c.

La graine semblablement du titymale, laquelle on amasse en Automne, seche & reduite en pou-

dre, peut estre receuë avec le miel, (selon l'ordonnance de Pline, avec ledict resiné & le vin cuit, en consistance de pilules, le mesme auons nous accoustumé de faire, avec la chair des prunes aigres, ou douces, des raisins secs & reseruez, des figues, extraicte à la façon de la casse.

La racine de ceste plante n'est pas moins conuenable ausdites intentions; n'estant sa chaleur & acrimonie plus formidable, que des autres parties: qu'est cause que nous la façonnerons pour nostre vsage selon tous les moyens surnommez: & pour autant que toutes lescites especes du titymale, en toutes leurs parties, offensent (comme l'on dict) l'estomach, & par consequent le cœur & le foye, nous meslerons ausdites compositions quelque chose cordiale & stomachique, de celles qu'auons dites auparauant: quant à sa chaleur & acre qualité, elle sera chastiee avec les choses refrigeratiues susdites, la tenuité & subtilité de sa substance, sera arrestee avec les choses gluantes, adstringentes, & stiptiques.

Par ainsi outre les moyens susnommez, nous pourrons faire vne decoction de melisse, ou ponsirade en Prouençal, de bourraches, buglosse, des cichorees, d'oseilles, pourprier, solanum, hippociste, & du ciste mesme, de panse, de pruneaux, de consolide grâde, &c. dans laquelle decoction ferons mouiller quelque temps, les fueilles, ou l'escorcée, ou bien la graine du titymale, qui nous sera en main, la quantité de deux ou trois dragmes: laquelle infusion pourrôs bailler sans scrupule aucū, voire mesme lescites fueilles, racines, & graine,

& graine, pourront estre accommodees en opiates, ou pillules, à nostre election. Ladite infusion pourroit estre faicte, dans le petit laiët ou mesgue, dans la decoction d'un seul ou de deux simples des susdits, ou plustost dans le vinaigre, dans lequel aura bouilli, ou aumoins trempé, la chair d'un coing ou de semblables fruiëts: il est vray que le titymale macéré dans le vinaigre, se doit prendre en substance, mais aux autres susdites infusions suffit de prendre la liqueur, où lediët simple aura trempé.

La dose du titymale est inegale, tant pour raison de ses parties, que pour raison de la façon de l'apprester: car il faut moins donner du laiët que des semences, moins d'icelles que des fueilles, & des racines plus que de toutes, tellement que si nous donnons demy dragme du laiët, corrigé comme diët est, sera assés de bailler vingt grains des semences, vingt cinq des fueilles, & iusques à trente des racines: eu tousiours esgard aux circonstances, remarquées par le docte & experimenté Medecin. Quand aux infusions, la doze de ce simple doit estre aumoins double, à celle qui se donne en corps & en substance.

De la *thymelea* & *chamelea*.

CHAPITRE IX.

NOus auons autant d'occasion d'vser de la *thymelea* & *chamelea*, qu'ont eu iadis les anciens Medecins, & mesmement Hippocrate qui a esté tres-adeuise, n'ayant obmis aucune circonstance, qu'il n'aye diligemment espeluchee, lors mesmement, qu'il luy conuenoit donner medecine purgatiue. Dioscoride faict deux diuers chapitres de ces deux simples: quoy qu'ils ne soyent beaucoup differens, ny en figure exterieure (ayant seulement l'un les fueilles plus minces que l'autre) ny en faculté purgatrice: d'autant que tous deux purgent la bile, la phlegme, & les eaux par le fondement: & à ces mesmes fins Hippocrate les baille tres-souuent, principalement le *granum cnidium* (ainsi appelle-il la seméce de la *thymelea*).

Ces deux plantes sont si vulgaires en ceste prouince, mesmement au pais bas, qu'il n'y a presque lieu incult, qui n'en soit peuplé, mesme que tous les chemins pres la ville d'Aix en sont borde. Et pource que l'election n'est de peu d'importance en ceste plante, nous nous prendrons garde de la choisir, selon les marques, que Mesues indique: premierement qu'elle aye les fueilles grandes, minces & verdoyantes: en second lieu qu'elle soit cueillie a part, là où plusieurs de mesme spece se treuuent, pour autant qu'on

L. des maladies internes.

Ch. 22. liu. a des simples mediceaments.

qu'on estime celle estre pernicieuse, qui croit toute seule en vn champ.

De ces deux plantes, les anciens n'en ont vſé que de la graine: l'une desquelles ils appellent *granum cnidium* (comme dict est) l'autre *cneorum*: ainsi le liſons nous tant aux liures d'Hippocrate, que de Dioscoride, tres-anciens Medecins: mais nous pourrons aussi employer les fueilles & racines d'icelles, pource qu'elles sont semblables en puissance aux fructs, & reçoivent mesmes préparations, comme nous dirons cy apres.

Nous remarquons avec les herboristes tant anciens que modernes, en ces deux simples, non seulement vne chaleur excessiue & acrimonie moleste, par laquelle elles alument les fieures, & causent les excoriations aux boyaux: mais aussi vne merueilleuse & vehemente faculté de purger, si dommageable au corps & aux parties nobles, que (comme escrit Mesues l'Euangeliste) on luy a pour ceste raison imposé le nom de Mesfereō, qui signifie, comme il interprete, rauissant la vie, & faisant les vesues.

A telles vehemens n'est pas difficile d'obuiuer par les moyens deduits auparauant, à sçauoir avec la meslange des choses adstringentes, stiptiques, aigres & froides, adioustant aussi celles qui sont tenaces & gluantes: & pour dire librement ce qu'il m'en semble, ores que la correction de la vehemence purgatrice, depende pour la plus part, du chastiment de la chaleur, acrimonie, & tenuité des parties, qui coustumiere-

rement se treuuent en tels medicamens : ie suis bien d'auis, qu'en tels cas, on ne laisse iamais les parties nobles de nostre corps depourueuës de leurs antidotes, desquels nous fortifierons tousiours nos meslanges, & cest pourquoy on a de coustume de bailler lesdits medicamens avec l'origã, l'absinthe, le *polion montanum* & semblables, qui ont aussi la chaleur au troisieme degre.

Les fruiçts agrestes & les autres ayans certaine aspreté & stiplicité, sont si commodés pour brider les vehemens de tous les medicamens, qu'il n'y a celuy, tant viste soit-il, qui ne soit arresté tout court. On adiousté à ces fins le ius du pourpier, aux meslanges, du *solanum*, tant celuy des iardins, que des vignes, que vulgairement on appelle coquerelles: celuy aussi de la cichoree & des endiues: les mucilages aussi tirees des figues, des panfes, de la graine du lin, des graines du coing, du ciste, hippociste, ne sont pas de moins d'efficace. Dãs vn, deux, ou plusieurs desdits suc nous infuserons les fueilles, ou la graine, ou la racine de nostre thymelee, en conuenable dose l'espace de vingt quatre heures, plus ou moins, laquelle infusion pourra estre donnee sans danger aucun: on pourra faire la mesme infusion, dans le lait de cheure, ou d'asnessé, ou dans la mesgue. Aucuns chastient la vehemence de la *thymelea*, avec le feu, reduisant les fueilles & racines en cendre, laquelle ils baillent incorporee avec des figues, ou prunes, ou farine d'orge, &c. mais telle preparation affoiblit trop, voire en exclud du tout la faculté purgatrice.

Dioscoride dōne la partie interieure de vingt grains de la *thymelea*, avec la *polenta*, c'est à dire, la farine d'orge ou d'auoine: la mesme incorporatiō il faict avec les raisins secs, ou avec le miel, pour faire pillules ou opiates. Le semblable il faict des fueilles, qu'il commande de cueillir long temps auparavant, & secher à ombre, les faisant battre, pour en separer les nerfs & membranes, comme dommageables. Brief la poudre tant du fruiēt, que des fueilles, & racines de ceste plante, peut estre accommodee en mille façons, entre lesquelles ceste cy est aussi tres-assuree, à sçauoir les pillules formees de ladite poudre, avec le ius de coing ou de cormes, ou des cornes, ou des pommes & poires agrestes, & semblables fruiēts non encores meurs, lesquelles pillules ne cederont en rien aux cochees, aux arthritiques, & à vne infinité d'autres. Faut noter qu'à la poul-dre de la *thymelea* nous y deuons tousiours ad-iouster vn tiers ou au moins vne quatriesme partie de l'origan, ou de l'absinthe, ou du poliot.

Nous auions de coustume de faire vn huile au village, qui prins par la bouche purgeoit les humeurs susdites sans accidens, & appliqué sur le ventre aux hydropiques, estoit de grand profit, lequel est faict selon l'ordonnance de Mesue comme s'ensuit. Faut prendre des fueilles de la *thymelea* ou *chamelea* cinq onces, lesquelles faut mettre tremper dans trois liures d'eau douce d'espace de 24. heures, ayant bouilli tout ensemble iusques à la consommation de la moitié, & l'ayant colé, faut adiouster huit onces d'huile

d'amendres douces, & faire derechef bouillir le tout iusques à la consommation de l'eau : on faict aussi vn vin tres-laxatif & vtile aussi pour les hydropiques desdites fueilles avec le moust, duquel nous parlerons en son lieu.

La *thymelea* se peut donner en poudre iusques à demy dragme ou deux scrupules en decoction, pourrons passer iusques à quatre scrupules, & quelquefois à deux dragmes, avec obseruation des circonstances.

De l'ellobore.

CHAPITRE X.



Est pas sans cause, si aujourd'huy ceux, qui entre les hommes, iugent plus exactement des choses, qui ne se meslent autrement de la medecine, s'esmerueillent avec plainte, de ce que nous auôs laissé l'vsage de l'ellobore, lequel les anciens ont tant cheri, & mesme Hippocrate qu'on ne trouue en ses œuures, aucun medicament si frequent, que l'ellobore. Les effets qu'a bon droit Hippocrate luy attribue, confirment la verité de ceste opiniô: l'ellobore dit-il, nettoye le corps de toutes superfluitez & corruption d'humeurs, purge les deux especes de la bile & la pituite, fort benignemēt & sans aucune violence: & par ce moyen il purifie la masse du sang, en quelque part que elle se trouue, voire aux parties les plus extremes du corps. Mesues, Medecin d'estoc & race royale
entre

entre les Arabes, soustient la benignité de ce simple contre ceux qui l'accusent d'une malignité & violence excessiue: Jean Costæus & Marnard commentateurs dudit Mesue confirment le mesme, par le recit de plusieurs experiences par eux obseruees: il est vray que Hippocrate craint grandement l'usage de l'ellebore à cause des conuulsions, & autres lamentables accidens, qu'il peut occasionner au corps: mais il faut remarquer, qu'Hippocrate n'a pas proferé cela, seulement de l'ellebore, ains aussi de tous les medicamens purgatifs de semblable puissance & vigueur, ce que monstrent les paroles qu'il adiouste, disant, l'ellebore est dommageable aux sains. Democrite n'en dit pas moins, en vne epistre qu'il escrit à Hippocrate son grand amy & Medecin, les paroles duquel sont telles: *Veratrum enim sanis datum mensi tenebras offundit, insanis autem valde prodesse consuevit.* Ctesius Medecin tresancien apres Hippocrate dict, que du temps de ses ayeulx, on n'osoit donner l'ellebore en quelque façon que ce feut, à cause qu'ils ignoroyent, non seulement le moyen de l'apprester, mais aussi le temperamēt & faculté d'iceluy: & depuis lors, on la sceu si bien corriger & preparer, que sans crainte d'aucun danger, il peut estre accommodé (cōme tres-bien tesmoigne Atyllius en Oribase) tant aux vieux, qu'aux ieunes, voire aux enfans, & iusques aux plus debiles.

Les herboristes depeignent deux principales sortes d'ellebore (combien que les plus modernes en ont decouuert plusieurs) le blanc & le noir,

L. 4. aph.
16.

Epistola
17. ab. epi-
stolarum
Hippocratis.
Oribas. libr.
8. l. 8.

L. 8. chap. 5.

noir: toutes les deux on treuve en ceste prouince, & principalemēt aux montaignes qui voisinent le Dauphiné & terre neufue, d'où elles peuuent estre transplantées en nos iardins, comme plusieurs autres plantes, afin que nous en puissions au besoyn, estre plus promptement & commodement secourus: car par la culture, elles sont rendues moins vehementes, ainsi que par icelle les fruiçts agrestes sont adoucis & rendus comestibles. Mesmes & les Arabes par le nom d'ellebore simplement pris entendent le noir: mais les Grecs avec Galen par iceluy entendent plustost le blanc: aussi c'est celuy qu'Hippocrate craint de donner, sans diligente preparation, tant de l'ellebore mesme, que du corps, & des humeurs, qui doiuent estre purgez par le vomissement: de laquelle Hippocrate entend seulement, toutes les fois qu'il mentionne simplement & sans addition l'ellebore. Et pource que le vomissement est beaucoup plus difficile, & par iceluy la vehemence du medicament est plustost descouuerte (s'il n'aduiet de la part du malade,) l'on a pour suspect l'ellebore blanc: pource que son naturel est, de purger la phlegme & la bile rousse, par la gorge. Quand à l'ellebore noir on l'estime, de moindre vehemence, pour autant que son naturel est de purger la bile noire & l'humeur melancholique, par en bas; laquelle purgation est beaucoup moins difficile, que celle qui se faiçt par le vomissement: & c'est celuy qu'on mande chercher en Anticyre, pour guerir les insensez.

Nous ne deuons craindre l'usage de l'un & de l'autre,

*Com. en
l'aph. 1. l. 3.*

de l'autre, lors que la necessité le requerra, pour-
 ueu que les corrections accoustumees & neces-
 saires, precedent tousiours, quoy que Mesue aye
 preferé le noir au blanc. Parquoy d'autant que
 l'ellebore blanc est plus facheux à l'estomach,
 que le noir, il le faudra corriger avec les choses
 stomachiques, & celles qui seruiron aussi pour
 abbatre sa chaleur: (car toutes les deux especes
 sont de temperament chaud, iusques au tiers de-
 gré, & plus outre.) Les premieres serót, l'oseille,
 la cichoree blanche, que nous appellons endiue,
 la cichoree sauuage, & toutes les especes, les
 prunes tant aigres que douces, & plusieurs autres
 semblables: les autres seront, l'escorce de citró,
 le ceterac que le vulgaire nomme herbe doree,
 la menthe, les roses seches, l'absinthe, les graines
 de la myrthe, la regalisse, &c. Adiousterons en
 troisieme lieu, les choses qui ont esgard au
 cœur, côme sont les fleurs cordiales & les fruiçts
 aussi, les semences de la pimpinelle, des oseilles,
 la graine des citrons, la melisse & semblables:
 lesquelles choses seront suffisantes, pour preue-
 nir les accidens qu'on pourroit craindre apres la
 prinse de l'ellebore non preparé: qui sont ceux
 cy, le mal de cœur, le vomissemēt, la suffocation,
 la syncope, & quelquefois le flux de ventre.
 Quant aux deux premiers, facilement s'eulteront,
 par les choses que dessus: la suffocation (qui est
 causee par labondance & emotion des humeurs,
 ne pouuans estre mis hors par les voyes, ny or-
 dinaires, ny extraordinaires) sera preuenue, tant
 par la preparation du corps, selon l'opinion &
 conseil

Li. 4. aph. conseil d'Hippocrate, que par l'attenuation & incision des humeurs cras & glutineux, que nous pretendons de purger. Le flux de ventre, ne semble pas estre causé par la prinse de l'ellebore blanc, le propre duquel est de purger par le vomissement: mais il n'est pas sans raison, que le medicament dedié pour le vomissement, purge quelquefois par le fondement, & au contraire, ie laisse les raisons de tels effets pour euitier prolixité. Quant à la syncope, le defect de la vertu, la conuulsion, la sueur froide & autres accidens, qu'on peut encourir pour auoir prins l'ellebore: à peine aduiendront-ils, pourueu qu'il soit donné avec les corrections & doses conuenables: car pour dire vray, il n'y a medicament de ceux que nous descriuons, qui puisse commodément estre donné sans les preparations desja mentionnees plusieurs fois, & non seulement ceux cy que nous pouuons appeller nostres, ains le rheubarbe que l'on vante tant amy de nature, l'agarie, le sené, en ont besoin, & d'estre tousiours dispensez & corrigez, à la discretion du sage & experimenté Medecin à l'vrgente necessité seulement.

Nous par le conseil de Mesue, prefererons l'ellebore noir au blanc, lequel accoinmoderons en plusieurs formes de medicamens: sçauoir est en pillules, en incorporant la poudre d'iceluy avec quelq vn des sues cy dessus mentionnez: en opiates, avec le miel ou le vin cuit, ou bien avec le rub des raisins: & finalement en breuages, le faisant bouillir avec les susdits correctifs, adloustant

adioustant à la decoction conuenable, quantité de miel ou de vin cuit, pour la conseruation ou la faueur.

Ne faut pas oublier que selon la verité & le L.7.ch.27. tesmoignage d'Oribase, l'ellebore subtilement puluerisé, purge avec plus grande vehemence, que quand il est mis en poudre grosse.

Hippocrate, qui a célébré ce medicament sur tous les autres, prenoit les petites racines d'iceluy (car elles sont seulement en vſage) combien que nous ne craignons point d'employer aussi les feuilles, lesquelles il fichtoit en mode de giroffes, dans vne raue, ou refort, par l'espace d'un iour: laquelle raue, ayant osté leſdites racines, il donnoit à son malade pour le faire vomir.

Nous qui n'auons pas le vomir tant en vſage, l'appreſterons comme dit est, ou si bõ nous ſemble, le meſſerons avec l'anis, (qui n'aguieres est cultivé en quelques iardins) la graine des pastinaques ſauuages, du percil, pour en faire la forme de medicament agreable au malade, peut eſtre aussi vtilement incorporé avec le ius de l'origan, du calament, du poliot & de l'abſinthe.

Quant à la doſe de l'ellebore, combien qu'il ſoit difficile d'en diſcerner, attendu la varieté des circonſtances, qui la rendent incertaine: toutes-fois, nous le baillerons ſuiuant la taxe qui en a eſté faiſte par les Medecins, tant anciens que Part. II. com. 1. de ratione vi- ſus in morbis acutis. modernes. Je n'ay peu remarquer en aucun lieu qu'Hippocrate l'aye limitée: laquelle Galen a néanmoins determinée, ſelon la mediocre euacuation, que nous expetimerons l'ellebore faite en plu

Cap. 134. en plusieurs. Dioscoride le baille en dose d'une
lib. 4. dragme avec l'escammonee, Actuere prend jus-
Cap. 8. li. 5. ques à deux dragmes des petites fibres qui pen-
 dent des racines, lesquelles faict quelque temps
 tremper dans l'eau, apres ayant prins l'escorce &
 ietté les moëlle ou le cœur (que nous appellons)
 contenu dedás, faict secher ladite escorce à l'om-
 bre, de laquelle puluerisee avec l'oximel & le
 rub des raisins ou le vin cuit, faict de pillules, ou
 d'opiates.

Manard, imitant Dioscoride, prend vne drag-
 me de l'ellobore noir, deux grains d'escammo-
 nee (au lieu de laquelle nous prendrons nostre
elaterium) incorpore le tout avec la chair de
 coings, pour faire vne purgation facile & legere.
 Faut remarquer que lors que l'on donne l'el-
 lore blanc ou noir (ce que doit estre aussi en-
 tendu de tous les medicamens purgatifs) la dose
 doit estre augmentee ou diminuee selon la façon
 que l'on l'appreste: car en decoction ou infusion,
 il en faut beaucoup plus donner, en poudre la
 moitié moins.

Du turbith.

CHAPITRE XI.



Ntre plusieurs raisons qui m'ont es-
 meu de publier ma proposition, celle
 que ie bastis sur le turbith est des
 principales: car combien qu'il croisse
 en affluence en ce país de Prouence, mesme que
 les

les coustaux & montagnes, tant du terroir de la ville d'Aix, que des lieux circonuoifins, en font toutes couuertes: si est-ce que les droguiftes & groffiers de Marceille (desquels nos Apothicaires l'acheptent bien cherement) le vont chercher à grands frais & despens, en regions eſtranges. Les marchands de la baſſe & haute Bretaigne le viennent querir au bas Languedoc vers Montpellier & Niſmes, auquel païs s'ils ne la trouuoient, ſuis aſſeuré, qu'ils viendroyent querir le noſtre: & accuſeroyent la negligence de nous autres Medecins Prouençaux. Ie ſçay qu'on obieçtera, que la *thapſia*, de laquelle ie parle, n'eſt pas le turbith, qui eſt mis en œuvre aux boutiques de nos Apothicaires: mais ce m'eſt tout vn, pourueu que par experiences infallibles, & par le teſmoignage de quelques auteurs recens, de renommee non vulgaire entre les Medecins, ſoit notoire & manifeſte, que noſtre *thapſia* a les meſmes uiſſances de purger la groſſe & craſſe phlegme, que Mathiol attribue au tripolion, qu'il penſe eſtre le turbith. Car que nous doit-il ſoucier ſi nous auons ou n'auons pas les medicamens de diuerſe ou de meſme eſpece, que les eſtrangers: pourueu que nous n'ayons pas faute de ceux qui nous ſont neceſſaires. Meſue (auquel i'adiouſte plus de foy, qu'a tant de diſputes friuoles) nous deſcrit vn turbith, qui n'eſt autre que noſtre *thapſia*, laquelle nous eſtant ſi familiere, qu'il n'y a celuy, tant ſoit peu exercé en la cognoiſſance des ſimples, qui ne l'aye remarquee en pluſieurs endroits de ce païs: quelle

L. 2. ch. 2.

Cha. 129.
li. 4.

excuse aurons nous d'en auoir si long temps frustré nos Prouençaux, qui d'icelle deuoyent auoir l'vsufruit, & en iceux faisans la medecine, de nous estre seruis d'un simple, qui nous est totalement incogneu: car les ecorces ligneuses, qu'on nous apporte des parties Orientales, quoy qu'on les die estre les racines du tripolion de Dioscoride: neantmoins Costaus recite par le rapport des marchands grossiers, qu'on les tire d'une plante qui a les fueilles semblables à la myrthe: tellement qu'il estime que ne sont autre chose que les racines du tithymale appelé *mirsinités*, duquel nous auons aussi en abondance par tout ce pais.

Nous vsurons donc de nostre turbith à mesme fin & intention, qu'auons tousiours mis l'estrager en besongne, à sçauoir pour purger l'humour phlegmatique, non seulement de l'estomach, & consequemment de toute la premiere region interieure du corps, mais aussi de la poitrine, & des parties les plus esloignees: estans asseurez qu'il n'y a medicament purgatif, & ainsi ledict Mesue, plus propre à la guarison des gouttes, & toutes maladies articulaires: bien est-il aucunement ennemy de l'estomach (comme sont tous autres medicamens semblables.) Ce que nous est signifié par certain mal de cœur, & subuersion d'iceluy, qu'il engédre souuent, principalement lors qu'il est prins sans preparation conuenable: lesquels accidens estans (selon mon aduis) occasionnez par vne infinité de vapeurs & flatuositez mordicantes, lesquelles excitent la
chaleur

chaleur agissante, en vne humidité superflue, seront facilement preuenus, avec les corrections & moderations, tant de ladite chaleur, que de l'humidité: ioint aussi que ce simple est de fort tardieue operation, & de long seiour dans l'estomach, à cause qu'il est de substance crasse & terrestre. Les Medecins apres Mesue le hastent avec le gingembre, mais nous qui (comme dit est) ne voulons sortir de nos limites en faisant la medecine, en ferôs autant avec la sadreye, le serpoillet, l'hysof sauage ou domestique, & vne infinité d'autant d'efficace que le gingembre, & toutes les sortes du poiure. Contre le trouble de l'estomach, nous auons aussi beaucoup de choses stomachiques auparauant mentionnees, entre lesquelles l'absinthe, la menthe, l'anis, la mariolaine la menthe sauage, tiennent le premier rang. Contre la chaleur excessiue, nous pourrons prendre quelque vne des choses refrigeratiues, qui ne sont ennemis de l'estomach. C'est pourquoy vn Medecin Iuif, allegué par Mesue, prenoit vne partie de la thapsia, demie partie de gingembre, lesquelles choses il incorporoit avec le ius de coings desseché, d'où il faisoit vne medecine tres-assëuree pour les intentions susdites: au lieu duquel gingembre (comme auons dict) nous auons nos aromatiques tres-bons correcteurs.

I'auois de coustume, & avec heureux succès de l'administrer au village en ceste sorte: ie prenois vne dragme & demie, & quelquefois deux de nostre turbith, des fueilles de la ruë, de la

fadreye , de chascune vne dragme , d'amandres douces , & de coings confits au miel , ou au vin cuit , de chascune vne demy dragme : desquelles choses bien meflangees , ie faisois vne dose qui purgeoit sans violence, ny emotion fascheuse au patient.

Quand à la dose il est difficile de la limiter pour les raisons auparauint deduites , toutes-fois nous suiurons la mediocrité , tant que sera à nous possible : nous conformant à ce que les anciens en ont determiné , entre lesquels nous tenons Mesue vn des plus dignes auquel on adiouste foy , lequel donne de la thapsia en poudre d'une dragme iusques à deux , & en decoction de deux iusques à quatre.

De la flamme ou glaycul.

CHAPITRE XII.



Ioscoride décrit vne sorte de glaycul puant & sauuage , de laquelle nostre intention n'est pas de parler , aussi n'est-il au rāg des purgatifs, desquels seulement nous auons dressé ce petit traitté , ny aussi en auons nous aucune experience. La flamme donc, ou iris , ou glaycul , duquel nous pretendons tirer quelque medicament pour l'vtilité de nos compatriotes , est celuy que nous voyons aux iardins: ausquels estant vne fois tant soit peu enraciné , il pullule si bien , qu'il n'a besoin de culture,

culture , pour se presenter avec leurs couteaux
 verdoyás, accompagnez d'une infinité de belles
 fleurs, enrichies de diuerſes couleurs, d'où on
 luy a impoſé le nō de l'arc en ciel, qui fut donné
 aux hommes, iadis en ſigne de la paix & alliance,
 que Dieu auoit faiſte avec eux. Je ſuis eſbay, &
 confeſſe n'en ſçauoir la cauſe, pourquoy Dioſco-
 ride l'a mis au premier liure, tout au premier cha-
 pitre : auquel liure il parle principalement des
 ſimples aromatiques, ſi ce n'eſt qu'il le vueille
 nombrer entre pluſieurs ſimples de bonne &
 ſuaue odeur, ou pluſtoſt comme fidelle cōſerua-
 teur de toutes odeurs plaiſantes, lequel les per-
 fumeurs mettēt pour fondement & baſe de leurs
 pommes, oyſeaux de Cypres & autres ſenteurs :
 autrement ie dirois qu'il doit eſtre logé au qua-
 triēſme liure des ſimples en Dioſcoride, qui eſt
 totalement dédié aux medicamens de meſme
 genre, que ceux que nous mettons en ce cathalo-
 gue. Afin donc que noſtre iris, ne ſemble croiſtre
 en vain dans nos iardins, nous taſcherōs de l'ac-
 commodier pour la purgation de la bile & de la
 pituite, (auſquelles humeurs il eſt dédié, ſelon
 Oribaſe) il eſt auſſi eſtimé médicament hydro-
 rique, c'eſt à dire purgeant les eaux, & pour cela
 on le baille couſtūmieriement aux hydropiques.
 Et d'autant que ſans preparation ſeroit difficile
 qu'il puiſſe eſtre ſupporté, & principalement le
 noſtre qui ſurmonte en acrimonie & vehemen-
 ce, celui de Florence : perſonne ne doit eſtre ſi
 mal aduiſé, que de le prendre ſans preparation.
 On n'a pas de couſtume d'vſer des fleurs & ſueil-

Cap. 27.
 lib. 7.

les du glayeul, quoy qu'on le puisse aussi reduire en toutes formes de medicamens, pour la purgation des humeurs que dessus: & pource que nous n'en auons fait encores aucune preuue, nous suffira pour le present prendre la racine, de laquelle pourrons faire breuuages, opiates, ou pillules & encores de tablettes. Le premier moyen, donc, sera par decoction, prenant cinq ou six dragmes & iusques à vne once, plus ou moins, selon l'exigence, la faisant premierement tremper la moitié d'un iour dans le vin blanc, où le vinaigre, & bouillir avec conuenable quantité d'eau, adioustant aussi quelque peu de nos aromatiques: & à la fin de la mediocre ebullition, & colation meslerons quelque peu de miel rosat ou de resiné, ou bien de vin cuit à perfection. La mesme potion se pourra aussi faire en exprimant le ius de ladite racine, duquel broyerons la quantité de deux à trois dragmes, avec la mesgue, le miel, & quelque peu de suc de coings, ou d'autre fruit stiptique.

L'opiate & les pillules s'appresteront de la mesme racine sechee à l'ombre & mise en poudre, incorporee avec moins de vin cuit, pour faire vne masse de pillules, ou avec plus grande quantité d'iceluy, pour la rendre en consistance d'opiate, de laquelle on en pourra prendre iusques à demy once, qui sont quatre dragmes, avec quelque decoction conuenable.

Les tablettes seront formées avec le miel cuit à perfection, comme on a de coustume faire en ce pais le nogat, adioustant en apres la poudre susdite

sufdite, en telle dose, qu'on faict les tablettes
avec le sucre. La dose de ceste racine, selon Me-
sue, est de six dragmes au plus, laquelle neant-
moins doit estre limitee, selon la forme que le
medicament sera exhibé: car en poudre il en faut
beaucoup moins donner, que en decoction &
en infusion seule, sans expression, plus qu'en
routes.

Du sureau, & hieble.

CHAPITRE XIII.



L n'y a ancien ou moderne herbori-
ste, qui ne nous descriue vne infinité
de moyens, pour accommoder toutes
les especes du sureau, à la necessité
des hommes: duquel les vns en façonnent de re-
medes seulement pour alterer, comme Galen, Liu. 15.
Oribase, les autres en font de confectiions en
toutes formes, pour purger les eaux, la pituite
tant tenue que crasse, comme Dioscoride & avec
luy André Mathiol. Dioscoride faict seulement L. 4. chap.
168.
deux especes de ceste plâte: l'une qu'il appelle en
sa langue Grecque *acte*, l'autre *chamaacte*. La pre-
miere est celle que les François nommēt sureau,
les Latins *sambucus*, desquels nous auons retenu
le nom sambuc: de cestuy cy Mathiol faict trois
especes, vne sauage laquelle croit par les mon-
raignes, l'autre domestique, la tierce aquatique.
Nous vserons du domestique, à cause qu'il nous
est plus en main, quoy que toutes les trois ayent

mesme vertu. Le *chamaecte* de Dioscoride est plustost herbe que Arbrisseau, & n'est autre que celle que nous appellons en François hieble, en Latin *ebulus*: le vulgaire en Prouence la nomme dooulgues, toutes ces especes sont assez familiares & cognues d'un chacun: mesme que plusieurs des rustiques, mettent l'hieble en besongne, pour leurs purgations, ignorans possible que le sureau a mesmes puissances, de purifier le corps, de la bile, de la pituite, & des eaux: de sorte qu'on ne scauroit trouuer aucun medicamēt plus vtile pour la guarison de l'hydropisie & des gouttes, que l'une & l'autre espece. Quand au sureau on met en vſage les fueilles, les fleurs, la graine & la moyenne escorce: mais de l'hieble, nous pouuons aussi prendre les racines, desquelles avec Mathiol. exprimerons le ius, pour d'iceluy faire de trochisques, dediez aux susdites intentions. Ceux qui ont voulu experimenter tant l'un que l'autre, sans preparation, ont recogneu, qu'ils sont molestes à l'estomach: car ils prouoquent le vomissement, & principalement le suc tiré de l'escorce tant de l'une que de l'autre racine: on pourroit faire par infusions des fleurs du sambuc, avec le miel, vn sirop, qui purgeroit leſdites humeurs sans vehemence. Dioscoride prend les gettons tendres de l'un & de l'autre, leſquels il faiſt cuire en faſon des herbes potageres, laquelle decoction il donne pour euacuer leſdites humeurs. De la racine aussi de l'hieble cuite avec le vin, il faiſt vn medicament, qui n'a son pareil pour la cure des hydropiques. Dauantage, la
graine

graine de toutes les deux especes, seche & mise en poudre, prinse avec le vin blâc, en dose d'une dragme ou quatre scrupules, plus ou moins, faict mesme operation: la mesme poudre peut estre reduite en forme d'opiate, avec le miel, le vin cuit, le refiné, ou en masse de pillules, avec le vin blanc, le ius d'absinthe, de menthe, de l'iuamoscata & autre à ceste intention conuenable: adioustant tousiours quelque portion des choses qui remparent l'estomach contre les offences, à quoy seruent de beaucoup les aromatiques de ce país.

De la brionia ou coluuree.

CHAPITRE XIII.

COmbien que la *brionia*, que les Latins appellent *vitis alba*, les François la coluuree, ou feu ardent, soit vn simple tres-frequent, tant aux montaignes, que aux país bas de ceste prouince, & qu'elle croist au long des chemins, & principalement aux hayes des iardins & vignes: si n'est elle que des herboristes cogneuë, & de quelques femmes qui la recherchent curieusement, non pour la dedier à la purgation, ains plustost pour en faire vn fard, tres-accommodé pour l'embellissement de la face, & pour esfasser les taches & cicatrices des playes, à quoy elle est excellente, si au ius de sa racine on mesle la farine de febues, ou des pois

ciches, & en est faict vn liniment, pour l'appliquer sur le visage ou sur toute autre partie. Il est certain que de ceste plante, comme aussi de toutes celles que nous descriuons en ce traitté, on en pourroit sortir plusieurs remedes, à plusieurs & diuerfes intentions vtils, mais nous nous arres-
 tons seulement aux purgations.

Litt. 6. des
simples.

Quand à nostre *brionia*, si nous voulons croire Galen, lequel Oribase & Paul Æginette imitent totalement, elle n'a besoin d'aucune correction: tant s'en faut, que selon le tesmoignage de Paul Æginette, pour fortifier l'estomach, on mange les gettons tendres: lesquels pour estre quelque peu adstringents, & moderement chauds, sont audit estomach tres-aggreables. Sa racine aussi (laquelle nous voulons principalement mettre en ieu) n'excede en aucune qualité, selon le tesmoignage de nostre Galen, lequel luy attribue vne vertu abstersiue & desiccatiue, iointe avec mediocre chaleur. Estât ceste proposition vraye, qu'en aucun medicament, qui n'est moleste à l'estomach, ne peut auoir lieu la violence ou vehemence: nous concluons qu'en la *brionia* n'y a point de vehemence, & par consequent la correction ne luy est point necessaire.

Toutesfois Mesue, qui a mis ceste plante au rang (apres Galen) des simples laxatifs, la confesse reuestue d'une acrimonie & mordacité, facheuse à l'estomach, disant avec Dioscoride que la *brionia* est chaude & seche, iusques au troisieme degre, (combien que Dioscoride n'assigne aucun degre de temperament en icelle.) On ne doit

ne doit (dit-il) vser de la vigne sauuage (car ainsi appelle-il la *brionia* pour la similitude, que ses feuilles & tendons ou capreoles, ont avec la vigne domestique) en breuuage: à cause qu'elle porte nuisance à l'estomach & au foye, si ce n'est qu'elle soit meslee avec quelque poudre aromatique, ou mastic, ou pommes de coing, ou autres choses adstringentes & confortatiues. Quand aux choses de la medecine, qui consistent plus en pratique & experience, qu'en discours philosophiques, nous deuons plus croire à nostre propre sentiment, qu'aux opinions d'autrui: voire des plus signalez, qui comme en ce faict, bien souuent au recit des autres asseurent de choses, que eux mesmes n'ont iamais experimentees.

Nous en goustant la *brionia*, (car il n'y a aucun sentiment plus fidele, pour iuger des qualitez manifestes des simples, que le goust) auons aperceu vne grâde acrimonie, coniointe avec vne amertume insigne & remarquable: d'où nous est signifié, qu'il n'y a point de mediocrité en sa chaleur. Les accidens aussi que nous auons quelquefois remarquez, par vne seule prinse de deux dragmes, en personnes rustiques, asseurent ceste opinion: car si au preallable nostre *brionia* n'est bien apprestee, & bien melangee avec ses correctifs, elle cause vne grande subuersion d'estomach, testifiee par l'excessif vomissement, elle excorie le ventricule, & les boyaux, elle rend les yeux tous esblouys, & la veüe ofusquee: lesquels symptomes (a mon aduis) ne procedent d'ailleurs que de la qualité mordicante de la *brionia*:

comme les deux premiers, ou bien des fumées & vapeurs, pénétrantes iusques au cerueau, qui sont excitées & multipliées dans le ventre, lesquels accidens facilement seront euités, moyennant les corrections accoustumées.

Quant aux parties de ceste plante, nous ne treuons point que les auteurs ayent mis en besongne, pour les purgations, que la racine, de laquelle le ius qu'en peut estre copieusement exprimé, (car elle en est bien pleine) est fort propre pour purger la pituite superflue, tant du cerueau, que de l'estomach & de la poëtrine, & (selon le tesmôignage de Mesue apres Dioscoride) de toutes les parties nerueuses: & de la viêt qu'elle est conuenable médicament aux epileptiques, aux asthmatiques, aux arthritiques, &c.

Nous pourrôs donc donner, sans danger d'aucun symptome, le ius de la racine de nostre *brionia*, bien & duëment meslangé, avec la poudre subtile, de l'origan, de la mariolaine, de l'hyfop, du fœnouil tortu, (que les apothicaires appellent *seseli mactiliense*) de la menthe, de chair de coings non cōfîts, & autres fruiçts astringents & stipitiques: desquelles choses pourrons faire telle forme de médicament que bon nous semblera, soit liquide, en consistance d'opiate, en incorporant lescrites poudres & le ius avec quelque portion du miel, ou du resiné, ou solide, en prenant seulement lescrites poudres tres-subtiles avec le seul ius de la *brionia*, auquel sera aussi vtile d'adiouster quelque goutte de vin. I'aüois de coustume de faire de tablettes en forme de nogat, de la
poudre

poudre faicte de ceste racine par long temps sechee a l'ombre, avec le miel, au preallable cuit à perfection, ce qui se peut aussi faire du ius.

La dose de ce medicament est plus ou moins augmentee ou diminuee, selon les parties que l'on veut donner: car du ius, Mesue ne passe pas deux dragmes, & de tout la racine il en donne iusques au poids de deux escus.

De la laureole.

CHAPITRE XV.



Açoit que Dioscoride, Pline & quelques autres herboristes anciẽs, mettent la laureole entre les purgatifs, si est-ce que Mesue (lequel i' imite volontiers) ne le nombre point en son catalogue des simples dediez aux purgations: aussi en laisse-il plusieurs autres, que la posteritè a depuis experimentez, pensant auoir satisfaiet à son intention; d'en auoir descrit vne trentaine des plus signalees & familiares qui fussent de son temps en vsage: & pource que ie n'auois point aussi de preuue de sa faculté purgatrice, elle fust passée sous silence, ne fut qu'un rustique villageois de Lambes, m'en apporta vne bràche, de la laureole masle, de laquelle (comme-il m'asseura) luy & toute sa famille s'estoyent purgez ceste annee, craignans la peste: & mesme qu'il m'asseura, qu'il auoit esté guari de la fieure quarte, par l'vsage

l'usage de la decoction des fueilles d'icelle. Bien est vray qu'il confessoit, que la prinse de demy once ou enuiron desdites fueilles, luy caufoit quelques accidens & symptomes tres-molestes, comme sont le vomissement, le mal de cœur; & quelquefois la syncope: lesquels, suis asseuré, il eusse euitez, par la correction du medicament, & par l'observation des circonstances, que l'habile Medecin remarque en toutes ses operations.

Ce simple croit principalement aux montaignes, & par le rapport de plusieurs, s'en trouue copieusement au bois de Valbonette. Quoy qu'il en soit nostre Prouence en est pourueüe en plusieurs endroits, mesmemēt aux montaignes, d'où facilement nous la pourrions recouurer, n'estoit que nous en auons plusieurs autres de mesme vertu que celle cy.

Les racines selon Dioscoride sont inutiles, tellement qu'avec luy nous n'vserons que des fueilles & des graines ou bacees, desquelles le mesme Dioscoride, baille iusques à quinze, pour purger la pituité par le fondement. Il est certain que sa vehemence sera d'aussi facile correction, que celle des autres medicamens cy dessus mentionnez, & d'autant qu'elle est d'un temperament tres-chaud & sec, tesmoigné par son acrimonie, nous abbatrōs l'impetuosité procedante de telle qualité, par les choses refrigerantes stiptiques, qui arresteront aussi sa vitesse, adioustant celles qui peunēt humecter ensemble en refroidissant, pour auoir esgard à la secheresse, qui est en elle iusques au troisieme degré. Les premieres serōt
les

les fruicts agrestes , les pommes des coings , les prunelles de l'aubespain, &c. Les autres , les laitues, les oseilles, le pourprier, le nombril de venus, les graines des melons, &c.

Pour euitier la syncope , meslerons quelquevn des simples cordiaux, comme l'escordium, la melisse, le chardon benit , la pimpinelle, &c. Pour auoir esgard à l'estomach , adiousterons la menthe, l'absinthe, &c. Et de ces choses bien & deuëment proportionnees & meslees , pourrons faire decoctions avec l'eau, opiates avec le vin cuit, le resiné, le miel, ou pillules avec le ius d'absinthe, le vin ou autre accommodé à nostre intention.

Quand à la dose de ce medicament nous la diuiserons selon la forme du medicament que nostre intétion sera de faire: car en decoction pourrons dōner iusques a cinq ou six dragmes desdites fucilles , en pillules ou opiates , ne passerons pas deux dragmes : combien que quelquefois se presentent de circonstances , qu'il faut augmenter ou amoindrir lesdites doses,

Du pied de veau.

CHAPITRE XVI.



Le pied de veau, que les Apothicaires appellent *iarus*, les Latins *dracunculus*, ou *serpentaria minor*, des Prouençaux segueirons ou fugueirons , ie m'asseure, seroit en vsage pour la purgation de la phleg

la phlegme , tout ainſi que les femmes ont de couſtume de ſ'en ſeruir pour embellir la face: meſmement de la racine tres-belle & blanche, de laquelle elles compoſent vn fard, qui n'eſt de peu d'efficace. Je ſçay bien que les Grecs, comme Dioſcoride, Galen, Oribafe, &c. ne luy attribuēt point de faculté purgatrice, combien qu'ils la tiennent propre pour nettoyer, abſterger, & ouurir les opilations, des entrailles, mais ce ſont d'eſſaiets differens à la purgation, pour laquelle Meſue, & Pline l'eſtiment tres-vtile: à l'imitation deſquels i'en ay voulu faire quelque preuue, & le mettre à mon catalogue. Ioint auſſi qu'il eſt vn ſimple ſi frequent & cogneu en ce païs, qu'il n'y a perſonné, entre les plebees, qui ne le cognoiſſe fort bien: car il croit quaſi par tout, tant aux foreſts qu'aux lieux proches des villes, aux hayes des vignes & iardins, & cōbien qu'aucuns commandent de la cueillir au Printemps, les autres à l'Automne, ſi eſt-ce qu'il ſe trouue touſiours tres-verdoyant & en toutes les parties de l'annee, meſmement en ce païs temperé: veu auſſi qu'il ſe nourrit entre les buiſſons, & les hayes viues, deſquelles il ſe pare & defend au froid & neges.

Quant à ce qu'on met en controuerſe de ſa faculté purgatrice, à cauſe que Dioſcoride ne l'a pas mis au rang des purgatifs: il en faut plus croire à l'experience, qu'à tout autre teſmoignage, laquelle nous a monſtré qu'il purge la pituite tant craſſe que ſubtile, ſans aucune impetuoſité, tellement qu'à peine a-il beſoin de correction.

Galca

Galen estime que la racine de ce simple est comestible: mesme qu'il n'a pas hôte de dire, qu'elle se mäge comme les naueaux. Ce que combien qu'il entende de l'aron (ainsi appelle-il le pied de veau) qui croit en Cyrene, si est-ce que nous en pouuons autant dire du nostre, pourueu qu'il soit appresté, à la façon que ledit Galen l'enseigne: laquelle chose les vilageoises ont desja commencé d'experimenter aux pourceaux, lesquels elles nourrissent en partie de ceste racine bouillie, principalement au temps de l'hyuer. Et pour ce que nostre pied de veau est fort acre (comme le goust nous tesmoigne) par laquelle acrimonie il pourroit estre nuisant à ceux qui ont l'estomach & le foye imbecilles, nous ne l'exhiberons point que bien préparé, suiuant ce que Mesue nous en laisse par escrit, avec le miel, le vin cuit, le rob ou rub de raisins, ou de pruneaux, sans omettre quelqu'une des choses aromatiques, ny les stomachiques adstringentes. Par ainsi nous prendrons trois onces de ceste racine, laquelle en premier lieu lauerons avec le vin, en second lieu la battons long temps dans le mortier de marbre avec le pilon de bois, & l'ayant passée par le tamis à la mode de la casse extraicte, adiousterons à icelle trois dragmes de menthe bien puluerisée, & vne dragme & demy d'absinthe, avec quelque peu de ius de coing, ou d'autre fruiet astringent: ferons vne opiate avec la quantité requise du miel ou du vin cuit, qui en la quantité de trois dragmes ou demy once, purgera fort bien lesdites humeurs, tant de l'estomach

Liu. 6. des simples.
L. 2. de la puissance des simples.
Liu. 2. ch. 24. des med. simp. purg.

& de la poitrine, que de la teste & des iointures, & de toutes les parties du corps. De la mēme racine nous pouuons faire de breuuages, la faisant bouillir en l'eau avec ses correctifs, d'icelle aussi sechee à l'ombre & bien puluerisee avec lesdits correctifs, ferons vne masse de pillules, formees avec le ius d'origan, d'absinthe, de saulge, &c. de laquelle quatre scrupules, purgeront fort bien & sans violence aucune. Les fueilles de ce medecament n'en feroient pas moins, voire aussi les graines, quoy que les auteurs n'vsent que des racines.

De la geneste.

CHAPITRE XVII.

L. 2. c. 152.



Lest vray semblable que les genestes de ce païs sont differentes à celles d'Espagne, pource que d'icelles (selon Dioscoride) ils en tirent de quoy faire chordes aux nauires, & à faire souliers & vestemens aux bergers, ce que ne pourrions faire des nostres, qu'avec grande difficulté: toutesfois elles sont semblables en vertu purgatrice, car l'experience nous a souuent faict voir, que les fleurs des nostres purgent par le vomissement, & les graines par le fondement, quoy qu'aussi excitent le vomir. J'ay bien voulu les adiouster en ce catalogue, tant pour leur familiarité en ayant les plus ignares la cognoissance, que pour autant, que ce simple est vn des plus asseurez

rez medicamens pour la purgation, que nous ayons en ce païs: tellement qu'il n'y a contree là où on ne le trouue, tant aux montagnes qu'au bas païs. Il est certain que si le vulgaire auoit cogneü la vertu purgatrice des fleurs & graines de ce simple, que tout ainsi qu'on les confit au vinaigre, comme les capres, pour faire venir les fleurs aux femmes, ils l'employeroient aussi aux purgations, plustost que plusieurs autres, qu'ils ne sauent donner sans accidens scandaleux: car les actions de cestui-cy ne sont point ou peu molestes au corps.

Nous n'auons remarqué en ce païs que deux sortes de la geneste, l'une qui est grande, de laquelle les verges sont assés longues, & sans fueilles, laquelle est tres-frequence en la basse Prouence, combien qu'on en despopule bien fort le terroir d'Aix, quoy que ce simple ne face iniure à personne: car il n'occupe que les lieux incults, arides & steriles, l'autre est beaucoup moindre, de laquelle les virgules, sont beaucoup moins longues, & moins rondes, vestues de quelques petites fueilles: cestuy-cy (a mon aduis) ne croit qu'aux montagnes seulement. Toutes les deux especes ont la fleur iaune & la graine enclose dans vne gosse comme les phascoles, elles ont aussi mesme faculté de purger la phlegme, les eaux & l'humeur bilieux: outre ce qu'elles sont de grand efficace à l'ouuerture des opilations de la rate, & du foye, & à purifier & nettoyer les reins & la vessie de tous excremens, de prouoquer les euacuations menstruales aux femmes:&

les vrines à l'vn & l'autre sexe : lesquels effets sont hors de nostre intention, qui n'est autre que de parler des purgations.

De ceste plante donc, nous vserons des fleurs & de la graine, qui est comme la lentille, & semblablement des virgules & gettons tendres, au mois de May, desquels exprimerons le ius, qui estant mixtionné comme nous monstrerons, fera le mesme que les fleurs & les semences, & combien qu'on estime que lesdites fleurs & semences purgent par haut & par en bas, sans fascherie ny trouble : toutesfois, l'experience nous a plusieurs fois faict voir, qu'elles sont aucunement fascheuses à l'estomach. C'est pourquoy Philagrius les bailloit avec le mastice & les roses : mais d'autant que nous ne voulons chercher aucun médicament hors de nostre prouince, dans laquelle le mastice ne se trouue point, (par nostre faute toutesfois, & negligence de cultiuier les lentiscles, d'où il est tiré, ou plustost, de ne scauoir le moyen de le faire, depuis que nous auons lesdits lentiscles autant bons que scauroyēt estre ceux de l'Isle de Cyo.) A iceluy donc nous substituerons quelque vne des choses adstringentes, corroboratiues de l'estomach, si souuent mentionnees.

Et par ainsi nostre geneste estant capable d'estre meslee & accommodee, en telle forme de médicament que bon nous semblera; en premier lieu nous ferons vn sirop laxatif, des infusions des fleurs en la decoction des rameaux tendres & summitez du lentiscle, de la mirthe, de la menthe,

menthe, de la sauge, sadreye, &c. & de quelques prunes tant aigres que douces, lequel syrop sera plus ou moins laxatif, selon que lesdites infusions seront multiplies.

Les opiates ou pillules laxatiues, se pourront faire des poudres, tant de la graine que des fleurs de la geneste, les opiates, dis-je, avec le miel, le refiné, le vin cuit, les pillules avec le ius des poires, des coings, ou bien de quelque herbe accommodee à nostre intétion, & tres-commodement avec le vin blâc ou le cleret. La graine du genest dōnee en poudre aux hydropiques en dose d'une dragme ou de deux au plus, avec le vin cleret ou blanc, ou avec quelque decoction aperitiue, purge les eaux par le fondement. Quant au ius que nous pouuons tirer des virgules du genest, en meslerons certaine quantité avec la chair des coings, des pommes agrestes ou des corneilles, ou des cormes, le tout cuit avec le miel, ou le vin cuit, pour le reseruer à la necessité.

La dose de ce medicament pourra estre, quand aux fleurs de deux dragmes iusques à cinq: & quand aux semences, de deux iusques à quatre, lesquelles doses seront augmentees ou diminuees, selon les moyens de l'administration & autres circonstances que le seul Medecin peut remarquer.

De l'Aristolochie.

CHAPITRE XVIII.



L n'y a pas vn auteur entre les Grecs, qui attribue à l'aristolochie la faculté de purger, qui est cause que quelques vns ont estimé qu'elle ne doit pas estre mise au rang des medicamens purgatifs. Toutesfois pour ne me despartir de l'autorité de Mesue (attendant d'en faire bien tost, aidant Dieu, la preuue) ie l'ay voulu renger avec les precedens : tant pour inciter quelqu'un d'en faire l'experience, que pource qu'elle croit abondamment en ce pais de Prouence. Le sçay bien que Paul Aeginette dit, que l'aristolochie clematis, c'est à dire qu'il a de petites branchettes, cōme celles des vignes, prinse avec la *mulsa*, en dose d'une dragme, purge comme la colochinte, mais en ce lieu là il ne parle point des autres especes. Le mesme auteur décrit aussi les vertus manifestes de toutes les especes d'aristolochie: mais des effets qui viennent de l'occulte puissance, n'en faict aucune mention. Aëce tesmoigne aussi que deux dragmes du fruiet de l'aristolochie clematis, purge la pituite & la bile.

Ceste espeece d'aristolochie (selon le dire de Mathiol) il se treuue fort rarement, & est cognüe de bien peu de gens, tellement qu'on ne la trouue point depeinte au commentaire qu'il a faict sur les liures de Dioscoride.

Quant

Quant à l'aristolochie ronde & longue elles se trouuent assés frequentes en ce païs, celle la croit le plus aux valles pleines de ioncs, & dans les prés qu'on n'arrouse guieres, ceste-cy dans les vignes, desquelles les vigneronns ne les en peuuent despeupler. A toutes les deux especes nous attribuons la vertu purgatrice de l'humeur pituiteux & bilieux: plus toutesfois à la ronde (de laquelle entend Hippocrate, quand il commande la donner aux pulmoniques) qu'à la longue.


Quant à ce qu'appartient à leur correction, semble n'estre point necessaire à aucune d'icelles: car tant s'en faut qu'elles endommagent aucune des parties internes, qu'elles en sont de beaucoup confortees & corroborées, & c'est ce qu'en dit Mesue, que l'aristolochie en purgeant, ne nuit point, & profite beaucoup aux parties principales, & signamment à l'estomach.

*L. des sim-
ples ch. 27.*

Entre toutes les especes d'aristolochie on estime la ronde la plus vigoureuse, de laquelle on tire beaucoup de commoditez (lesquelles i'obmetts pour n'estre trop long) outre la purgation: pour le regard de laquelle, puis que la longue nous est tant à commandement, nous la mettrons en besongne, & l'appresterons en toutes les formes de medicamens, la corrigeant toutesfois, comme auons cy dessus le pied de veau préparé. Sa dose sera en decoction iusques à trois ou quatre dragmes: en poudre incorporee avec le vin cuit ou le miel suffiront deux dragmes.

De l'oignon marin.

CHAPITRE XIX.

 Res que, selon la commune opinion, les oignons domestiques, soyēt aussi reueſtus de la vertu laxatiue: ce ne ſont pourtant ceux là deſquels noſtre intention eſt de parler en ce premier cathalogue, qui eſt ſeulement des medicamens qui ne ſe peuuent aucunement apreſter, pour eſtre capables de nourrir: entre leſquels l'oignon marin, que les Apothicaires appellēt ſcille, eſt de grande conſideration. Dioſcoride en faiēt de deux ſortes, qu'il diſtingue en deux diuers chapitres, l'vne eſt grande, laquelle nous entendons principalement par le nom de ſcille: l'autre petite que luy meſme appelle *pancratium*, toutes les deux ont meſme uiſſance, combien que la petite eſt de moindre vertu, elles ſont auſſi fort bien peuplées en ce païs principalement aux parties maritimes. Dioſcoride ne les a pas logees entre les purgatifs ſimples, au quatrieſme liure, quoy qu'il ne leur denie pas la vertu laxatiue: car d'vne partie de l'eſcille roſtie, & de huit parties du ſel auſſi roſti, en doſe d'vne à deux dragmes, il faiēt vn medicament qui purge le ventre ſans excès. Ce ſimple eſt de grand efficace, non ſeulement à preparer les humeurs cras & glutineux, & les diſpoſer à la purgation, mais auſſi à les purger & chaſſer hors du corps: le premier deſquels effets procede

procède (comme dit est) des qualitez manifestes, le second des occultes & spécifiques. Il y a deux façons de la preparer & la rendre facile les plus propres, qu'on sçauroit excogiter, & de moins de labeur: l'une qu'il la fait cuire l'envelopant dās la paste, ou d'argille, & mettre rotir au four, iusques à ce que ladite paste ou argille ont acquis vne crouste tres-dure: que si pour la premiere fois l'escille n'est renduë molle, il la faut enfermer encores derechef: l'autre est de la mettre dans vn pot de terre bien couuert & luté, au four chaud, iusques à la parfaite assation. Ces deux moyens de preparer l'escille sont les plus asseurez: car estant icelle administree ainsi, nous sauons qu'aucuns perilleux accideus, ne s'en peuvent ensuiure. La decoction n'est pas de moindre valeur, car soit que l'on vueille manger l'escille bouillie & biē cuite en l'eau, ou boire son bouillon, l'effet en sera tres-salutaire. Outre les susdits il y a d'autres moyens d'accommoder l'escille, & la rendre moins nuisible & moleste au corps, en la despouillant de son excessiue chaleur & acrimonie: car quoy que Galen la face chaude du second degré seulement, si est-ce que ses effets demonstrent, qu'elle passe plus outre, que du commencement du troisieme. De ce sont tesmoins les excoriations, qu'autres fois nous auons veu estre faictes par icelle: outre ladite chaleur elle est aussi reuestue d'une tenuité & subtilité de substance, toutesfois plus superficielle, que profonde.

*L. 8. simp.
med.*

La chaleur sera corrigee par les choses refri-

gerantes : celles qui avec la froideur ont l'astringtion coniointe, arresteront aussi la vitesse : parquoy en quelque forme qu'on la vueille bailler, soit en decoction, en pillules, ou en opiates, les preparations & corrections sont tousiours necessaires: de sorte que les correctifs tant ceux qui sont dediez pour l'acrimonie, & tenuité des parties, que les autres qui doiuent repugner à la superflue humidité de ce simple, doiuent estre mis en plus grande dose, lors que l'escille est administree sans coction, que quand nous la faisons premierement cuire, deuant que la mesler avec iceux.

L'escille donc mise en roelles & sechee selon l'art, pourra estre fort bien meslee & batue dans le mortier avec la sadreie, l'origan, le serpouillet, &c. de laquelle melange nous ioinurons avec le ius ou la chair des coings, des poires ou de quelque fruiet agreste, pour faire de pillules, ou bien avec le miel escumé ou rosat pour faire vne opiate.

La dose de ce medicament sera aussi diuersiffee, selon le moyen que l'on l'administrera : car en decoction, en donnerons iusques à demy once : en pillules n'excederons deux dragmes : en opiate, quelque peu dauantage que deux dragmes : mais de celle qui sera rostie, comme auons dit cy dessus en baillerons iusques à six dragmes ou plus.

Du chou marin.

CHAPITRE XX.



Ostre intention n'est pas de parler en ce lieu de toutes les especes des chous, quoy que toutes ayent puissance de purger: mais seulement de celuy qui se trouue au bord de la mer, ayant les fueilles semblables à celles de l'aristolochie ronde. Ceste espee n'est pas tant vulgaire que les autres simples desquels nous auons fait auparavant mention, à cause qu'elle ne croit qu'aux parties maritimes, meslee parmi le sablon de la mer. Dioscoride luy attribue vne insigne faculté purgatrice, mais il ne luy assigne point de propre & peculiere humeur. On fait à Montpellier vne composition, intitulee *electuarium de soldanella incerti authoris*: duquel le chou marin, qui n'est autre chose que la *soldanella*, est la base & principal ingredient. Cest electuaire est dedié à plusieurs maladies, & principalement à l'hydropsie: qu'est cause que nous attribuons à nostre *brassica marina* la puissance de purger par en bas les eaux: combien qu'elle euacue aussi les mucositez & la pituite, laquelle abonde plus aux gens maritimes, qu'aux autres hommes: qui nous doit de tât plus faire admirer la prouidence de Dieu, lequel a donné la varieté des remedes, accommodez à la diuersité des maladies, qui coustumierement adueniennēt, selon la varieté des lieux. Je suis esmerueillé,

ueillé que Mesue ne l'aye mis entre les purgatifs au liure des simples : possible qu'il ne l'auoit pas experimēté, combien qu'il deuoit adiouster foy, à ce qu'Hippocrate en a escrit au second liure de *dieta*, disant que le chou est chaud & purgatif de l'humeur bilieux. Autant en dict au liure des maladies internes, là où il commāde de le cuire, & d'iceluy cuit exprimer le ius, pour en donner la quantité d'un demy verre, à mesme intention que dessus. Il est certain qu'Hippocrate entend cela du chou marin, & non du domestique, car la vertu de purger qu'a le domestique, en legere decoction, est facilement translatee en l'eau: tellement que ledict chou tant s'en faut qu'il soit laxatif apres la decoction, que mesme il est adstringent, & vtile à restreindre (selon Galen) le flux de ventre.

b 44. 2.
alim.

Quant à nostre chou marin l'experience demontre assēs, qu'il n'est pas seulement purgatif en l'escorce, mais en son corps & dans ses parties les plus profondes & terrestres: tellement que la poudre d'iceluy est tres-laxatiue, tesmoin est ledict electuaire de *soldanella*, auquel elle est le principal & plus vigoureux ingredient.

Ce simple est bon à faire toutes formes de medicament, tant liquides & moyennes, que solides, & d'autant que l'experience nous a fait voir, & l'autorité de Dioscoride le confirme, qu'il est contraire à l'estomach, nous amāderons son acrimonie par la melange des choses stomachiques, stiptiques, refrigerātes, desquelles auōs fait plusieurs fois mention auparauant.

Hippo

Hippocrate le fait par l'ebullition, Dioscoride le corrige aussi par la coction avec la graisse, Li. 2.
diète. imitant en ce Hippocrate lequel ordonne de faire ladite coction avec la graisse des reins : & de là est venu que les Prouençaux font grand cas, des chous bouillis avec vne rougnonade, ainsi l'appellent-ils.

La dose de la *soldanella* ou chou marin est diverse selon la forme que nous voulons estre employee; car en decoction il en faudra donner de demy once à vne once, & quelquefois dauantage: en poudre pour les pillules sera assés de deux dragmes, voire aux plus difficiles, pour les opiatres iusques à demy once.

Me semble d'auoir assés prouué ma proposition en ce premier genre de medicamés, laquelle téd à cela que pour faire la médecine, il n'est ja de besoin que nous employons les drogues estrangeres, en ayant amené vne quinzaine pour temoins, la fidelité desquels a esté plusieurs fois approuué. Je ne doute point que si nous faisons vne enqueste, avec les diligences requises par tous les carrefours de ce país, nous n'en trouuissions beaucoup plus qu'il ne nous en faut. De sorte qu'en lieu que nous fussions contraints d'aller mandier les estrangers, que plustost nous aurions dequoy fournir aux Medecins moins curieux és autres prouinces, Car outre les susdits nous auós encores, le lait & les cimes des figuiers, l'herbe ditte *staphisagria*, qui est l'herbe des poux, l'escorce des capres, le chou sauage, la lie du vin, les écailles d'arain, la graine du rhamne, & vne infinité

finité d'autres que suis asseuré nous trouuerions en ce païs, lesquels sans aucune difficulté pourroyent estre aprestees pour nos purgations necessaires. Reste maintenant de cōfirmer la verité de ceste opinion, par l'experience des medicaments, lesquels tant s'en faut qu'ils ayent en eux aucune vehemence, d'où nous soyons contrainsts leur adioindre autres remedes pour les tenir bridez: que mesme, sans quelque chose qui esueille leurs facultez, ne font aucune operatiō qui vaille: & ce faisant, mōstrerons tousiours que la medecine pourra fort bien estre exercee en Prouence, sans l'aloés, sans la casse, sans les tamarins, sans le sebesthe, sans le rheubarbe, sans les myrobolans, & encores sans le sené: laquelle toutefois ie mettrois volontiers en ce catalogue, tant pource qu'elle est vn medicament si asseuré, qu'à peine est elle iamais exhibee sans effet & grand profit, pourueu que les occasions & circonstances soyent bien gardees, qu'à cause qu'elle est tousiours à bon marché: n'estoit que ie ne pretēs point sortir hors des limites que i'ay auparauant plantees. Je ne fais point de doute, q̄ si nous prenions peine de la transplanter & cultiuer dās nos iardins, elle ne cederoit en rien à l'orientale, de ce que (comme m'a esté referé par gēs dignes de foy) on a des-jà veu l'experience, par vne plante, qui est nourrie dans vn iardin, au terroir de la ville d'Aix. Toutesfois on nes'en doit pas beaucoup pener: d'autant que nous luy succedons la ptarmica des-jà bien experimentee & de mesme vertu.

Fin du premier Livre.



DES MEDICAMENS QVI

PVRGENT SANS FAIRE

aucune violence ou bien
peu au corps
humain.

LIVRE SECOND.

*De la diuision des medicamens en quelques
especes & differences.*

CHAPITRE I.



RISTOTE & toute l'eschole des ^{Prob. 43.} Grecs, estiment toutes les choses ^{sect. 1.} estre medicamens, lesquelles ou par exés de quelqu'une des qualitez manifestes, comme de chaleur, froidure, &c. ou par quelque inimitié naturelle, procedante de la forme specifique, sont plustost faictes pour surmonter & vaincre nostre chaleur naturelle que pour estre vaincues: tellemēt qu'ils attribuent le nom de pharmach, à tout ce que ne peut estre changé en nourrissement & en la substance du nourri, soit qu'il puisse profiter au corps, comme sont les medicamens, ou domma-ger, comme les venins, qui sont totalement ennemis de l'humaine nature.

La

Ch. 2. 1. 3.
de tempe-
ram.

Cap. 15. 16.
li. 3. simpl.

La diuision de Galen , quand à ce propos , est remarquable , & digne d'estre presceue à toutes autres , par laquelle il fait quatre differences de medicamens. La premiere est de ceux qui tant s'en faut qu'ils reçoient aucune mutation dans nostre corps, qu'ils retiennent tousiours leur naturel, l'alterent & le changent , tout ainsi que les alimens sont en iceluy alterez & changez. Tels sont ceux là que luy mesme appelle en sa langue *deleteria*, c'est à dire venimeux , seulemēt par leur quantité , & non de toute leur substance. De ce genre est l'euphorbe , l'opium, la cigue, la mandragore, le hiosciame , & la plus grand part des medicamens auparauant mentionnez ; laquelle faculté deletere, pource qu'elle procede des qualitez manifestes , est facile à corriger , tout ainsi que nous auons demonsté assés amplement. La seconde est de ceux qui ayāt prins quelque commencement de mutation en nostre corps, se corrompent & alterent eux mesmes , laquelle corruption en fin est cōmuniquée au corps, de sorte qu'il en reçoit de grands & insignes dommages. A ceux cy est aussi attribué le nom de deletere ou venin , mais autrement qu'aux premiers : car ceux là en quantité excessiue seulement sont tels, ceux cy de toute leur nature & en la moindre portion sont ennemis de la vie humaine, comme sont l'acoriēt , les cantarides , &c. De ce genre sont aussi les venins qui procedēt des scorpions, des serpens, des chiens enragez & de semblables animaux venimeux , comme aussi le venin de la peste. La troisieme espece est de ceux qui reçoivent

uent premierement l'action de nostre chaleur naturelle:& en apres agissent icelle,sans toutes-fois l'endômager en quelque chose: tel est l'absinthe, le melilot, la chamomille, l'origan, &c. En la quatriesme, sont colloquez ceux la, desquels les actions sont telles en nostre corps, & d'iceluy en eux mesmes,qu'en fin ne peuuent resister à nostre chaleur naturelle, sont contrainsts luy ceder & prendre tel parti que bon luy semble, c'est à dire se changer totalement en la substance de celuy qui l'elabore:& ce sont ceux que nous appellons partie medicamens,& partie alimens,comme sont les laictues, les prunes,pommes,&c.

De ces medicamens les vns alterent seulemēt & ne purgent point,les autres outre l'alteration, ont aussi la puissance de purger:& de ceux cy seulement nostre intention a esté de parler,& afin que selon leur vehemence ou imbecillité de purger, ils soyent plus methodiquement distinguez, nous noterōs que le mot de purgation est commun à tous les medicamens,qui peuuent causer l'expulsion des superfluitez hors du corps en quelque partie qu'ils soyent cachez & detenus:& de là vient, que les vns sont appelez cephaliques, qui purgent le cerueau de la pituite par les narines: les autres bechiques ou purgatifs des choses contenues dans la poictrine: aucuns diuretiques, excitans les vrines: plusieurs sudorifiques,qui purgēt la partie secrete & subtile du sang,par les meats de la peau. Ledit mot de purgation est attribué plus particulièrement

& par antonomasie, aux medicamens qui purgēt vniuersellemēt tout le corps, ou partie d'iceluy, par le fondement, ou par la bouche, lesquels les Medecins ont distinguez en trois ordres. Le premier est de ceux qui ont en eux quelque vertu & puissance estrange, & totalement aliene de nostre nature, laquelle estant assistee par quelques excessiues qualitez manifestes, peut estre corrigee, tout ainsi que telles qualitez se peuuent amender: & de ceux cy nous auons assés amplement parlé au premier liure. Le second cōprend ceux qui sont beaucoup inferieurs en vehemen- ce, aux premiers, comme est l'agaric, la fumeter- re la mercuriale, les centaures, &c. Le troisiē- me est de ceux, qui ne sont guieres differens des alimens, desquels est la manue les prunes, la mes- gue, le ius du coq bouilli & semblables. Et tout ainsi qu'au premier nous auons nombré ceux qui sans exacte correction ne peuuent ny doy- uent estre employez, ainsi auons deliberé dedier ce second liure à discourir des medicamens du second ordre.

De la frangula.

CHAPITRE II,



Ntre les circonstances qui empes- chent l'vsage des medicamens des- crits auparauant (pour estre iceux estimez d'vne vehemēce intolerable) les

les plus remarquables & principales sont, les forces, l'aage, la fieure continue & ardante, l'inflammation de quelque partie interieure, &c. l'obstruction aussi, &c. Au lieu desquels alors nous mettrés en besongne ceux qui seront nombrez cy apres, pour tousiours confirmer & admirer la providence de nature, laquelle a si bien eu esgard à la santé & conualescence des hômes, que pour faute de remedes il ne peut ny doit iamaïs estre delaisé sans secours, & mesmement en ceste tres-seconde prouince, qui a esté decorée & enrichie, de tant de diuersité de remedes, qu'il n'y a circonstance aucune, qui puisse empescher le cours de la medecine, & principalement aux purgations, lesquelles les Medecins peuuent moderer en tous degrez, aussi commodemēt, & voire beaucoup plus en ce païs, qu'en aucun autre. Car s'il est besoin de faire vne purgation abondante & copieuse ou medioere, soit pour purger legerement & avec toute facilité: ceste terre est par tout pleine des choses à ce requises & necessaires. Et pour commencer ce second catalogue, par les medicamens qui purgēt avec mediocrité, qui ne sont tant eslongnez de nostre naturel, que ceux du premier, ie mettray en teste la *frangula*, qui est vn arbre de medioere grandeur, ayant les fueilles semblables à celles du cornouillier, ou acuernier en Prouençal, ses fleurs blanches, son fruiēt petit, de la grosseur d'un pois. Ce simple a le bois fort imbecille, & frelle, facile à rompre, de laquelle facilité elle porte le nom de *frangula*. Ie l'ay voulu ranger

tout premier, pour la parangonner, & encores la preferer au rheubarbe, duquel, depuis le temps que les Medecins ont commencé de faire la medecine à la mode Arabesque, on a faict si grand conte, que ses loüanges sont maintenant espar- ses par toute l'Europe.

Le rheubarbe donc est tant estimé, tant pour- ce qu'il est des medicamens mediocres, purgeant sans violence, & avec confort & consolation des parties internes, que pource qu'il est amy du foye, de l'estomach, de la rate, & des autres par- ties naturelles, auxquelles il ne permet qu'aucu- ne opilation aye lieu: brief on le repute vn medi- cament conuenable à toutes maladies.

Nostre *frangula* n'a pas moins de pouuoir: car outre le tesmoignage de Mathiol, l'experience est certaine, qu'elle purge de la mesme façon que le rheubarbe, corroborât par vne moderee astring- tion, les parties interieures de nostre corps: & en outre elle les deliure & defend des opilations & obstructions, auxquelles sont le plus souuent subiettes.

Sa faculté naturelle est de purger la cholere & la pituite, laquelle puissance nous recognois- sons au rheubarbe, & Mesue la luy attribue aussi, & encores d'espuiser les eaux des Hidropiques, chose que le rheubarbe n'a iamais faict. La *fran- gula* a ce pouuoir principalement en l'escorce, de laquelle la partie exterieure est adstringente, & l'interieure laxatiue: ceste plante se treuve aux montagnes de l'haute Prouence en plusieurs en- droits: n'y a pas long temps qu'elle y a esté reco- gnuë,

gnuë, ie suis asseuré qu'on la trouueroit à la sainte Baume, & qu'elle pourroit estre cultiuee & nourrie par tout ce país mesme dans les iardins: tout ainsi que plusieurs autres tant arbres, que herbes, sont en iceux transplantez & bien entretenus.

Ie m'esmerueille, que depuis (comme dit est) le temps qu'il y a que le rheubarbe a esté en si grand pris entre nous, qu'on n'aye taché, d'en prouoir ce país, qui est vne region temperee, tout ainsi qu'on y cultiue maintenant les cannes à succe, les pistaches, les palmes, & plusieurs autres plantes estrangeres. Mais en cela nous auôs deux empeschemens principaux: l'vn est la nonchalance & negligence nostre, qui a faict que nous ne voulons ou n'osons adiouster rien à ce que nos predecesseurs ont inuenté: l'autre est l'impieté & meschanceté des barbares, lesquels trouuent si bon que nous n'employons presque autres drogues que les leurs, qu'ils ne nous mandent rien, qui ne soit adultere & corrompu. Il est certain que le rheubarbe en leur país est vne drogue de grand efficace, & à toutes les facultez desquelles Mesue l'a orné par ses escrits: mais celui qu'ils nous enuoyent est de fort peu de valeur, & la plus part, sert mieux à l'embellissement des cheueux des femmes, que pour autres medecines.

De ceste escorce donc prinse de nostre *frangula*, nous pouons faire vne decoction avec l'agrimonie, l'absinthe pontique, la cuscuta, les obelons, le romarin, le fœnouil, le percil, les

racines d'endiue, de laquelle donnerons cinq ou six onces, pour guérir la iaunisse, ouvrir les opilations, l'hydropisie & pour la bonne habitude à ceux qui sont pleins de mauuaises humeurs & cacochimés. L-dite escorce pourra aussi estre tres-commodement employee pour composer pillules avec vin blanc, le ius d'absinthe, de cicchorée, &c. ou opiates avec le miel, le vin cuit, le résiné, la chair des prunes, &c. ou tablettes, en adioustant la poudre au miel cuit à perfection, à la façon qu'on faiét le nogat. Sa dose en decoctiō sera de six dragmes à vne once, en pillules iusques à deux dragmes, en opiates plus de trois.

Des roses.

CHAPITRE III.



L n'y a lieu de s'esmerueiller, si aux choses qui consistent en l'experience, touchât nostre medecine, les anciens & ceux mesmes qui ont inuenté les sciēces. ont ignoré des effets & operations, que les modernes ont, ou par cas fortui, ou bien par deliberee recherche, decouuertes & pratiquees. Car quand à ce que concerne la generalité, personne de ceux qui font profession de nostre medecine, & qui sont dignes du tiltre de Medecin, ne doit ignorer, les propositions & documens, qui sont comme regles generales & infallibles: mais touchant aux choses qui consistent en experiences, qui ne s'estendent plus auant que de l'individu

l'indiuidu & particulier: est impossible qu'en ceste vie si briefue, & en vne faculté si longue & si pleine de difficultez, vn mesme homme puisse auoir tout expérimenté. Ccey est confirmé & verifié en plusieurs medicamens, la vertu purgatrice desquels, a esté descouuerte n'y a pas long temps, & ce descouure tous les iours, entre lesquels les roses sont des plus insignes, & tiennent en bonté & fidelité le premier rang. Leur puissance de purger, quoy que les anciens Grecs l'ayent ignorée, est maintenant si vulgaire, qu'il y a peu de gens, qui n'en ayent de nostre temps faict la preuue: & mesme que la plus grand part des personnes qui ont accoustumé de se purger au printemps, font vne decoction de cinquante & iusques à cent roses, avec autât pesant de sucre (comme si les roses ne purgeoyét aussi bien, & voire mieux, sans le sucre, qu'avec iceluy) de laquelle decoction ils vsent, les vns avec contentement & bon succès, les autres au contraire.

La commune opinion des Médecins est, que les roses, comme aussi plusieurs autres fleurs, ont leur faculté purgatrice, seulement en la surface ou escorce: tellement qu'ils tiennent que les roses seches (à cause que leur humidité superficielle est exhalée) ne purgét aucunement. A laquelle opinion i'ay esté aussi auparauant lié: mais estant moy acettené par experiences tres-certaines & asseurees, faictes tant sur ma personne, qu'en plusieurs autres, que la longue decoction desdites roses, faict beaucoup meilleure operation, que la seule infusion, expression, ou briefue bul-

lition, & mesme que les incarnates seches & arides, en quantité conuenable bouillies long téps, purgent avec tres-grand contentement. Ayant donc moy-mesme experimenté, veu & ouy dire à personnes dignes de foy, tels & semblables effets des roses, suis esté comme contraint, me despartir de ceste opinion commune, & de confesser, que les roses ont leur puissance purgatrice, non seulement en la surface, mais aussi en leur corps & en toute leur substance. Les roses Muscades, qu'on appelle de damas (combien que Mesue n'en aye rien dict, possible qu'il ne les auoit pas experimentees.) ne sont elles pas tres-laxatiues, voire en leur substance? car nous auõs plusieurs fois experimenté, que leur poudre en dose d'une dragme, ou de deux au plus, prise avec le vin blanc, ou le bouillon de pollet, purge merueilleusement bien. Le sirop rosat, qui est tant celebré & tant vulgaire en ce país, qu'à peine faict on vne medecine, là où il ne soit meslé, fera fidele tesmoin de mon opinion: car pour le rendre suffisamment purgatif, faut qu'il soit fait de plusieurs infusions d'une infinité de roses, de sorte que si on calculoit par le menu, sans doute on trouueroit, que six onces du sirop rosat (car il en faut bien autant pour faire vne purgation mediocre) ont l'infusion de plus de trois cens roses: & toutesfois la decoction assés longue, de cinquante ou de cent au plus, voire en ceux qui sont plus robustes & plus difficiles aux purgations, fera vne medecine autant laxatiue qu'on scauroit desirer.

Pour discourir donc de nos roses plus methodiquement, nous noterons qu'il y en a de plusieurs sortes, & pour la premiere diuisiõ, les vnes sont agrestes, qu'autrement on appelle camines, les autres domestiques. De ceste cy nous en trouuons en ce païs de quatre ou cinq especes, lesquelles toutes ont la puissâce de purger, les vnes toutesfois plus, les autres moins: car (comme auons dit cy dessus) l'experience nous a fait voir plusieurs fois, que celles de damas purgent avec plus de vigueur que les autres: les incarnates en cela surmontent les blanches, & les rouges sont inferieures à toutes.

Quand aux blanches ie sçay bien qu'elles ne sont pas estimees purgatiues, par la commune opinion: toutesfois nous auons par effets euidens recogneu en elles vne faculté laxatiue assés gaillarde, ioint aussi que Mesue, encores qu'il ne leur accorde point telle force, si est-ce que tacitement il ne semble la leur refuser lors qu'il dit, que qui osteroit l'amertume des roses, elles ne seroyent plus laxatiues: d'où semble s'ensuiure, que telle puissance aux roses, est indissolublemēt coniointe avec l'amertume, laquelle depuis que se trouue aussi aux blanches, la vertu purgatrice aura aussi lieu en icelles, combien que la plus cõmune & plus saine opinion contenue aux reigles vniuerselles de Mesue, est que les effets de la purgation, procedent de la forme specifique, & non point de telles secõdes qualitez. Quoy qu'il en soit, combien qu'on n'estime pas beaucoup les roses blanches, si est-ce qu'elles ne cedent en

rien aux autres, touchant les perfections: car outre leur pouuoir de purger aillès notable, ioint à vne humidité nō ingrate, il est notoire, que l'eau & l'huile rosat qu'on peut faire d'icelles, comme respondans mieux aux intentions requises, surmontent en bonté & vertu, ceux qu'on fait avec les incarnates: & soit pour corroborer, ou pour appaiser les douleurs, ou pour rafraîchir, lesdits huile & eau rose faits des roses blanches, excellent grandemēt. On dira que les roses blanches ne sont pas d'odeur si suauie que les incarnates: mais telles odeurs ne seruent pas de beaucoup à ces intentions susdites.

Les roses donc sont toutes purgatives de l'humeur bilieux principalement, & des serositez aussi, non toutesfois esgalement, mais les vnes plus, les autres moins, comme il a esté dict cy dessus. Le sirop rosat laxatif, que les Apothicaires reseruent dans leurs boutiques, est tesmoin de telle puissance, lequel ie serois d'avis, faire plustost des decoctions de roses (esmeu par les raisons susdites) que des infusions seulement, & encores de la composer avec le miel, plus propre & commode, tant pour la cōseruation, que pour autres utilitez, que n'est le sucre, qui empesche plus la faculté purgatrice des roses, que ne scauroit porter de profit: tellement que s'il n'estoit, qu'en nos receptes, nous l'accompagnons tousiours de quelque autre medicament plus vigoureux, (horsmis aux grandes foiblesses) son operation seroit le plus souuent nulle & inuolable, non moins que celle du rheubarbe & des mi-
robolans

robolans simplement donnez.

Les roses tant incarnates, que les blanches, & celles de damas se pourront apprester pour la purgation en telle forme que l'on verra à faire: car en pillules, tablettes, ou opiates laxatives vsurons de leur poudres, les pillules seront incorporées avec l'eau, ou le ius de l'absinthé, de l'armoïse, de la mercuriale, de la fumeterre, ou avec le vin blanc. Les opiates doiuent tousiours estre faictes avec le miel, ou le refiné, ou le vin cuit, ou la chair des prunes & des raisins sechez, ioint quelque peu de liqueur.

Quant aux decoctions, ie sçay bien qu'on n'a pas accoustumé de faire medecines laxatives du ius des roses seches boullies, mesme que plusieurs sont d'accord avec Galen & Oribase apres luy, que les roses seches sont adstringentes, & non laxatives: mais ils me pardonneront s'il leur plait, i'ayme mieux croire aux experiences journalieres, qu'à leurs autoritez, & n'ay point d'honte d'affirmer, comme chose veritable, que la poudre des roses incarnates, purge en apportant quelque confort à l'estomach, par son adstriction, laquelle nous leur accordons aussi, tout ainsi que le rhenbarbe a de coustume de faire.

Et pour retourner au sirop rosat laxatif, ie louë grandement la coustume de quelques vns, de le faire plustost du ius des roses bien batues, que des infusions, laquelle seroit encorés plus loüable, s'ils le faisoient avec le miel plustost qu'avec le sucre, tant pour les commoditez desja dites auparauant, que pour le pouuoir laisser à meilleur

meilleur pris, afin que tant les pauvres que les riches en puissent estre soulagez: car estant iceluy fait legitimement avec le sucre, ou cassonade, les Apothicaires ne le peuuent laisser à moins que de cinq ou six sous l'once, & quelquefois suivant la cherté du sucre, sont contrains de le vendre plus de dix sols: tellement que les medicamens, ou pour la diuerse façon de la meslange, ou pour estre portez à nous des loingtains & estranges prouinces, sont tûbez en telle cherté, que les pauvres ne s'osent approcher des boutiques pharmaciēnes, des-ja de long temps dressées à l'Arabesque, meurent le plus souuent sans secours. Les Apothicaires ne doyuent pas prendre ce que ie dis à mauuaise part, d'autant qu'ils n'y sont aucunement interessez: car il est tres-certain, que si on leur eusse donné vn autre aucteur que Nicolas Mirepsicus, ou Prepositus, ou que le Mesue, ou bien que les Medecins vsassent d'ordonner autres medicamens, eussent dressé leurs boutiques à l'imitation de tels & semblables exemplaires: tout ainsi qu'ils ont fait à la mode des Arabes.

Semblable sirop laxatif peut estre fait des infusions ou suc de plusieurs autres fleurs, comme des pesches, d'arbricots, des violettes de Mars, de la geneste, du sambuc, de l'hieble, & de mille autres tant herbes qu'arbres.

La doze de toutes les roses ne doit pas estre vne mesme: car depuis que les vnes surmontent les autres en vertu purgatrice, les plus vigoureuses doyuent estre baillees en moindre dose,
& les

& les autres en plus grande. Mesue qui n'vse que des incarnates, donne du suc d'icelles iusques à deux onces, & du sirop rosat solutif faiët avec ledit ius en donne iusques à cinq onces.

Quant à celles de Damas, ie n'oserois donner de leur ius plus de demy once, & de la poudre i'en ay autresfois bien purgé quelques vns d'une dragme & demy. La poudre des incarnates se peut donner iusques à trois dragmes ou environ. La mesme dose doit estre des blanches ou peu plus grande.

Des violettes de Mars.

CHAPITRE IIII.

Personne ne doit trouver mauuais, si nous disons avec plusieurs des recens herboristes, que Galen ny personne des anciens, n'ont cogneu les violettes de Mars estre purgatiues: car aux choses, qui (comme auons des-jà dit) consistent en la seule preue, laquelle souuentesfois les Medecins reçoquent des plebees, nous ne faisons point de tort aux anciens de dire que nous auons auourd'huy l'vsage de plusieurs medicamés purgatifs, la puissance desquels leur a esté incognüe: c'est pourquoy on dit vulgairement, que nous sommes comme enfans sur les espaules du Geant, d'où nous voyons tout ce qu'il void & encores plus outre.

Entre

Entre donc plusieurs especes de violettes, la puissance de purger est seulement attribuee à celles qui gettent leurs fleurs au mois de Mars, d'où elles ont eu le nom de violettes de Mars: & sont assez cognues & vulgaires par tout.

Nos Apothicaires ne mettent en besongne pour la Medecine aux purgations, que les fleurs, desquelles & de leur infusion multipliee, font vn syrop laxatif, propre pour purger la bile iau-ne, qui est l'humeur que Mesue luy attribue: mais nous trouuons par expetiences, que les fueilles n'ont pas moins d'efficace pour cest effet que les fleurs: & mesme qu'à semblables intétions nous les ordonnons aux clisteres, & quelquefois aux potages, tellement que du ius de ces fueilles cy nous pouuons faire vn sirop avec le miel, qui sera autant laxatif, que celuy des fleurs. Pareillement les infusions souuent reiterees desdites fueilles, feront vn semblable sirop, & voire de plus d'efficace, que celuy qui est fait des fleurs infuses.

Quelques vns s'esmerueillent, de ce qu'on accorde la puissance purgatrice aux violettes, tant seches que recentes, disant que les recentes purgent, en remollissant ou lubrifiant les excremens, & aussi les voyes par ou la purgation se doit faire, & les seches en attirant les excremés bilieux, seiournans plus loing qu'à la premiere region: desquels effets Mesue attribue le premier à certaine humidité superflue qui est aux violettes recentes, l'autre à l'acrimonie qui est signifiée par vne apertume qu'on apperçoit aux seches, laquelle

quelle amertume est sans doute assoupie, aux recentes par la presence de l'humidité, Auicennas, comme il est vray semblable, n'eussé iamais avancé ceste opinion, ne fust qu'il auoit veu tels effects par experience. Quant à moy combien que ie n'en ay pas autremét fait la preuue, toutesfois, n'estime point impertinent d'affirmer, que tout ainsi que la decoction assés longue, des roses seches est laxatiue, voire mesme que la poudre des incarnates purge en restreignant & fortifiant les parties, qu'ainsi nous pouuons conclure des violettes, auxquelles Auicennas & Mesue auteurs dignes de foy, ont remarqué la vertu laxatiue tant en leur surface, qu'aux parties plus profondes & terrestres.

La correction ne semble pas estre trop necessaire aux violettes de Mars: car quant aux fueilles, elles n'ont rien qui offense l'estomach, si n'est que leur mollesse & humidité le puisse rendre lache: à quoy lon pourra remedier en adioustant quelque chose corroboratiue, comme sont presque tous nos aromatiques qui sont amis d'iceluy. Bien est vray que si nous voulons accommoder lesdites fueilles, ou en forme d'opiate, ou de pilules, leurs effect ne sera pas fort remarquable, horsmis aux plus delicats, sans la meslange de quelque potion, de Pelatere ou autre de ceux qu'auôs descrit au premier liure. Les fleurs pour estre aucunement ameres & acres, avec certaine humidité superficielle, qui les accompagne lors qu'elles sont recentes, eu esgard aussi qu'elles sont aucunement aromatiques: tant s'en faut que

l'estomach

l'estomach en soit offensé, qu'il en est recreé & soulagé grandement. On ne peut beaucoup excéder en la dose des violettes, combien que de leur decoction, il en faille beaucoup plus donner, que de la poudre & du ius.

De l'epithyme ou goutte du thym.

CHAPITRE V.

Chap. 173.
Litt. 4.



Athiol en ses commentaires sur le Dioscoride, affirme que l'epithyme ne croit point au dessus du thym qui a les fueilles menues, ains seulement sur celuy, de qui les fueilles sont semblables à celles de la sarriette. Toutesfois l'experience (à laquelle en ce fait on se doit plustost arrester) monstre le contraire, aumoins en ce pais: car il n'y a herboriste qui n'aye en plusieurs endroits veu & recogneu l'epithyme, (qui est vn simple, de soy sans aucune racine) qu'immediatement prenne nourriture de la terre, ains croit par dessus le thym, qu'il enueloppe en forme de cheueux rogeastres. D'iceluy nous auons aussi peu d'indigence que du thym son nourriffier: auons aussi abondammēt la cassuta ou cuscuta, laquelle peut le mesme pour la purgation, que le pithyme: car toutes deux purgent les humeurs attrabilaires, adustes & melancholiques, & selon aucuns, les choleriques aussi. Laquelle faculté a esté recogneu en l'epithyme principalement, de
toute

toute ancienneté:mesme du temps d'Hipocrate,
 qui a precedé Galen de plus de cinq cens ans:
 car en plusieurs endrois de ses escrits,principale-
 ment en ceux la qui sont de la therapeutique
 (comme est le liure *de internis affectionibus*) nous
 trouuons le pithyme estre ordonné pour la pur-
 gation desdites humeurs. Je sçay bien que l'vsa-
 ge de l'epithyme est vulgaire entre les Medecins:
 mais de cela ie m'esbahy & en suis marri que
 nous preferions celuy de Pamphilie & de Ca-
 padoce, au nostre, depuis que seló la description
 de Dioscoride,& de tous les herboristes, il n'est
 en rien different aux surnommez. A faute de l'e-
 pithyme nous pouuó s vser de la cassuta, laquelle
 apprestérons ainsi que l'epithyme, en toutes les
 formes de medicamens: & premierement pour
 breuuage ferons bouillir legerement l'vn ou
 l'autre (car ils ne peuuent supporter vne longue
 decoction) avec les prunes de Brignole, les rai-
 sins de panse purgez de leurs semences, la fuma-
 ria, la mercuriale, l'anis, ou le scœnouil, &c. Ledit
 breuuage se peut aussi faire par la seule infusion
 de l'epithyme, dans ladite decoction bien chau-
 de, ou autre semblable, ou bien dans la mesgue
 ou eau de lait. En la forme pillulaire prendrons
 la poudre de l'vn ou de l'autre des surnommez,
 laquelle accópaignee de quelque portion d'anis
 ou de scœnouil, ou de charuis, & semblables se-
 menches chaudes, incorporerons avec le ius de la
 mercuriale, ou celuy de la fumeterre ou le vin:
 la mesme meslange feró desdites poudres avec
 le miel, le vin cuit, pour les opiates, Et, pour autāt

que ces deux simples, n'ont presque aucune vehemence, tellement qu'à grand peine ont ils besoin de correction, nous augmenterons leur vigueur selon la necessité, en adioustant quelque portion de ceux qui sont descripts auparauant.

Quant à la dose de l'epithime elle est controuersée entre les bons auteurs: car Dioscoride en donne demi once avec le miel, le sel, & le vinaigre. Paul Æginette baille la poudre avec le lait en dose de cinq dragmes. Serapium ne passe pas quatre dragmes en decoction, & en poudre se contente de deux au plus. Mesme a beaucoup surpassé ces doses cy: car en infusion ou legere decoction, il ne craint point d'en donner iusques à deux onces & demy, & en poudre en baille de quatre à sept dragmes. Nous tiendrons la mediocrité, & accommoderons la dose tant de ce simple, que des autres, selon la complexion des personnes, laquelle (si faire se pouuoit) deuroit estre de prime arriuee cognüe au Medecin, n'oublions point, que la vertu laxatiue de quelque medicament que soit, est grandement affoiblie & diminuee selon la forme & le moyen que l'on l'appreste.

De l'absinthe.

CHAPITRE VI.



L n'y a herbe plus commune, & plus
cognüe en ce païs, que l'absinthe, &
toutesfois le vulgaire n'a encores
pris garde à sa faculté laxative, la-
quelle Dioscoride, Paul Æginette ont cognüe.
Nos practiciens n'en vsent point que pour l'al-
teration & pour le soubstien de l'estomach, &
aussi pour l'ouuerture des opilations du foye &
de la rate, desquelles parties il est grand amy,
comme aussi contre la vermine à laquelle il est
ennemy capital: tesmoin est la greine qu'on ap-
pelle barbotine qu'on donne aux petits enfans à
ceste intention, qui n'est autre que celle de l'ab-
sinthe.

Des especes d'absinthe que les herboristes ont
cogneu & remarqué, nous n'en auons en ce païs
que deux: l'une qui a les fueilles minces, petites
& blanchastres, qu'on nomme absinthe romain
ou pontique, duquel on en treuve seulemēt dans
les iardins des Apothicaires quelques plantes:
l'autre a les fueilles plus grosses & deschique-
tees, lequel est tres-frequent, tant aux iardins de
la basse Prouence, qu'aux lieux incults & pier-
reux des montagnes. Et de cestuy-cy ie veux que
nos Prouençaux vsent, tant pource qu'il est tres-
propre pour purger l'humeur bilieux & la phleg-
me tenue ou subtile, & mesme que nous esperōs

Chap. II.
lib. 7.

de l'accommoder pour la purgation de la crasse & grosse pituite: qu'à cause que sans grand pourchas, & travail on le peut recouurer en plusieurs lieux de ce país. Sa vertu de purger semble aucunement estre en controuuerse, car Galen en sa methode, ne l'ose pas donner à ceux qui sont abondans en mauuaises humeurs: lesquels toutesfois ont besoin de purgation insigne; en autre lieu il baille sa decoction faicte avec l'eau & le miel, qu'il appelle *mulsa*, pour purger les humeurs tenus & liquides qui seiournent dans le ventre. Il est vray-semblable qu'il ne l'ose pas donner aux premiers qui ont besoin de grâde & insigne euacuation auxquels l'absinthe, en faisant esmotion, & ne purgeant pas assés, endomageroit plus qu'il ne sçauroit profiter,

Quoy qu'il en soit, nous auons l'autorité des plus rares Medecins herboristes anciens & modernes, confirmee par particulieres experiences, que nostre absinthe est purgatif, sans faire aucune violence, qui puisse offencer le corps: & tant s'en faut qu'il aye besoin de correction, qu'il est luy mesme trespropre pour corriger les autres medicamens. Il est vray qu'à cause de son amertume, il est aucunement ingrat à l'estomach, laquelle neantmoins porte avec soy sa correction: car on remarqué en l'absinthe, vn' odeur assés suauue & plaisante, accompagnée d'une qualité adstringente, lesquelles deux complexions sont assés suffisantes, de chastier, & corriger le mal que l'estomach sçauroit endurer par l'amertume. Parquoy nous ne craindrons point d'exhiber nostre

nostre absinthe vulgaire, en telle forme qu'il nous semblera estre expedient, augmentant ou diminuant sa dose seló icelle:& pour estre mieux asseurez de sa correction,adiousterons tousiours le miel, principalement aux decoctions & opiates,ou bien le vin cuit.

Quant aux pillules, elles seront formées des fueillés (lesquelles pour la purgation sont seulement en vsage) concassées & bárués, & en apres traduites par le tamis, ou bié de la poudre faicte selon l'art:lesquelles pillules, comme aussi les opiates auront besoin d'estre vigorees, par l'addition de quelqu'vn des plus violens corrigez: autrement faudroit donner vne trop grande dose, qui seroit moleste & fascheuse à prendre. La doze de ce medicament selon Mesue est de cinq à huit dragmes en infusió ou legere decoction, en poudre de deux iusques à trois, & du ius de trois à quatre dragmes: lesquelles doses faudra augmenter ou diminuer selon les medicamens que nous adiousterons & selon l'indigence.

De la fumeterre.

CHAPITRE VII.



A fumeterre (ainfi appelée pource que si on met son suc sur les yeux pour les esclarcir,à quoy elle a grand efficace,excite les larmes, tout ainfi que la fumee) doit beaucoup plus aux Arabes,

comme à Serapion, Mesue, Auicenne, qui ont diuulgué ses vertus, qu'à nous : pour lesquels neantmoins elle croit en grande affluence, aux vignes, aux iardins, & par tous les champs : de sorte quelle est cogneuë d'un chacun. A ceste cy nous en preferons d'autres estrangeres, lesquelles ne sont pas meilleures, ny si bonnes, outre ce qu'elles coûtent beaucoup. Quant à la faculté purgatrice, Galen ne luy attribue nommement aucune humeur, ny Paul Aeginette aussi, qui ne laisse iamais d'un pas nostre Galen, lequel Oribase imite aussi pour la grand part. Bien est vray que Galen tesmoigne auoir aprins d'un villageois, que la fumeterre est laxatiue, lequel vsoit d'icelle pour laxer le ventre, & pour conforter l'estomach, l'apprestant toutesfois diuersement : car de la poudre, qu'il gardoit tousiours en son promptuaire, en prenoit pour esmouuoir les excrements du ventre dissoluë au melicrat, & lors qu'il vouloit fortifier son estomach, prenoit la dite poudre avec le vain trépé. Mesue qui a esté tres-curieux en la recherche des medicamens purgatifs, & (côme il est vray semblable) a fait la preuue, au moins de la plus part de ceux qu'il met en son catalogue, certifie que la fumeterre, purge benignement l'humeur bilieux, brulle & aduste, & par consequent, est vtile aux maladies qui sont les effets de telles causes, comme sont principalement plusieurs sortes de gales, le prurit & demangeon, & autres maladies qu'aduennent tant à la peau, qu'aux autres parties : de ce que les plebees semblent s'estre prins garde :

d'autant

*Li. 7. simp.
med.*

d'autant que plusieurs purifient & temperent leur sang au printemps, avec l'infusion de la fumeterre dans l'eau du lait de cheure. Je n'ignore pas que nous ne nombrions la fumeterre aux apozemes & decoctions ordinaires tant aperi-
tiues, que laxatiues : mais cela est sous cõdition de medicament alteratif, & agissant par manifestes puissances, & non autrement.

Ce simple se peut donner seul sans aucun correctif, d'autant qu'il est composé de diuerses complexions, & presque contraires : car nous auons plusieurs fois experimenté qu'il participe, d'une saueur acerbe, semblable à celle des fruiçts long temps deuant leur maturité : laquelle acerbité est coniointe à une amertume & acrimonie, assés insigne. Desquelles vertus la premiere est un effect de la froidure, les deux autres procedent de la chaleur. Les Medecins sont d'accord en cela qu'un mesme simple peut estre reuestu de diuerses & contraires qualitez, permanētes en diuerses parties d'iceluy.

Nous pouons vser de la fumeterre en plusieurs manieres, prenant la poudre, ou la decoction, ou le ius, toutesfois en diuerses doses, à l'exemple de Mesue, lequel donne le ius, qu'il adoucit avec le miel, iusques à deux onces. De la poudre il n'ose passer demy once, & à grand peine vient-il iusques à cinq ou six dragmes : & toutesfois, en decoction il en baille iusques à une liure marchande, de quinze à seize onces. Et d'autant que la fumeterre est (comme nous experimentons) imbecille pour purger, nous auons de

coustume de la faire tremper dans la mesgue du lait de cheure, ou dans la decoction des penſes purgees de leurs grains, des prunes, de l'absinthe, de la mercuriale, & ſemblables medicamens laxatifs, ou avec icelles la faire bouillir quelque peu, & dōner ſon expreſſion au patient: elle peut receuoir auſſi les autres formes des medicamens moyennant les additions neceſſaires.

De la mercuriale.

CHAPITRE VIII.



LE m'esmerueille de ce que Meſues & les autres Arabes, n'ont faiēt aucune mention de la mercuriale entre les ſimples purgatifs: ie ſuis aſſeurē que ſi elle croiſſoit à leur païs, qu'ils ne l'euffent pas oubliee, veu qu'ils ont eſtē ſi curieux & diligens, de mettre leur region en bruit, pour raiſon de la droguerie, qu'ils n'ont eſpargnē ny leur travail, ny leurs facultez: & poſſible auſſi qu'ils ne l'ont pas experimentee, combien qu'ils l'ayent en leur terroir. Nous ne penſons point leur faire tort en diſant ces choſes, non plus qu'a Hippocrate auquel pluſieurs medicamens ont eſtē incogneus, qui ſont aujourdhuy en vogue. Nous apres Dioſcoride, Galen, Oribaſe, & Paul Aeginette recognoiſſons en la mercuriale vne puiſſance laxatiue tres-fidelle, de la phlegme, de l'humeur ſereux & la bile, & ſans aucune perturbation: tellement

tellement qu'elle est tres-vtile pour purger aux fieures continues & ardantes, & aussi à celles qu'assaillent le malade par interualle, que nous appellons intermittentes. D'icelle se peuvent aussi purger, sans aucun regret, tous ceux qui doyuent auoir en tout temps le ventre lasche & libre: elle est conuenable aux femmes enceintes, & à toutes vieilles gens, qui coustumietement ont le ventre chiche & constipé: les enfans encores & les plus tendrelets en peuvent receuoir, à l'intention susdite: le vulgaire l'estime aussi laxatiue, car il en vse coustumierement à telle fin aux clisteres. Quoy qu'elle puisse aussi estre accommodée pour estre receuë par la bouche, en toutes les formes accoustumées, car estant sa decoction prinse & icelle mangée comme on faict les autres herbes potageres des iardins, elle est de grand pouuoir de purger le ventre desdites humeurs. Son ius est tres-vtile à receuoir les poudres des medicamens dediez pour les pillules: ses fueilles pilees & meslees avec le miel, où le vin cuit, pourront estre reseruees en forme d'opiate, laquelle conuiendra non seulement à lascher le ventre: mais aussi pour deliurer & ouurir les obstructions des parties internes: & principalement pour prouoquer les menstrues aux femmes, pour lequel faict aussi, elle peut estre tres-vtilement supposee en forme de pessaire: & pour autât qu'elle offence quelque peu l'estomach, celuy la corrigera & augmentera sa puissance purgatrice, qui la meslera avec l'absinthe. Quant à la doze, en decoction on peut donner

iufques à quatre ou cinq onces, du ius, fera affés d'vne & demy, & iufques à deux, & des fueilles conquaffées, de quatre dragmes à vne once plus ou moins felon les circonftances.

Des clochettes.

CHAPITRE IX.



Aiffant à part la queftion, qui eft efmeuë entre certains herboriftes, du fimple qu'on appelle volubilis, à fçauoir de qu'elle efpece Mefue entend, lors qu'il dit, que la volubilis autrement appelée clochette, nettoye & purge le fang des humeurs bilieux: ie m'arrefteray à celles que nous auons remarquées en ce païs, qui font de deux fortes, que le vulgaire appelle du nô commun corregioles: l'vne petite & croit aux champs cultiuez, & aux vignes: & de cefte cy le plebee fe fert à la guarifon des playes, d'autant qu'elle a en foy quelque chofe abfterfiue & consolidante: & mefmes les moisfonniers, lors qu'ils s'offensent & bleffent avec leurs faucilles. L'autre eft affés grande quand aux fueilles, laquelle fe treuve embraffant les hayes des iardins, & bien fouuent les chanures, qu'elle fuffoque quelquefois.

Toutes les deux efpeces ont les fleurs blanches en forme de clochettes: elles different en ce, que la petite ne iette point de lait, & eft inutile pour la purgation: mais la grande, i'oferois dire qu'elle a fa faculté purgatrice plus vigoreufe que

que les autres simples, desquels nous parlons maintenant. C'est pourquoy ie m'esmerueille que Mesue l'aye mise en ce rang, si ce n'est qu'il la prenne pour les obelons: ausquels toutesfois nous ne pouuons remarquer telle puissance. Ie ne fais pas aussi doute que nostre voluule ou liseron, ne soit different à l'escammonee de Dioscoride, combien que leurs fueilles ont quelque similitude ensemble, & que toutes deux ont le laiët: & s'il est vray ce que le portrait nous presente, la racine de l'escammonee surpasse en grandeur celle du cocombre sauuage. Mais laissons son escammonee aux estrangers, & taschôs d'accommoder nostre voluule ou corregeole au profit des Prouençaux, pour lesquels nous auons prins ce labour. Premièrement noterons, que ce que Oribase apres Galen dit de l'esmilax, qu'elle est vne plante pernicieuse, ne doit pas estre entendu de nos clochettes, quoy qu'on les entende aussi par le nom desmilax: car la nostre n'a pas tant de malignité, qu'on ne la puisse aisement corriger: ioint aussi que l'esmilax d'Oribase est vn arbre, que les Latins appellent *taxus*, les François yf.

L. 15.
Li. 8. simp.
mod.

Nous vserons donc des fleurs & des fueilles de nos clochettes ou corregeoles, pour la purgation des humeurs bilieux & des eaux. Les clochettes infuses en quelque decoction, ou liqueur stomachique, font vne portio qui n'est pas ingrate, & si est assés laxatiue, avec les fueilles sechees à l'ombre & puluerisees, ferons de pillules incorporees à quelque ius cômme le vin ou le suc d'abfin

d'absinthe, qui ne seront de peu d'efficace. Des-
dites fueilles recentes, bien cōcassées & criblées,
ferons vne opiate avec le miel, le vin cuit, &c.
qui sera de longue durce en ses entieres facultez,
& de grand profit. De ces mesmes fueilles aussi
bouillies en l'eau, avec la cichoree sauuage, l'o-
seille, l'anis, la menthe & semblables, se peut fai-
re vn breuuage aux fins susdits. Quant à la dose
nous ne ferons pas si hasardeux en ceste cy que
Mesue est en la lieñhe: car il en donne quatre on-
ces en decoction, & iusques à vne liure en infu-
sion dans le mesgue, ce que me confirme enco-
res mon opinion susdite. Quant à moy des fleurs
infuses, i'en dōne de trois à quatre ou cinq drag-
mes au plus, des fueilles concassées selon la fa-
çon de la preparation, tantost vne dragme & de-
my, tantost deux, tantost trois & non plus.

Du carthame ou saffran bastard.

CHAPITRE X.



Ombien que la carthame ne nous
soit herbe champestre, ie ne l'omet-
tray pourtant en ce catalogue, veu
qu'il se peut cultiuer & se peupler de
foy mesme dans nos iardins: il n'est autre chose,
que la plante qui produit la graine, de laquelle
on nourrit les perroquets: elle est ornee d'une
fleur semblable au saffran, au lieu duquel les ple-
bees quelquefois en vsent. Je m'esmerueille de ce
que

que Mesue l'a mise entre les medicamens de plus grande vehemence, veu qu'il est si familier, que Galen ne craint point de le dōner aux plus vieux avec la ptisane pour laxer le ventre. Oribase est aussi de ceste opinion, lequel en ordonne pour purger amiablement la bile & la phlegme. *L. 5. cap. 9. de sanu. tuenda.*

Je crois que Mesue, qui n'a escrit que des remedes de son païs, a treuvé celle vehemence à son carthame, veu qu'il n'a osé rien asséurer de la faculté des medicamens à luy incogneus: nous le mettons ordinairement en besoigne en nos medicamens, tant solides que liquides pour purger lescdites humeurs, comme aux apozemes laxatives: encores se trouue-il aux tablettes, que les Apothicaires tiennēt prestes dans les boutiques, qui portent le nom du carthame, quoy qu'il soit de moindre vertu que les autres ingrediens cathartiques. Je voudrois defaire lescdites tablettes avec le miel, tout ainsi qu'on appreste le nogar, d'autant que ie n'admets point de sucre en ma pharmacie. Le carthame est moleste à l'estomach, ce que Dioscoride assure aussi, & a cela commun avec tous les autres medicamens, au moins ceux qui sont de ce rang: car l'estomach coustumierement treuve moleste tout ce de quoy il ne peut tirer quelque profit, & principalement si la chose a quelque mauuaise qualité. Nous n'vsons coustumierement que de la semence du carthame, combien que sans doute les fueilles ont la mesme puissance de purger que la graine, à laquelle nous arresterons plus, qu'on autre partie de ce simple: & d'icelle extrairons

trairons la moëlle, pour en former des pillules, ou plustost d'opiates, avec quelque liqueur propre. Ladite graine se peut aussi aprester en decoction pour faire vne medecine liquide, si on la conqasse premierement que de la mettre dans l'eau, ou autre liqueur, pour estre boullie. L'ennuy qu'elle porte à l'estomach, sera adouci avec l'absinthe, la menthe, la cichoree, & semblables choses stomachiques, plusieurs fois mentionnees: & d'autant que le carthame est de tardive operation, le faudra haster, afin qu'il ne sejourne trop dans l'estomach, avec quelque vn de nos aromatiques: & par ainsi la moëlle de la graine du carthame, incorporee avec le miel, accompagnée de la menthe puluerisee, de l'absinthe, de la mariolaine, de l'hysop, fera vne opiate assés laxative: la vigueur de laquelle conuiendra augmenter par l'addition de quelque peu de l'elatre, ou d'autre semblable. Au lieu du miel pourrons faire ladite incorporation avec le vin blanc, ou le ius d'absinthe, de la fumeterre, de l'arthemise, &c.

La dose de ce simple est de quatre à six dragmes, iusques à vne once selon Mesue en ce qu'il monstre que ce medicament n'est pas esgal en vehemence, comme il dit, à ceux qui portent le lait, nous en donnons beaucoup dauantage.

Du polipode.

CHAPITRE XI.

NOus auons retenu le nom du polypode des Grecs, ainsi appellé, pource qu'il est vne racine qui est attachée en beaucoup d'endroits, comme par plusieurs pieds : on l'appelle aussi la petite faugere, à cause de la similitude que ses fueilles ont avec la faugere grande. Ce simple croit en nostre prouince, autant ou plus copieusement, qu'en aucune autre : & se prent coustumierement aux chaines, rochers, en lieux humides & opaques. Je confesse ne pouuoir entendre, pourquoy est-ce, que Mesue l'a descrit, entre les plus malins & vehemens simples, veu que selon le tesmoignage, tant des Grecs, que des Latins, les plus recés, il est reuestu d'une douceur, coniointe à vne stipticité, qui sont qualitez tres-aggreables à l'estomach, si ce n'est que possible le sien est d'autre complexion que le nostre : ce que, pour estre vray semblable, ie croy sans difficulté. Car tout ainsi qu'une region est differente de l'autre : aussi est-il raisonnable, que les choses engédrees & nourries en icelles, soyent differentes : ce qu'à lieu non seulement aux plantes & aux bestes, mais aussi aux hommes.

Nos Apothicaires (suiuent le conseil de Mesue) vsans en leurs compositions magistrales du polypode quercin (ainsi l'appellent-ils, à cause qu'il croit sur les chaines) ayans en soupçon
(disent

(disent-ils) celuy des rochers, à cause de certaine humidité superflue qui est en luy : mais telle humidité ne pouuant estre excessiue, d'autant que le polipode n'en peut plus titer des rochers que des chaines (ayant tous les deux quelque portion de terre interposée, d'où ils prennent leur nourriture) facilement elle pourra estre corrigee. Parquoy nous ne craindrons point d'vser de l'un ou de l'autre, depuis que tous deux ont vne mesme puissance de purger.

Il y a quelque cōtrouerse entre les Medecins, touchant les humeurs qu'ils attribuent au polypode ; car les vns le mettent au rang de ceux qui purgent la bile, comme Paul Æginette : les autres luy assignent aussi la pituite, comme font Dioscoride & Plin. Aucuns outre la pituite & la bile, disent qu'il purge aussi les eaux, comme Oribase, tellement que selon ces authoritez, le Polypode semble estre bon pour purger toutes les humeurs : toutesfois nous le mettons aujourdhuy en besongne plus pour la purgation de la bile noire & de la pituite, que pour les autres superfluitez. Sa correction est si facile, qu'il semble n'en auoir aucunement besoin, attendu les qualitez que nostre goust apperçoit en iceluy : mais pour autant que celuy des rochers, duquel nous abondons plus, est accusé d'estre superflument humide, sa correction sera facile avec les choses seches, comme sont l'origan, le thym, le fenouil, la ruë, l'anis, &c. lesquelles choses seruiron aussi de discipation & empeschement aux ventositez, qui peuuent estre excitez, de l'humidité

*Ch. 4. li. 7.
Chap. 180.
liure 4.*

midité superflue dudit polypode; & encores luy serviront d'aiguillon pour hastier son operation, laquelle de soy est lache & tardive, pour estre iceluy de substance grossiere & terrestre.

Mesue ne craint point cela de son polypode quercin, depuis qu'il l'appreste avec la mulla, qui est vne meslange de l'eau seule avec le miel, ou en decoction avec les panfes purgees, ce qu'il fait aussi avec la decoction d'un vieux coq. Nous donc dispenserons le polypode, pour la purgation, en toutes les formes accoustumees: vray est que pour autant qu'il n'est pas des plus esueillez entre les purgatifs, luy faudra donner esperon, avec quelque vn de ceux du premier ordre, comme est l'elaterion (qui nous doit servir de degre en semblables necessitez) pour le reduire en forme d'opiate, ou de pillules purgatives: car autrement il conuiendrait le donner en trop grande dose qui outre l'ennuy, ne seroit pas de grand profit pour la purgation, veu mesmement que nous faisons vne opiate du polypode puluerise, qui ne sert d'autre chose, que pour les obstructions du foye & de la rate. Quant à sa dose elle est aussi en dispute: car Mesue n'en donne que iusques à demy once en decoction (laquelle il soustient assez longue.) Manard le donne iusques à vne once, lequel nous imitons aujourd'huy, & bien souvent la surpassons. La dose du polypode en poudre, ne doit pas excéder deux dragmes iointe encores avec l'elaterion, toutes fois aux opiates on en donne davantage pour raison de la purgation.

De l'agaric.

CHAPITRE XII.

QN m'estimera possible auoir oublié ma promesse, de ne vouloir descrire autres simples purgatifs, en ce traité, que ceux qui le treuvent en Prouence, puis que i'y nombre l'agaric, reputé estrangier, mais outre que ie le tiés nostre, mesme qu'il croit en plusieurs lieux qui de toute antiquité estoient de la Prouence, comme sont les contrées de terre neufue, & le Gapenfois il est de grande efficace pour nostre intention, & de peu de coust: & suis asseuré, que si nous mettions diligence de le chercher, nous le treuerions presque par tout ce pais: car tous ceux qui en ont escrit nous asseurent, qu'il prouient non seulement sur les sapins & melezes, en figure d'esponges, & de boulets: mais aussi qu'on l'a treuvé croistre sur les vieux chaines, & houssons ou eusses, & autres arbres glandiferes, desquels nostre prouince est par tout ornee. Je pense aussi qu'il se trouueroit sur les vieux faux à nostre pais, vers les montagnes proches du Regeois.

De l'agaric les simplistes en font deux especes, l'une qu'ils appellent masle, l'autre femelle: le masle est le noir, selon Dioscoride, duquel on n'vse point pour les purges: combien que ie ne craindrois point de le donner, moyennant les corrections necessaires, par lesquelles nous en auons

auons familiarisé d'autres, plus esloignez & plus
 rebelles. Me semble qu'il ne doit pas estre nom-
 bré entre les plus violens, comme Mesue l'a mis:
 car tant s'en faut qu'il aye quelque malignité en
 soy, que la diuersité des parties qui sont en luy,
 tesmoignees par les differences de la saueur, de-
 monstrét qu'il n'a aucune inimitié à l'estomach,
 ny autre partie de nostre corps. Le sçay bien que
 plusieurs Medecins, mesme de nostre temps, ont
 suspect son vſage: mais quant à moy ie me tiens
 de la part de Paul Aeginette, d'Oribase, de Dio-
 coride, lesquels tous ensemble affirment, que
 l'agarie purge la pituite & la bile, sans aucune
 faulxerie, & leurs autoritez sont fondees en
 raisons & en experiences infallibles. Premiere-
 ment la raison ne permet pas, qu'un medicamēt
 qui est de son naturel de saueur douce & stipti-
 que (lesquelles saueurs tout le monde est d'ac-
 cord estre en l'agarie), soit ennemy de l'esto-
 mach: & quoy que l'amertume soit assés insigne
 en l'agarie, si est-ce qu'elle est corrigee par les
 deux premieres. Dauantage les experiences sont
 iournalieres des medicamens que nous donnons
 là où l'agarie est principal ingredient, qui pur-
 gent sans aucun trouble, aumoins qui soit plus
 grand que les medicamens de ce genre ont ac-
 coustumé d'exciter. Et combiē que l'agarie cause
 quelquefois le vomir, si ne faut-il pource l'accu-
 ser de vehemence: car cela luy est commun avec
 tous les autres de mesme genre, & principale-
 ment en ceux qui ont l'estomach delicat & sen-
 sible, mesmement en l'orifice superieur, lequel

*Ca. 4. li. 7.
 Lib. 13.*

Cap. 1. l. 3.

ne se peut plaire à l'accoistance d'aucun médicament.

Nostre Agaric donc purge la phlegme & les deux espèces de bile, autant benigne ment que scauroit faire aucun autre: tellement qu'à bon droit plusieurs Medecins de nostre temps le parangonnent au rheubarbe, & quelques vns le preferent à iceluy: car il est aussi reuestu d'une qualité adstringente, semblable à celle qu'on dit estre au rheubarbe, gissante à la partie terrestre d'iceluy: laquelle partie est aussi le subject, de l'aspreté & stipticité, que nostre goust remarque en l'agaric. Ceste opinion est confirmee par l'experience de Dioscoride, qui le donne en poudré avec l'eau simple, pour arrester le crachement de sang & la sortie d'iceluy hors des veines. Democrite l'a estimé tres-öcuenable à toutes maladies l'appellant médicament de famille. La diuersité des parties qui (comme a esté des-ja dit) sont en luy, fait qu'il a sa correction tousiours avec soy mesme: & quoy qu'on l'adiouste avec le sel gemme (ce que Manard repreuue) ou avec le gingembre, ce n'est pas pour obuier aux nuisances, qu'il pourroit porter à l'estomach: mais seulement pour haster sa lascheté. Galen fait de petites formules, qu'il appelle trochisces ou mourceaux) de la poudre de l'agaric mouillé dans le vin blanc avec le gingembre, au lieu duquel nous pourrions vser de nostre poivre, appellé par Auicenne *piper caninum*, ou plustost de quelqu'un de nos aromatiques, comme de la sarriette, du serpolet, du thym, de la rue, &c. Nostre Agaric s'ac-

commode

commode fort bien en toutes formes de medicamens, soit en decoctions ou infusions, inclus dans vn linge avec lesdits aromatiques, ou en opiates & pillules tres-conuenables à toutes obstructions des parties interieures, outre le profit qu'elles portent, en purgeât les humeurs preparez. Sa dose est de deux iusques à cinq dragmes en decoction, en poudre ne passons point deux dragmes: car en petit poids il y a grande magnitudine & quantité en ce medicament à cause de sa legereté.

Du cabaret ou asaron.

CHAPITRE XIII.

Pource que le cabaret, que les Latins appellent *asarum*, comme aussi les Grecs, est abundant aux montagnes de nostre Prouence, & est vn simple de grande vtilité pour la purgation, ie le descri-ray pour la conclusion de ce second liure. Galen ny aucun de ses sectateurs Grecs, ne semblent auoir en luy experimenté aucune puissance de purger: aussi possible que pour ce faict, ils ne l'ont iamais mis en besongne, quoy qu'ils eussent leu dans Dioscoride, que le cabaret est purgatif comme l'ellebore blanc. Peut estre aussi que celui de leur pais n'est pas purgatif.

On demande pourquoy est-ce que Mesue ne l'a plustost rangé au catalogue des premiers

medicamens, que de le mettre entre les medice-
cres : depuis que comme dit est il purge par le
vomissement, comme l'ellebore blanc, ce que
Chap. 22. Mesue mesme confesse, disant que c'est son na-
simpl. turel de purger, tant par le ventre que par la
bouche : ce que ne se peut faire sans grand trou-
ble de tout le corps, notoire argument, de la ve-
hemence du medicament. Je croy que ce qu'il en
dit est plustost pour suivre Dioscoride, que pour
l'auoir experimenté : car il est vray semblable,
qu'il a mis les medicamens desquels luy mesme
a fait l'experience, chacun en son rang : & que si
quelquefois il escrit au contraire, c'est plustost
pour ne se despartir de l'opinion des anciens,
que pour tesmoigner ce qu'il en pourroit auoir
veu. Quoy qu'il en soit l'experience est certai-
ne, que le cabaret est purgatif non immodéré
de la phlegme & de la bile, qu'on appelle vi-
telline, semblable au iaune d'un œuf, & de tout
autre humeur cholerique, par le fondement. Et
si quelquefois il aduient, qu'on vomisse par sa
prise ; j'attribuerois cela, plustost à la diuerse
complexion des personnes, qu'au medicament :
d'autant qu'il se treuve d'estomachs qui s'offen-
sent à la moindre arriuee du medicament dans
leur capacité. Le commun vsage du cabaret est
des racines seulement, desquelles celles qui
sont les plus crasses & espesses, sont les meil-
leures, pour estre plus pleines de suc : toutesfois
les fleurs & les fueilles, ne seroyent pas inutiles
pour les purgations, d'autant que des fleurs nous
pourrions faire vne infusion, qui estant cuitte
selon

selon l'art avec le miel, seroit gardee pour les inrentions susdites. Le ius aussi des fueilles concassees & pressées ne sont de moins de valeur, lesquelles aussi bouillies en l'eau avec la menthe, mariolaine, *polium montanum*, feroient vn breuuage bon & facile à receuoir.

Quant à la racine, pour autant qu'elle est de bonne odeur, & de saueur aucunement stiptique, reserrante & restrinctiue, qui sont qualitez procedantes du froid, semble n'auoir besoin de correction: aussi Mesue ne s'en peine pas beaucoup: de sorte que la seule coction est suffisante de la corriger.

Si la necessité porte de la bailler en infusion, ferons au preallable vne decoction de prunes douces, de panfées, de roses, de menthe, & quelque peu d'absinthe, dans laquelle, non refroidie, ferons tremper nostre racine bien concassée, l'espace d'une nuit, pour bailler ladite infusion, apres l'expression faicte en breuuage: telle infusion peut estre aussi faicte au vin blanc ou autre. Ladite racine puluerisée fera d'opiates avec le miel, ou autre liqueur conuenable, ou de pillules, lesquelles outre la purgation, feront grand seruice à mille autres indispositions du corps. Sa dose n'est dans Mesue, de plus que de demy once: & toutesfois Dioscoride en donne avec l'eau mielee iusques à six ou sept dragmes. Nous ne craindrons d'en donner vn once en decoction, six dragmes en infusion, & en poudre de deux à trois.

Fin du second Liure.



DES MEDICAMENS,

OVI OVTRE CE QV'ILS

purgent le corps, ont aussi
quelque pouuoir de
le nourrir.

LIVRE TROISIESME.

De la diuision des alimens.

CHAPITRE I.



Eux la peuvent seulement iuger
de la necessité de la diuision en
nostre medecine, qui sont exercez
en la doctrine de nostre coryphee
Galen, lequel en plusieurs lieux de
ses escrits atteste l'ignorance des Medecins, qui
de son temps estoient à Rome; ne procedet d'ail-
leurs, que de la faute de sçauoir bien & logique-
ment diuiser: qu'est cause que nous, tant pour
euitter confusion, que pour donner à nostre in-
tention quelque lustre de doctrine methodique,
auons fait trois classes des medicamens, qui peu-
uent seruir aux hommes pour les purgations.
En la premiere desquelles nous auons logé ceux
qui ont besoin d'une diligente & artificielle pre-
paration, pour pouuoir avec assurance estre
employez

employez à telle fin: desquels medicamens nous auons parlé au premier liure. En la seconde sont contenus ceux, qui, quoy qu'ils n'ayent aucune accointance avec la complexion humaine: toutesfois pource que leur inimitié n'est pas si capitale que des premiers, ils peuuent estre receus, voire sans grand apprest, ny exacte elaboration manuelle.

Reste maintenant le troisieme membre de nostre diuision, qui est des medicamens, par lesquels, tant s'en faut que nostre corps reçoive quelque ennuy & fascherie, que le plus souuent il se deliacte en iceux: tellement que si la quantité onereuse d'iceux ne l'esueille, leur prise est (touchant ce fait) inutile & friuole, & sont ceux que Galen appelle alimens medicameteux: lesquels afin que nous en discourions plus distinctement, distinguerons en deux ordres, à l'imitation de Galen. Le premier est de ceux qui sont destinez seulement pour la reparation, de ce que de moment en moment est dissipé, de la substance de nostre corps: non seulement par les veilles, trauaux & exercices: mais aussi par l'assidue & indefatigable action de la chaleur naturelle à l'endroit de l'humidité radicale, principe de nostre génération.

*Chap. I. li. I.
de la faculté des
alimens.*

Ce sont les alimens, qui en leur complexion tenans la mediocrité, n'eschauffent aucunement ny refroidissent, ne restreignent le ventre ny le laschent, n'affoiblissent ny fortifient l'estomach, ne prouoquent, ny arrestent les sueurs: brief ne causent en nostre corps aucune alteration, ny

excès, en ce qui depend des premieres & secondes qualitez, ains le tiennent & conseruent au mesme estat qu'il estoit auparauant: moyennant toutesfois que tout ainsi que tels alimens sont temperez, le corps soit aussi correspôdant à leur complexion, car en vain on les administreroit à ceux qui sont esloignez de telle mediocrité, auxquels seroyent plus conuenables les alimens, qui ont quelque qualité contraire à leur intemperature, ou naturelle, ou acquise. Tels alimens sont si peu, qu'à grand peine en pouuons designer aucun, qui soit doüé de toutes les susdites qualitez: & s'il s'en treuve point ne peut estre autre, que le pain, non tel quel, mais seulement celuy, qui est pestri de la farine du froment, avec l'eau simple lequel par antonomasie, nous entendons par le nom de pain. C'est donc ce pain, qui pour tenir la mediocrité entre le froid & le chaud, le sec & l'humide, le cras & le tenu, &c. est estimé le seul, simple & sincere aliment, qui de tout temps a esté tant loüé par les anciens, qu'ils le preféroient à toutes autres viandes, comme la chose qui contient en soy le symbole de toute nourriture. Antonius Pius, vn des Cæsars, (comme on lict dans Iulius Capitolinus) auoit de coustume en sa vieillesse d'vser du seul pain sec à son desjeuner la matinee, & ce pour subuenir à ce qui pouuoit manquer au soustien de sa chaleur naturelle, durant le temps qu'il estoit detenu, pour les affaires publiques. Demetrius Cydonius, selon Athenée, vesquit plusieurs iours de la seule odeur, qui peut expirer du pain chaud recentemente

ment apporté du four. Mais qu'est-il besoin de preuuer la sincerité & bonté de cest aliment, par autre tesmoignage, que de celuy de nostre redépteur Iesus-Christ, lequel pour toutes choses necessaires, à la nourriture de nostre corps, nous admoneste de demander le seul pain ordinaire, comme la plus parfaicte viande, pour la refection corporelle.

Le second ordre des alimens comprend ceux qui outre les susdites qualitez, ont ie ne sçay quoy de propre, qui ne pouuant estre accommodé à l'assimilation & nourriture des parties, elles sont contraintes l'expulser hors du corps, comme chose inutile, trainant quant & soy les excremens les plus esmeus & prest à la purgation. Ces alimens donc ont leur substance meslee & composée, tant des parties nourrissantes, que alterantes, desquelles principalement semble auoir parlé Hippocrate quand il dit, qu'en vn mesme simple, l'aliment & médicament sont trouuez ensemble. Et tout ainsi que des premiers, nous n'auons (comme dit est) quasi que le pain de froment: aussi la varieté de ceux cy & multitude est si grande, que presque tous les alimens, qui nous sont en vsage pour la sustentation de nostre vie, sont de ce genre. De sorte que pour pratiquer tousiours nostre methode, nous les separerons en deux classes. L'une contiendra ceux, qui outre la nourriture, n'apportent autre profit au corps que de l'eschauffer ou refroidir, le dessecher ou humecter: & en somme d'engendrer en iceluy d'autres effets depédans des qualitez manifestes.

*L. de locis
in homine.*

L'autre

L'autre classe sera bastie de ceux, qui ausdites alterations, adiouſtent quelque autre remarquable & inſigné profit, de purger & modifier le corps, de beaucoup d'excremens & ſuperfluitez inutiles, deſquels mon intention eſt de principalement parler en ce troiſieſme liure: le tout pour la confirmation de la propoſition auancee des le commencement, ſur la fertilité de noſtre Pro-
 uence, touchant les medicamens dediez à la pur-
 gation.

Du pain.

CHAPITRE II.

POur le discours des alimens qui ont en ſoy quelque choſe, qui eſt propre pour laxer le ventre: nous commencerons au pain, & afin que nous treu-
 uions mieux en quelle eſpece de pain telle puis-
 ſance eſt contenue. Nous diſons que tout ainſi, qu'entre tous les breuages que les hommes met-
 tēt en vſage, pour ſatisfaire à leur ſoiſ, la liqueur qu'on exprime des raiſins, eſt principalement
 entendue par le nom de vin: ainſi par antonom-
 aſie & excellence, nous attribuons le nom de pain
 à celui, qui (cōme auons dit cy deſſus) eſt fait
 de la farine du froment; entendant par le nom
 de froment ce que vulgairement nous appellons
 annone ou bled, les Latins le nomment *frumen-*
tum: quoy que ce nom ſoit auſſi general, à tous
 les grains qui ſont propres à faire le pain.

C'eſt

C'est donc de ce pain, de qui nous prétendons principalement parler en ce chapitre; combien qu'en passant, nous faisons aussi mention de quelques autres, desquels plusieurs en ce pais se nourrissent, qui sont presque de mesme pouvoir, quant à ce que nous desirons du pain en ce lieu. Nous diuiferons nostre pain avec les bolengers, en trois especes. L'une desquelles est faite de la pure moëlle du froment totalement separee de l'escorce, par le blotier, le plus lie, vny & ferré qu'on puisse treuuer, lequel Hippocrate nomme *L. de l'an-* pur & sincere pain, très-commode & vtile pour *ciene med.* la nourriture de l'homme, estant de facile digestion & coction, se distribuant aussi promptement, sans long seiour aux voyes du mesentere. En ce pain nous remarquons toutes les conditions requises au pur & sincere aliment, plus qu'en nul autre: & quoy qu'il semble endurcir le ventre, (pour autant que ceux qui en viuent sont constumierement constipez) si est-ce que cela ne luy aduient pas de son naturel: ains pour-ce qu'il est des alimens, qui ont beaucoup de nourriture, & peu d'excrement. L'autre espee du pain est de celuy qui est fait de la farine de laquelle on a tiré la fleur, le plus subtil & le meilleur; tellement que le residu est le son avec bien peu de la plus crasse farine, qui sert seulement de colle pour former le pain. De cestuy-cy vse principalement le plebee, & gens de traual: & pourau-tant qu'il est de peu de nourriture, abondent en excremens. De la vient que dix liures de semblable pain à chascue iour, ne sont presque suffisan-tes

tes pour la nourriture d'un rureau : aussi vont-ils trois ou quatre fois du ventre le jour, argument suffisant de l'abondance des parties excrémenteuses qui est en ce pain.

La troisieme sorte du pain est celuy qui est pestri *ex tota farina*, comme dit Hippocrate, c'est à dire de la pure farine, avec le son & l'escorcé ensemble, lequel les Grecs appellent *sincomiston*, comme estant formé sans aucune separation des parties æterogénees de la farine du froment : & combien qu'en ce pain, on ne remarque aucune vertu laxative insigne, & dedice particulierement à quelque humeur : si est-ce toutes-fois, que l'expérience nous fait foy, l'autorité des Medecins anciens & modernes nous tesmoigne, & la raison nous demonstre, qu'à peine ceux la sont molestés de constipation de ventre (de laquelle se plaignent presque tous ceux qui vivent du premier) qui usent de ce pain. Hippocrate donne le pain duquel nous parlons, à ceux qui ont en soupçon l'usage des medicamens cathartiques du premier & second genre, & auxquels neantmoins la liberté du ventre est tres-necessaire, comme à la tierce espece de tables, à la quatrieme maladie des reins, &c. Et depuis que ce pain est plus ou moins purgatif, à cause du son principalement, lequel estant tres-sec & d'une insigne absterfue vertu, est inepte pour la nourriture des parties, auxquelles avant que l'aliment puisse estre receu, & changé en leur substance, doit estre aucunement rendu gluant & tenace : d'où aduient que ledit son estant inepte pour estre transmué en la nourriture

L. des affections intérieures.

nourriture du corps, en est mis dehors comme chose superflue & moleste à nature.

Tellement que de la s'ensuit, que le pain qui a plus du son, est moins apte à nourrir, & plus propre pour laxer le ventre, & au contraire: & cest pourquoy on recommande tant l'usage du pain rouillet, que (comme dit est) les Grecs ont nommè *syncomistos*, les Latins le disent *confusamenus panis*, auquel toute la farine & le son sont confus & meslez ensemble. Quant à moy je louë celuy qui est de la farine, de laquelle on a osté seulement les plus grosses escorces du son, par le bløtter, de tissure assés large, auquel non seulement la farine, mais aussi vne bonne partie du son, aumoins les plus tenues portions, passent facilement: lequel pain est tres-propre, à ceux qui vont rarement à selle, & font de croütes presque semblables à celles des cheures, pour obuier à vne infinité de maladies, suiuant le dire d'Hippocrate, lequel louë grandement la liberté du ventre à telle intention.

On pestrit aussi en ce país du pain de la farine du segle, qui semble auoir mesme puissance de lâcher le ventre, que celuy duquel nous venons de parler. Les Latins entendoient par le nom de *siligo*, non seulement la segle (de laquelle nous parlons maintenant) mais aussi la plus pure & exquise farine, separee de toute l'escorce, de laquelle on fait le pain blanc pour la table, voire des Princes: laquelle farine ne peut estre tirée d'autre grain, selon le tesmoignage de Celsus, de Plin, de Galen, de Collumella, que de celuy qu'on

qu'on entend par le nom de bled ou froment.

Le pain fait de la farine du segle, quoy qu'il ne soit pas si nourrissant, ny tât laxatif, que le rouffet ou sincomiste : toutesfois il n'est pas de mauvais goust, principalement celuy qui est fait aux môtagnes, ou le segle est blanchastre, bien nourry, d'une rondeur & grosseur quasi pareille à celle du froment.

Le pain d'orge n'est pas si gluant que celuy du segle: tât s'en faut qu'il est absterfif, encores plus si l'orge n'est pas du mondé. Entre tous les pains, desquels on use en ce païs, le moins nutritif & plus excrementeux, est celuy de l'espeaute, duquel en plusieurs lieux de ceste prouince, par fois les pauvres sont contrains se soubstenir, nō sans danger d'engendrer disenteries: tant est sa farine absterfue, combien que nous n'ayons aucun remede plus assure pour la guarison des vlcères des intestins, que la farine de l'espeaute, à cause de sa vertu absterfue, laquelle neantmoins, par long & assiduel usage (comme à ceux qui en vivent ordinairement) empescheroit la conglutination desdites vlcères.

Je laisse, pour n'estre long, une autre sorte de grain pour faire pain bis, commun aux montagnes voisines du Piedmont, là où on le nomme besse ou siuade. Pline semble l'auoir entendu par le nom de *olyra*, lors que comparant l'espeaute & la besse avec le froment & la segle, il dit *tritium & siligo ac hardum in area exteruntur; & ea verò, cuius species est olyra, mola exteritur; & cum suis folliculis feritur.*

Retournans à nostre pain rouffet & ordinaire, nous n'entendons point, qu'on le donne à ceux qui sont saisis de la fieure, & mesmement si elle est ardante, ausquels les alimens de peu d'excrement, sont conuenables, ny à aucune des maladies qu'on appelle aigues, hormis à celles qui retournent par periodes, ausquelles la chicheté du ventre est tres-dommageable. Dauantage de ce pain doyuent estre exclus tous ceux qui ont naturellement le ventre libre, qui ont l'estomach foible, ausquels est plus cōuenable le pain blanc fait de la pure farine. Ceux qui se treuuent offencés du pain mediocre & neantmoins se plaignēt ordinairement de la constipation de leur ventre, en doyuent seulement manger quelque peu à l'entree de table. On a par experience, que rarement arriue, que celuy ne descharge son ventre le iour mesme, qu'il aura prins long temps deuant disner certaine portion du pain mediocre.

Des lentilles.

CHAPITRE III.

N On seulement les autoritez des Medecins anciens nous assurent, qu'en vn mesme simple se treuuent de puiffances differentes & contraires: mais aussi l'experience ordinaire le demonstre à l'œil. Laquelle chose est digne de consideration, qu'un mesme simple (auquel les sentimens ne peuuent

remarquer aucune compositiō ny dissimilitude) aye neantmoins le pouuoir de nourrir, purger & esmouuoir le ventre, l'ouurir s'il est trop fermé, l'arrester lors qu'il est trop desbordé. Et pour autant que cecy sont des effets procedans des qualitez secondes, faut necessairement qu'en ce mesme simple telle contrariété & dissimilitude aye lieu à celles que nous disons premieres: tellemēt qu'en vn mesme medicament on treuve la force d'eschauffer & refroidir, d'humecter & desscher, d'attenuer & incrasser, & de semblables operations. Et d'autant qu'il est impossible que d'une chose du tout sincere & simple, procede telle contrariété & diuersité d'actions; faut necessairement conclurre, que quoy que nos sentimens ne puissent apperceuoir aucune difference ny dissimilitude en tels simples medicamens, qu'ils sont toutesfois corps eterogenes, composez de plusieurs & diuerses parties. Cela est manifestement pratiqué au lait, lequel encōres qu'il soit en apparence, deuant sa coagulation, tres-simple, toutesfois en iceluy se treuuent plusieurs, diuerses & repugnantes facultez, d'autant que les vnes purgent, les autres arrestent le ventre: les vnes nourrissent, les autres ne font qu'alterer; les vnes eschauffent, les autres refroidissent; les vnes humectent, les autres dessechent; les vnes incrassent, les autres attenuent. Quelle chose y a-il moins composee & plus simple à l'œil, que le vinaigre: & toutesfois on treuve en iceluy double puissance, vne qui refroidit, l'autre qui eschauffe manifestement, quoy que la froideur

dure

dure excède de beaucoup la chaleur en iceluy. Aussi la partie où gist ceste vertu eschauffante est bien peu de chose au respect de l'autre.

*Gal. ch. 32.
li. 1. simpl.
med.*

Qui est celuy, qui s'arrestât seulement au sens, diroit que les eaux des bains naturels, de mesme couleur, de mesme consistance, de mesme mouvement que les autres, qu'elles eussent autres puissances, que de refroidir & humecter, comme ont toutes les autres? cela nous deuroit raver en admiration, pour contempler tousiours la bonté & providence de Dieu, d'avoir si bien enrichi la terre uniuerselle de remedes, que d'un mesme, nous en pouuons tirer mille commoditez.

Ceste diuersité de puissances est aussi manifeste en aucuns legumes, comme aux lentilles, aux pois, aux ciches: quant aux lentilles, tous les auteurs tant Grecs que Arabes, tesmoignent que d'autant qu'elles sont composees de diuerses substances, elles ont aussi diuerses & contraires facultez. Hippocrate dit que les lentilles prises avec toute leur escorce, engendrent vne

*Sent. 93.
Sect. 4. lib.
de dista
cent. Gal.
in comp.*

facheuse perturbation d'estomach, à cause (comme Galen l'interprete) de la diuersité de leurs substances & facultez. Oribase recognoit aux lentilles, vne puissance laxative, coniointe avec l'astringente, non en la farine mais en l'escorce. Paul Aeginette est de ceste opinion, disant que le premier bouillon des lentilles, est solutif & l'autre au contraire. Isaac vn des plus rares Medecins entre les Arabes, confirme ceste opinion, disant que les lentilles sont composees de deux natures cōtraires,

l'une se treuve en la moëlle, l'autre en l'escorce. Quant à la moëlle, il est d'accord avec tous les autres qu'elle est stiptique & adstringente, d'où vient qu'elle restreint le flux de ventre, tellement que l'on est empesché de trouuer où gist ceste vertu laxatiue aux lentilles: laquelle vertu, neâcmoins tous les Medecins, comme dit est, confessent, & l'experience ordinaire le demonstre: & depuis qu'elle ne se trouue point en la farine, Pierre Espagnol commentateur d'Isaac, estant en recherche, en fin dit l'auoir trouuee en l'escorce: disant qu'en ceste escorce, on a experimeté deux substances; l'une qui est superficielle, chaude & seche, ayant certaine acuité & acrimoine, d'où il pense que ceste vertu laxatiue prouienne: l'autre profonde & enseuelie au centre, qui a plustost vertu adstringente, que solutiue: & de là vient que le premier bouillon des lentilles est solutif de soy-mesme, & encores plus si on adiouste de l'huile & du sel. Hippocrate les appreste avec les aux & le vinaigre, non seulement pour dissoudre certaines flatuositez qu'elles pourroyent engendrer: (ce qu'elles ont de commun avec les autres legumes) mais aussi pour attenuer leur crassitude, inciser ce qui est en elles de gluant & tenace: & par ce moyen augmenter la vertu laxatiue. A quoy sert aussi de beaucoup, si à tout cela nous adioustons les blettes ou berres, à l'exemple d'Hippocrate nous auons de coustume d'adiouster la fumeterre, ou la mercuriale: ce que nous auons dit cy dessus des lentilles, peut estre aussi accommodé aux ciches & aux poix,

*Lib. de in-
sernis af-
fectibus.*

poix, mais en diuerse consideration: car combien que le premier bouillon des ciches soit solutif, comme celuy des lentilles, si est-ce qu'il est tout autrement aux noix: car en iceux la vertu laxatiue est en la moëlle & non en l'escorce, comme aux deux premiers. Cela est verifié par la puree faicte de la farine desdits noix, laquelle pour estre assés incisive, attenuatiue & laxatiue, est vtilement concedee à ceux qui sont trauallez des fieures quotidiēnes, aux tierces non legitimes, aux quartenes, & semblables maladies qui ont leur amorce en quelque humeur cras & gluant: & toutesfois la decoction desdits noix, tant premiere que seconde, est plustost adstringente que laxatiue, depuis que selon Galen & Oribase les noix sont du tout semblables aux febues, hormis en la puissance abstersiue, laquelle ils ne cognoissent point aux noix: & les flatuositez, qui ne sortent tant abondamment de ceux cy comme des febues.

Donc des lentilles pour auoir leur vertu laxatiue nous prendrons la premiere decoction, laquelle vertu augmenterons, en adioustant quelqu'un des medicamens descrits au second liure. La mesme premiere decoction nous prendrons des noix ciches, laquelle est aussi plus propre pour ouurir les obstructions, prouoquer les vrines, exciter les mois aux femmes, que pour purger: mais des noix nous prendrons la moëlle separee totalement de l'escorce, de laquelle ferons vne sorbition ou humet tres-accommodé aux susdites intentions.

Du fœnugrec.

CHAPITRE IIII.



LA plante du fœnugrec ou senegre, peut estre aussi bien cultiuee en ce pais, que plusieurs autres plus estrangeres: c'est la cause pourquoy ie l'ay voulu renger en ce catalogue, estimant tout cela nostre, qui peut viure & croistre en nos parterres. Bien s'esbahyra quelqu'un, que i'en parle en ce lieu, qui a esté reserué aux simples, ayans outre la vertu laxatiue, quelque portio propre pour la nourriture: ioint aussi que Galen tesmoigne, que les lentilles, le miel, & le fœnugrec, se donnent non pour alimenter & nourrir le corps, mais seulement pour remedier à quelques indispositions du ventre.

*Com. en la
sent. 18.
sect. 1. de
victu in
acutis.*

Ce que i'ay fait à l'imitation de Galen, qui en toutes choses a esté suiui par Oribase & par Paul Æginette, quoy qu'en cestuy cy on ne lise point qu'il attribue la vertu laxatiue au fœnugrec. Donc l'autorité de ces anciens & celebres Medecins confirmee par l'experience ordinaire, demonstre qu'au fœnugrec se treuve certaine vertu laxatiue, par laquelle les intestins sont irritez & esmeus, à l'expulsion des excremens en iceux contenus: tellement qu'on ne scauroit trouuer aucune superfluité d'humeurs en iceux, qui ne puisse estre purgee par la decoction de ceste graine, iointe au miel: & quand à ce que Galen
au liure

au liure de la diete aux maladies aiguës, dit que le fœnugrec se donne seulement au lieu de médicament simple, & non point pour aliment. Galen en ce lieu parle des choses conuenables à la diete desdites maladies, de laquelle reiettant tous les legumes, pour estre iceux de crasse substance, fait comparaison de la ptisane avec toutes les sortes des fromens, legumes & graines, appartenant à Ceres: lesquelles sont toutes inferieures à ladite ptisane, à cause qu'elle contient en soy toutes les qualitez requises à la curation de la fieure. Quant au fœnugrec il est bien vray qu'il a en soy quelque chose pour la nourriture & pour la purgation: mais pour-autant qu'il est plus chaud & acré, qu'il n'est expedient aux maladies aiguës coniointes avec la fieure: à iuste occasion Galen le chasse de sa diete.

Or qu'au fœnugrec se treuve quelque portion, qui puisse seruir d'alimēt au corps humain, Galen s'y accorde, depuis qu'il le décrit au liure qui est seulement dedié à la faculté des alimens. Oribase est de ceste opinion, car il le met en mesme rang entre les mangeables: & d'autant qu'au fœnugrec se treuuet de parties crasses, qui pourroyent estre cause de son trop long seiour dans l'estomach & en la premiere region: ils le baillent tantost meslé avec le miel, tantost avec le vinaigre & l'huile, tantost avec le garon, qui est vne faulx pour le iourd'huy encores vñte en Turquie, composee de la saumure des entrailles de certains poissons: car l'artifice à cela de propre, d'accómoder les choses & les rendre capa-

CA. 12. li.

bles de nourriture, lesquelles autrement estoient esloignees de la complexion humaine. Estant donc le fœnugrec des medicamens alimentaires, voire de ceux la qui ont quelque puissance laxative, à bon droit il est rangé en ce catalogue, & pourautant que la decoction du fœnugrec est en fin rendue si gluante & mucilagineuse qu'elle pourroit estre en horreur aux plus delicates, & inepte d'estre receuë en breuuage, nous auons accoutumé de faire vn opiate d'icelle avec le miel, laquelle outre le seruice qu'elle fait pour le regard de la purgation, est tres-vtile aux infirmittez de la poitrine, qui sont exemptes de fièvre, & à la toux inueterée: autant en fait (selon Isaac) la farine dudit fœnugrec, prise aussi avec le miel, ou le vin cuit & resiné, ou autres semblables liqueurs. La vertu d'iceluy pourra estre augmentee, par l'addition des autres descrits au premier & second liure.

De la manne.

CHAPITRE V.



Ve la manne soit vn espece des medicamens desquels nous traitons en ce liure troisieme, il est tesmoigné non seulement par sa douceur suauë & plaisante coniointe avec la vertu laxative: mais aussi parce que le peuple Iudaïque en a esté (selon le tesmoignage des lettres sacrees) medicamenté

camenté & nourri par plusieurs années. Mais pource que quelqu'un pourroit mettre en doute, si la manne que nous mettons en besongne pour les purgatiōs, est de mesme espeece, que celle que nostre Seigneur donna au peuple d'Israël, l'espace de quarante années pour leur nourriture, il ne fera hors de propos d'expliquer ceste difficulté, les ratiocinans pour la partie negative, disant estre impossible, qu'avec vn tel aliment ayant vertu laxative, ils eussent peu nourrir & entretenir leurs corps en vigueur & fermeté: veu que ceux qui par long interuallé de temps vsent d'alimens si legers & de si peu de corpulence, tombent en fin en vne dissolution & foiblesse extreme. Laquelle opinion Hippocrate semble auoir fauorisee, au liure des medicamens purgatifs, disant que les viandes legeres & de peu de substance, n'engendrent point vne ferme & solide chair, & ont avec la puissance de nourrir aussi vne vertu laxative. Ceste sentence combien que semble auoir quelque apparence de verité: toutesfois voyant que la generation de la manne des Hebreux, est semblable à la production de la nostre: il est vray semblable, que toutes deux sont de mesme espeece, voire & de mesme matiere, cōme il appert par le tesmoignage de Moÿse, disant que la manne *descendebat noctu in castra cum rore*, & d'abondant au liure de l'Exode *apparuit in solitudine minutum & quasi pilo tustum, in similitudinem primæ super terram*: & quant à la dissolution & foiblesse, de laquelle eux mesmes se sont plains plusieurs fois comme il appert au liure

Chap. 16.

Chap. 21.

des Nombres, difans. *Anima nostra iam nauſcat ſuper cibo iſto leuiſſimo*: il ne ſemblera impertinent de dire que ceſte viande au commencement leur peut auoir ſerui comme de remede pour la purgation des excremens deſquels ils auoyent fait auparauant grand amas, eu eſgard aux alimens deſquels ils ſ'eſtoient nourris en *Ægypte*, comme des aulx, oignõs, cõcombres, melons, & ſemblables viandes cacochimes: mais que par le laps du temps, leurs corps eſtans bien purifiez, ſe ſont ſi bien accouſtumez à telle viande, qu'en fin elle n'a ſerui que de pur & ſimple aliment, ſans aucune contrarietẽ ny controuerſe. Laquelle ſentence ne doit eſtre trouuee eſtrange, depuis que la couſtume eſt de telle efficace, qu'elle peut faire, que non ſeulement les medicamens, mais encores les venins, ſeruiront de viande, pour le ſoutien des hommes, voire des plus delicats.

Reprenans donc la manne, ſemble de prime arriuee, que nous ne la pouuõs dire noſtre, pour-
 autant que n'eſt pas tout vn d'icelle que des autres medicamens, leſquels quoy que ſoyent forains & eſtrãgers, nous les pouuons neantmoins faire noſtres par la culture. Mais la manne eſtant engendree, ſelon Galen, des vapeurs ſortans tant des lieux terreſtres, que aquatiques, leſquelles vapeurs eſtant pareillement atteneues, cuites & elaborees, par la vertu du ſoleil, ſont en apres, moyennant la froidure de la nuit amañees en vn & cõgelees. De forte que (comme dit Moyſe) elles tombent de l'air comme la pruiue en forme de coriandre: ioint auſſi que nos Apothicaires la
 recou

L. 3. de la
 facult. des
 alim.

L. des Nõ-
 bres.

recourent aujourd'huy des estrangers, ce que seroit absurde, s'ils la pouuoient auoir du cru de ce pais: semble par ces raisons ne se pouuoir faire; que la manne soit iustement nombree entre les nostres.

Toutesfois ie n'ay pas pour cela eu crainte de la mettre en mon catalogue, tant pource qu'elle s'engendre aux montagnes du Dauphiné, & de Piedmont, voisines de nostre Prouëce, que pour autant que les montagnes de ce pais n'en sont pas tousiours destituees, & encores la trouue-on assés souuët au bas pais: car on en a veu plusieurs fois les saules chargez au terroir de Pertuis, & moy-mesmes lesay veu distiller la mäne douce, laquelle la chaleur du soleil ayant liquefice & fonduë, tumboit goutte à goutte, tellement que lon en eusse peu remplir plusieurs vases, & pouuoir dire, que nous auons la manne liquide, que Serapion, & les Arabes appellent tereniabin, ne faisans autre difference entre icelles, sinon que l'vne est liquide comme le miel, & l'autre est amallee en petis grains. Ne faut point douter que la manne ne s'engendre toutes les annees en plusieurs parts de ce pais, mais la coustume inueterree de nous seruir des medicamens estrangers, principalemēt aux purgations, fait que tant s'en faut que nous mettions peine d'en experimenter tousiours quelqu'un, pour satisfaire à nostre curiosité, que plustost nous laissons en arriere, ceux qui sont long temps y a cogneus & approuuez. Les bergers & ceux qui paissent le bestail aux champs, sous la canicule (car alors, seló Pline,

la man

la manne s'engendre le plus) tesmoignent qu'à l'aube du iour, ils ont veu plusieurs fois les arbres & herbes chargees de ceste rousée celeste: & encores affirment auoir tres-souuent apperceu leurs habillemens comme oincts & moëttes, & leurs cheveux tous prins de ceste liqueur.

Nous laisserons donc l'usage de la manne Brigantine; & de celle de Calabre, & mettrons diligence de faire cueillir la nostre, laquelle accommoderons pour la purgation de la bile (qui est l'humour qu'on luy attribue) en la forme qu'il nous semblera estre plus necessaire, n'ayant esgard en aucune correction, veu sa benignité & douceur: tant s'en faut que coustumierement on l'accompagne avec quelque medicament, de plus de vigueur, (comme est l'elaterion, Mesue dit que Galen l'adioustoit avec l'escammonee, quoy que nous ne le lisions dans ces œuvres, ou des mediocres, comme est l'agaric, &c. Parquoy il n'y a aucune circonstance qui empesche l'exhibition de la manne: & mesme qu'elle se peut donner aux petits enfans, aux femmes enceintes, voire deuant & apres le quatriesme mois. Mesue donne la sienne en dose de six à quinze dragmes: de la nostre s'en peut donner aux petits enfans iusques à vne once, aux grandelets, iusques à douze dragmes, & aux plus auancez, la dose passera trois onces.

Le moyen de la dōner est, qu'il la faut dissoudre en quelque liqueur commode, comme pourroit estre le bouillon d'un poulet, ou de quelque vne des herbes refrigeratiues, adioustāt quelque

que peu d'absinthe. Aux enfans qui sont encores au laiçt on en dissout demy once, ou six dragmes, & iusques à vne once, dans le laiçt de leur nourrice: & quant à la forme pillulaire, pource que ce médicament ne peut pas estre donné en petite dose, à cause de la benignité, on n'a pas accoustumé de l'accommoder en la manne, ny en aucun autre de ce calibre: si ce n'est que l'on vult adiouster quelque portio des autres plus vigoureux. La manne est aussi accommodable en consistance d'opiate, incorporée avec le ius de la mercuriale ou des blettes, ou de l'absinthe, ou de la fumeterre, vn ou deux desdits ius, conioints avec quelque portion de miel, pour la conseruation: brief nous pouons faire prendre à nostre manne telle vigueur que bon nous semblera, & en telle forme que nous verrons estre plus conuenable.

Du petit laiçt, autrement appellé la mesgue.

CHAPITRE VI.



Ombien que le laiçt soit composé de plusieurs diuerses substances, reuestues de qualitez cōtraires: elles sont neantmoins d'vn tel accord coniointes & vnies ensemble, que de leur appointement nous voyons resulter vne très-suaue & amiable douceur, laquelle nature preuoyante a preparee aux tetins des femelles, pour le soustien & nourriture

riture des petits recentemente produits au monde. Ceste liqueur est de tât plus plaisante, & avec plus d'auidité attirée par la succion des petits animaux, d'autant qu'elle est triplement semblable à ce, dequoy ils sont esté façonnez & nourris en la premiere generation. Ceste meslange de diuersité de substances est séparée par le moyen du caillé, qu'en Prouence on nomme presure, laquelle faict, que chascque partie est reduitte en son lieu naturel: d'où nous voyons qu'après la coagulation, les parties plus terrestres occuper le fons du vase, les aërees nager en la surface: & celles qui plus participent de l'eau, tenir le milieu. La premiere est celle que nous appellons fromage, la seconde est le beurre ou cresse, & la troisieme le petit laiët, ou le mesgue, & en Prouençal gaspe ou lachade. Sont les trois parties du laiët, desquelles Galen a seulement parlé, tellement qu'il semble auoir obmis la recuite, si ce n'est qu'il la vueille dire de mesme nature que le fromage: laquelle toutesfois, est si bien liée avec la substance sereuse du laiët, qu'elle n'en peut estre disioincte, que par la violence du feu: ce que me fait dire qu'elle n'est pas du tout tant terrestre, que la partie du fromage. Reprenant donc nostre mesgue, il faut au preallable liquider, de quelle nous entédons parler: depuis qu'il y a autant de sortes de mesgue, comme d'especes du laiët. Presupposeròs que le laiët, duquel nous voulons tirer la mesgue, doit estre, tant qu'il est possible, doüé des qualitez q̄ Galen luy attribue, toutes remarquables par les sentimens extérieurs.

Premie

Premierement doit estre de bonne & suave odeur, plaissant au goust, par vne saveur mediocrement douce: seconquement doit avoir la couleur blanche, quoy qu'Aristote (sauf correction) appreuue la liuidité, tant au lait, qu'à la nourrisse: troisiemement doit tenir le milieu entre le liquide & le cras, touchant sa consistence: tellement qu'une goutte mise sur l'ongle (selon l'experience de Dioscoride, & apres luy de Paul Aeginette) s'entretienne en sa rondeur, sans couler ny çà ny là: tel est le lait des bestes, qui sont bien temperées, qui ne sont ny malades, ny vieilles, ny nourries de mauuaise pasture. Ces choses supposees reste encores d'examiner, de quelle espee de lait nous deuons choisir la mesgue: car il est certain que toutes les sortes de lait ne sont pas sereuses d'une mesme façon, d'autant que l'experience nous fait foy, q'celuy des brebis en a beaucoup moins que les autres, comme aussi celuy des vaches. Quant au lait des femmes, il est plus propre pour la nourriture que pour la purgation: aussi est-il plus temperé que les autres: & on n'a pas accoustumé d'en tirer le *serum* pour cest effet. Galen assigne trois ordres du lait, qui abonde plus en mesgue: au premier il met celuy des chameaux comme le plus liquide de tous: au second le lait des iumens: & au troisieme celuy des anesses. De sorte que si la faculté purgatrice du lait, procede de la partie plus liquide & sereuse, il est vray semblable que celuy qui en a le plus, est plus propre pour les purgations: il n'est pas

Ch. 21. l. 3.
de l'hist.
des ani-
maux.

Ch. 15. l. 3.
de la faculté
des ali-
mens.

pas aussi tousiours vray que toutes les mesgues, de quelque laiët qu'ils soyent, ayent esgale puissance laxatiue : car on sçait bien que le *serum* du laiët des brebis ne purge presque point, à cause (à mon aduis) que la puissance solutiue est retenüe par la recuite, laquelle est plus copieuse en ce laiët, qu'en aucun autre: car lors qu'elle en est escumee, nous voyons par sa prinse, les effets de la purgation si insignes, qu'on diroit que ceste liqueur est plustost du premier ou second genre des medicamens, que de celui que nous auons maintenant en main. Et pourautant qu'on auroit en horreur le laiët des iumens, & aussi qu'en ce pais n'auons point de chameaux : nous choisirons la mesgue du laiët de cheure, comme de celui qui tient la mediocrité entre les autres touchant la partie sereuse, & duquel nous vsions le plus en ce pais pour ce regard.

*Cha. 7. Ls.
de la santé.*

La cheure donc (comme dit Galen) ne doit estre ny trop ieune, ny trop vieille, mais d'un aage florissant, & bien habituee, sans aucune tache qui interesse sa santé : & pource que les cheures nourries aux champs, se paissent coustumierement de chaisne, du lentisque, d'oliuier sauuage, du terebinthus, d'aubespın, & autres alimens astringens : de là vient que leur laiët n'est pas tant laxatif. Auquel cas sera meilleur d'entretenir la cheure dās la maison, & la nourrir de malues, de blettes, de la mercuriale, des violettes, & semblables, ou à tout le moins la ferons paistre dans les prez & campagnes vuides desdits arbres : car il est tres-assuré, que le laiët retient le naturel

naturel des herbes, desquelles le bestail est nour-
ry : tellement que de tant plus ou moins le lait
est rendu laxatif, d'autant que l'animal vsera des
plantes plus ou moins laxatiues. Quant aux com-
plexiós du mesgue, ie n'ay que faire pour le pre-
sent de m'arrester en la question d'Auicenne &
de Galen, desquels l'un tient, qu'elle est chaude,
(Mesue adiouste la siccité:) l'autre affirme qu'elle
est froide & humide. Me suffit d'auoir la vertu
purgatrice, pour laquelle seulement ie la veux
mettre en besongne: bien est vray que si elle a
quelque chaleur, la faut plustost rapporter au
caillé, qui est de semblable temperature à celle
du leuain, qu'au propre naturel du mesgue. Les
humeurs qu'elle purge sont les choleriques &
les adustes, lesquelles elle euacue si doucement,
que Dioscoride la donne à ceux qui ont besoin
d'estre purgez, sans grand trouble, ny acrimo-
nie: pour ceste cause on le donne coustumiere-
ment aux melancholiques, aux galeux, & à tou-
tes maladies du cuir. Outre la puissance de pur-
ger lesdites humeurs, le mesgue est aussi capable
de tous les autres: car en luy commodemét nous
macerons les medicamens de quelque genre
qu'ils soyent: de sorte que si nous voulons pur-
ger la bile avec plus de vigueur, nous trempérons
dans icelle mesgue de roses, ou recentes ou se-
ches, de l'absinthe, de la mercuriale, &c. & si en-
cores voulons augmenter la purgation, adiou-
sterons en ceste infusion, l'elaterion, ou vn des
cocombres sauage, ou bien vne ou deux des
fueilles. Pour la piteite, macererons l'agarc, la

2. canon
chap. 17.
Liu. 4. des
facul. des
simp. med.

brionia, &c. pour la melancholie, la fumeterre, l'epithime, l'ellobore noir, &c. Quant à la dose elle est variable, pour raison de la mesgue mesme: car si on le donne sans auoir separé la recuite, ny sans aucune infusion d'autre medicament, la dose doit estre d'une à deux liures, & dauantage; mais de celle qu'on aura separee de la recuite, la dose doit estre beaucoup moindre: quant aux infusions, la quantité de la mesgue doit estre augmentee, ou diminuee, pour le regard du medicament qui est en icelle maceré,

Du ius du cog enuieilli.

CHAPITRE VII.



Insi que toutes les choses creées cy bas, en l'un & l'autre emisphere, ont leur duree plus ou moins longue, & icelle distinguee par la diuersité des aages: de mesmes nous remarquons en telle diuersité d'aages, tousiours natures diuerses, toutes neantmoins tres profitables à celuy pour qui le tout a esté fait. Si telle varieté est manifeste en aucunes choses composees des quatre natures, que l'on appelle elements, elle l'est aux animaux, desquels aucuns en leur bas aage, ne seruent que d'aliment, & deuenus vieux, changent presque du tout leur premier naturel, & d'alimens quasi simples, deuiennent medicamens. Ceste diuersité de puissances & changement d'aages, ne procede

cede d'ailleurs, que de l'assidue, & indefatigable action de la chaleur naturelle, à l'endroit de l'humidité radicale, principe de nostre generation: laquelle action fait, que les choses qui à leur origine estoient tres-humides, deuiennent en fin en vne extreme & irreparable secheresse. Or le terme de ceste secheresse, est plus ou moins distant de son principe, eu esgard à la qualité de la chaleur agente, & la disposition de la substance, plus ou moins dissipable de l'humidité première: tellement que nous voyons que les choses ont leur aages de plus d'annees, & leur fin plus distante de l'origine, auxquelles l'humidité radicale, resiste plus long temps au degast de la chaleur naturelle. D'où nous tirons ceste consequence, que les aages pourroyent estre prolongez, & le changement des temperamens réussiroit, pourueu que telle dissipation peussent estre retardee: laquelle retardation combien que puisse aucunement estre faite par le regime de viure, selon les preceptes de medecine: si est-ce qu'il n'y a (à mon aduis) aucune chose à cela plus conuenable, que la castration: car elle est de telle vertu, que non seulement elle change les aages & temperamens des animaux, mais aussi fait qu'ils acquierent vne autre forme, & laissent les mœurs pristines, pour s'orner de toutes nouvelles habitudes: comme nous le voyons manifestement estre pratiqué aux moutons, bœufs, pourceaux, cheures, & presque en tous les animaux, tant terrestres, qu'en ceux qui ont ailes, & principalement aux coqs: lesquels apres leur chastrement,

*Arist cha.
2. litt. 9. de
l'hist. des
animaux.*

& à leur ieune aage, sont de bon suc & loüable aliment. Mais s'ils sont laissez en leur entier l'espace d'un, de deux, ou dauantage d'annees, leur naturel est si bien changé, qu'en iceux la vertu nutritiue, est surmontee par la faculté purgatrice: & si bien que celuy qui au commencement, auoit vne moderee, & loüable humidité, se trouue en fin sec, iusques au troisieme degré. Nous auons laissé l'usage du bouillon d'iceluy, quoy que les Grecs & Arabes (que tant volontiers on imite en praticant) en ayent fait grande estime: Mesue apres Dioscoride, Galen & Oribase, l'a mis en son premier catalogue des medicamens purgatifs: à l'exemple desquels, veu aussi que le cocu enuieilli est facile à recouurer: (mesmemēt là où la gendarmerie n'a passé) ie l'ay voulu inserer en ce tiers ordre des medicamēs qui ont pouuoir de nourrir & ensemble de purger le corps: combien que c'est bien peu de chose en luy la portion alimenteuse, principalement lors qu'il est en l'extreme vieillesse. Auquel toutesfois, tout ce qui est de vertu purgatrice, passe entiere-ment au ius d'iceluy par la longue elixation: laquelle le despouille de la nitrosité & saleure, que par longues annees il a acquis: tellement que le residu de la chair, peut aucunement seruir de nourriture, ayant nean: moins plus de siccité que d'humidité en soy: car comme tres bien est dit par Aristote: les choses sont rendues plus seches par l'elixation, eu esgard à leur premiere humidité. Quant à la faculté laxative de ce ius, il est vray que Galen (selon qu'il dit) l'a experimentee: mais

*Gal. cha. 1.
l. de la
ther. à Pi-
son.*

*Ch. 3. l. 4.
meteor.*

*Lin. 9. des
simp. med.*

mais

mais qu'il aye designé, ny l'election, ny l'apprest du coq, nous n'en trouuons pas vn mot en toutes ses œuures: quoy que Mesue semble le vouloir enseigner selon l'ordonnance de Galen: disant que le coq, que nous voulons employer à cest vsage, doit estre fort viel, rous, ny trop gras ny trop maigre, vitte, prompt & gaillard en tous ses mouuemens, principalement au combat, & à l'acte de la generation.

L'apparat du coq selon les anciens est tel, que premieremēt il doit estre nourri quelque temps avec le son seulement, ou bien adiouster du miel & quelque peu du sel commun: secondement l'ayant trauaillé, ou par le combat, ou autrement, iusques à l'extreme lassitude, le faut esgorger: en apres estant deplumé & esuentré, il le faut farcir du sel commun & le faire bouillir, en competente quantité d'eau, iusques à ce que les deux parties de ladite eau soyent consommées. Tous les auteurs tant Grecs, Arabes, que Latins qui en parlent, confessent la puissance laxatiue du coq, ainsi préparé: mais de quelle humeur, personne n'en dit mot: tellement qu'ils semblent sentir le mesme de ce ius, que nous recognoissons au petit lait, disans que ce sont liqueurs tres-propres, pour receuoir les impressions & puissances des autres medicamens, quoy qu'en ce ius on remarque aussi certaine & notable faculté purgatrice: c'est pourquoy, nous adioustons à la decoction du coq, nostre turbith, le carthame, &c. pour la purgation de la phlegme, le polypode, l'epithyme, pour la melancholie, & pour dissoul,

dre & chasser les ventositéz, les semences carminatiues.

Nous, pour les purgations legeres & faciles nous contenterons, du potage préparé comme dessus: toutesfois si l'occasion requiert d'vser des mediocres medicamēs, pour purger les humeurs crues & rebelles, tant melācholiques que phlegmatiques, l'appresterons ainsi. Premièrement l'ayant choisi aagé de 4. ans, & traouillé, comme dit est, tué & nettoyé, le farcirons de demy once, ou de trois dragmes de sel commun, d'une once de graine du carthame, de l'un ou de l'autre polypode recent, & d'hysope. Adiousterons aussi demy once de graine d'anis, de fœnouil & de charuis, & de trois dragmes de nostre taphia. Ledit coq ainsi farci, bouillira en douze liures d'eau iusques à la moitié, & de ceste decoction suffira en donner, de quatre à six onces, aux douleurs de ventre, aux gouttes, aux figures intermittentes, &c. ceste dose ne sera pas suffisante en la decoction du coq sans le farcir, comme dit est: laquelle augmenterons, non toutesfois tant que Mesue faict, qui en donne iusques à trois liures.

Des

Des prunes.

CHAPITRE VIII.



Ntre les medicamens aliméteux, qui ont aussi quelque puissance d'esuacuer le ventre, les prunes sont des plus insignes, tres-familieres, & domestiques: la dispute desquelles, combien que ie pourrois dilater par plusieurs diuisions, desquelles leur genre est capable (comme sont celles qui sont prinſes de la couleur, ſauſeur, durté, molleſſe, figure, magnitudé, ou du païs où elles croiſſent: toutesſois pour euitér prolixité, j'ay delibéré de m'arreſter à ce qu'eſt plus conuenable à noſtre intention & ſcope: laiſſant donc les prunes ſauuages comme inutiles aux purgations, ayans pluſtoſt vne inſigne puissance de reſſerrer, nous mettrons en ieu les domestiques: ayant aupreallable ſuppoſé, que les recentes & meures, ſont beaucoup plus laxatiues, que les vertes & ſeches. Les vnes pour n'auoir, moyennant la chaleur exterieure, coniointe avec l'interieure, aſſés elaboré leur humidité, ny icelle exactement meſſée avec les parties terreſtres: les autres, pour auoir perdu la meilleure partie de leur vertu laxatiue, qui conſiſtoit en certaine humidité ſuperflue & tres-abondante. Ceste humidité & vertu laxatiue, ſe recouure aucunement par leur maceration, & legere ebullition en l'eau: & meſme, qu'Oribasé tient, qu'elles laxent le ventre

Ch. 29. l. 3.

aussi bien & voire mieux, estant ainsi macerees, que les fresches & recentes. Ledit Oribase les mouille dans l'eau mielee, estimât par ce moyen, que la vertu lenitiue (qu'il appelle) leur soit restituee, & encores augmentee, pourueu qu'avec les prunes l'on hume aussi ladite eau quelque temps deuant le repas. Ce que j'ay voulu adiouster, pour satisfaire à plusieurs auxquels les prunes ne laschent point le ventre, quoy qu'ils en vsent ordinairement à leurs repas & à l'entree: car si on les veut rendre laxatiues, elles ne doyuent estre meslees avec autres viandes, ny mesme avec le succe: le mesme nous concluons des meures, des cerises, des pesches & arbricots, & en somme de tous les fructs de semblable humidité acqueuse. Retournans donc à nos prunes domestiques, sans auoir esgard à leur couleur, forme, pais, ny autres circonstances semblables, nous choisirons les douces, pourautant que les aigres sont plus propres pour esteindre la soif, & moderer la chaleur de la fiere, que d'apprester l'issuë à la bile, qui est la principale cause des fieures ardentes.

L'experience ordinaire nous apprend, que les prunes douces, de quelque espee qu'elles soyent sont tres-profitables, à ceux qui sont trauaillez de fieures aigues, tant pour raison de leur puissance solutue, que pource qu'elles sont doüees de qualitez totalement opposantes à la chaleur excessiue de la fiere, & à la siccité, qui la suit quant & quant: c'est donc tout vn de prendre, à ceste intention les prunes de quelque espee que soyent,

foyent, pourueu qu'elles foyent douces : toutes-
 fois nous celebrons grandement en ce païs, cel-
 les que Ruel nomme *perticonia*, lequel nom auôs
 retenu. Aëce les appelle *iberica*, à cause, que (com-
 me on dit) elles vindrent premierement en Es-
 pagne, auxquelles les imperiales ne semblent
 en bonté, ceder en rien: si est-ce toutesfois, qu'à
 cause qu'elles ont leur chair plus rude, compacte
 ou amassée, & plus sèche, leur vertu laxatiue est
 beaucoup moindre. Celles de Brignole sont en
 grande estime, non seulement en ce païs : mais
 aussi par toute la France, combien que nos perti-
 gonnes, tant communes & abondantes en ce
 païs, ne leur cedent en rien : possible aussi que
 celles de Brignole ne sont autres que pertigon-
 nes, mais (comme il est vray semblable) l'abon-
 dance leur a donné tel bruit. S'il aduient qu'il
 soit necessaire d'augmenter la vertu laxatiue aux
 prunes, nous auons moyen de ce faire pour la
 meslange de quelqu'un des medicamens laxatifs
 du premier ou second rang: & à ses fins nous fe-
 rons, à l'exemple de Nicolas, deux sortes de la
 composition appelée le *diaprunum*, l'un simple,
 l'autre composé: pour le simple prendrons cent
 (plus ou moins) des prunes douces, de quelque
 genre que foyent, lesquelles ferons bouillir en
 esgale quantité d'eau, (tant que lescites prunes
 en foyent couuertes) iusques à la consommation
 de la troisieme partie de ladite eau. En apres
 presserons entre les mains lescites prunes, ius-
 ques à ce qu'elles foyent totalement dissoluës en
 l'eau, & separees de la peau & des os: laquelle

separation se fait commodement avec le tamis: cette dissolution ainsi bien purifiée, & exactement meslée, sera de longue durée, moyennant qu'on la face cuire avec la quantité requise du miel, iusques à la consistance conuenable. Ce *diaprunum* seroit de plus d'efficace, si ladite decoction des prunes estoit faite en l'infusion des roses incarnates, celles de damas, les fleurs des pêches, des violettes de Mars, du sureau, de la mercuriale, de la fumeterre, ou bien avec la decoction du polypode & semblables: encores seroit plus laxatif, si apres la parfaite decoction d'iceluy avec le miel, l'on adioustoit conuenable quantité de la poudre artificiellement faite, d'un ou de deux des medicamens susdits. Ne faut point douter que tel *diaprunum*, ne fust tres-propre pour les purgations faciles & tollerables, voire aux plus debiles: ce *diaprunum* est appellé simple à comparaison de celuy, auquel nous adiousterons l'elaterion auparauant mentionné, au lieu que les Arabes l'ont fait avec l'escammonee preparée, que les modernes appellent *diagredium*, lequel elaterion nous mettrons en dose de demy once à chascue liure du *diap. simplex*: car il n'y a autre difference entre le composé & le simple, que pour raison de ceste addition.

Des

Des figues.

CHAPITRE IX.



Ntre toutes les Prouinces de l'Europe, la Prouence se peut glorifier, ou plustost doit remercier Dieu, de ce qu'elle est la plus abondante & fertile en toutes les choses necessaires à la vie des hommes, & remplie de tout ce que peut seruir à la delectation & volupté: car on y admire l'abondance & beauté des oliuiers, la fertilité des vignes, l'elegance des orâgers, la bonté des pruniers, pomiers, cerisiez, amandriers, poiriers & semblables, & presque infinies especes d'arbres, desquelles les campagnes de ce pais sont naturellement pleines & verdoyâtes: & ne faut douter qu'attendu sa temperée temperature, ne nous nourrit toutes especes d'arbres & herbes, voire les plus esloignées & estrangeres, y estans les regles de la maison rustique diligemment obseruees: car si aucunes se plaisent en lieux chauds, les autres demâdent les froids, les autres les tempererez: on trouue aussi de contrees accommodables aux vns & aux autres en toutes saisons.

Cela est verifié aux especes des figues, desquelles les vnes se plaisent aux montagnes & lieux froids, les autres aux regions chaudes, & aucunes aux plus temperées: de toutes lesquelles especes nous en auons pour nous & pour les estrangers. Celles de Marseille, qui surmontent
toutes

toutes les autres en bonté, (aussi ont elles tres-grand bruit aux autres païs,) en quelque autre terroir qu'elles soyent transplantées, degenerent de la premiere suauité & douceur : autant en pouuons nous dire de celles de Toulon, d'Antibou, &c.

Et pour disputer des figues avec plus de methode, laissant toutes autres diuisions, nous contenterons de celle de deux membres, qu'Hippocrate a suiui : l'une desquelles est fondée sur le temps de la production, l'autre sur le temps de la cuillette : disant que des figues, les vnes sont produites premieres, lesquelles nous appellons en ce païs figues fleurs, les autres suiuient quelque temps apres, qui sont les figues ostennes, ainsi les nomme-on : & cestes cy sont encorés de deux sortes : car les vnes sont cueillies toutes fresches recentemente, les autres sont seches & reposeses. De ces figues les vnes sont de meilleur suc que les autres, comme aussi les vnes plus laxatiues que les autres ; d'autant que celles qui viennent premieres enuiron le mois de Iuin ; tout ainsi qu'elles sont pleines de suc superflu, aussi sont plus laxatiues & moins nourrissantes, que les autres, auxquelles l'humidité a esté bien cuite & elaborée, tant par leur propre chaleur, que du soleil. Quant aux figues seches, ne faut point douter, que comparant les vnes aux autres en ce genre, les vieilles ne soyent plus laxatiues & de complexion plus chaude, à ce que s'accorde Hippocrate, disant, *ficus arida astuosa sunt sed alio secedunt*. Cela ont de commun les figues avec

Li. 2. de la
diète.

toutes

toutes choses grasses & olieuses, de se rancir, chanſir & moiſir, & au lieu de la douceur, acquerir vne acrimonie, par ſucceſſion de temps. Telles differences des figues ainſi remarquees, nous diſons avec Galen qu'entre tous les fruiçts automnaux, qu'il appelle fugaces, elles ſont de meilleur aliment, ayant moins de ſuc ſuperflu, que les autres: & neantmoins ne cedent à aucun, en la faculté purgatrice. Non que ie vueille dire, que les figues purgent les humeurs avec election & choiſ (ce qu'on affirme des premiers) mais qu'elles ſont bon ventre, pour eſtre de facile diſtribution, & reueſtues de certaine vertu abſterſive, ne faiſant long ſeiour au ventre: & c'eſt ce qu'Hippocrate dit, que les figues eſueillent la chaleur, & eſmeuent le ventre, à l'expulſion des excremens, non toutesfois eſgalement, mais les vnes plus, les autres moins. Dioſcoride tient que les figues recentes & freſches, laſchent le ventre, mais bleſſent l'eſtomach: ce qui eſt cauſe par quelque acrimonie, que les figues recentes rapportent de leur principe. Ceſte puiſſance de laſcher le ventre eſt commune à toutes les figues, mais l'ennuy de l'eſtomach ne prouient que des recentes. Outre la vertu de laxer le ventre, on recognoit pluſieurs belles & ſignalees commoditez que les figues portent au corps, car ſi elles ſont receuës par celuy qui n'a le corps autrement mal diſpoſé, ſont de facile digeſtion, engendrent le bon & louïable ſang, tiennent le corps net & pur, prouoquent les vrines, purifient la poictrine, les poulmons & les reins, de tous excremens

cras & terrestres. Au contraire, si celuy qui a l'estomach plein de mauuaises humeurs en mâge, elles se changent en corruption & vilenie, d'où vient que d'elles s'engendre vn sang corrompu & gasté. Pour faire donc le ventre libre, il en faut prendre la matinee deuant disner vne heure ou dauantage, vne dōuzeine: les melancholiques peuuent prendre avec icelles quelques fueilles d'hissop, ou du calament, ou du thym: les phlegmatiques adiousteront la moëlle du carthame, ou quelque portion d'agarc préparé: les cholériques, avec l'absinthe, ou la mercuriale: faut noter que lors qu'on prend les figues avec les choses susdites, quatre ou cinq doyuent suffire.

Des raisins.

CHAPITRE X.



CEux qui ignorent la methode artificielle de Dioscoride, aux six liures de la matiere medécinale, s'esmerueillent de ce qu'il n'a plustost parlé au premier liure, de la vigne & des raisins, qui semble estre dédié aux arbres fructiers, qu'au cinquiesme avec les mineraux: laquelle admiration cessera, s'ils remarquent diligemment qu'en ceste matiere, l'ordre de Dioscoride est tres-industrieux, & sans comparaison beaucoup plus, que la methode alphabetique de Galen, ny des autres qui l'ont imité, *scd de his suis.*

D'autant

D'autant que mon intention est de parler seulement des commoditez que les hommes peuvent recevoir des raisins, pour lascher le ventre: il me suffira d'examiner, de quelles especes ceste utilité se peut prendre: car seroit vne chose superflue de descrire icy toutes les sortes des vignes desquelles nous recueillôs les raisins, viande tres-plaisante & delicieuse, d'où nous exprimons le vin, qui est vn breuvage si precieux & exquis, qu'à bon droit il est dit en plusieurs lieux de la sainte escriture, resjouir Dieu & les hommes, faire oublier toutes miseres, douleurs & afflictions: à quoy s'accorde Hippocrate, disant que ceux qui vivent liberalement du vin, oublient facilement toutes sortes de maux, & se nourrissent en l'esperance de beaucoup de bien à l'aduenir. Ces effets procedent du vin, pour-autant qu'il refait & repare les esprits vitaux, & par consequent fait que le cœur s'eschauffe, s'esleue & dilate: ce qu'aduiant au contraire aux melancholiques, lesquels à faute desdits esprits, portent toujours vn cœur contraint & assoupi. A bon droit donc on dit, que le vin resjouit le cœur des hommes, tout ainsi que le pain les confirme & substante: venant la iouissance du vin, & du pain la sustentation.

Retournant donc aux raisins, Galen leur attribue vne puissance solutiue, coniointe avec la vertu de nourrir tres-euidente, assés suffisammēt tesmoignée par l'habitude & corpulēce de ceux qui en mangent beaucoup en temps de vandanges: & combien que toutes les especes de raisins

L. des aliments.

foyent

soyent nourrissantes, si est-ce que toutes esgalement ne laschent pas le ventre: car les vns nourrissent beaucoup, comme dit Galen, & laxent peu, les autres au contraire laschent beaucoup & nourrissent bien peu: & pourautant que ces degrez de nourrir & purger ainsi, procedent ou de la substance solide du raisin, ou bien du suc d'iceluy, de là vient que les raisins qui ont beaucoup de l'un, & moins de l'autre; nourrissent ou purgent plus ou moins. D'où nous colligeons necessairement, avec Isaac, que les raisins blancs pour estre plus abondans en suc, nourrissent legerement, sont de facile digestion, penetrent soudainement les orifices des veines, prouoquent les vrines, & purgent par le ventre. Les noirs qui ont la chair crasse, grosse & amallee, la peau dure & peu de ius, nourrissent beaucoup & purgent peu. Les roux & citrins tiennent la mediocrité: c'este vertu nourrissiere & laxatiue, est aussi diuerse, & en diuers degrez, selon la diuerse constitution & estat des raisins: car depuis que de trois parties qu'il y a au raisin, les deux ne nourrissent point (car elles ne reçouyent dans le ventre aucun changement) & toutesfois reserrent le ventre: s'ensuit que les raisins qui n'ont point de grains, ou qui sont auallez sans l'escorce, purgent beaucoup & nourrissent peu, s'ils sont de substance aqueuse & liquide, ou bien purgent peu & nourrissent prou, si leur substance est solide: voila pourquoy le moust est tant laxatif, car il est separé des parties qui bridoyent ceste puissance. Dauantage les raisins recētemēt cueillis;
sont

sont differens de ceux qu'on reserve pendus : car ceux cy sont bien proches de l'aliment simple, nourrissent beaucoup & ne purgent rien, principalement la panse mangée sans les grains & la peau : ceux là au contraire, ayans encores toute leur humidité superflue, d'où procede la vertu de purger. Et tout ainsi que les figues & tous les autres fruits automnales causent diuers effects, selon la disposition du corps : ainsi les raisins, s'ils treuvent l'estomach vuide, & de viandes & de mauuaises humeurs, nourrissent beaucoup mieux & lâchent le ventre avec plus de contentement : comme à l'opposite, seiournent long temps dans l'estomach, & engendrent de vens yne infinité : brief se degenerent en corruption & pourriture, lors qu'ils sont receus, le ventre estant plein tant de viandes que d'autres humeurs superflues : & principalement s'il est affligé de quelque intemperature. C'est la cause pour laquelle l'vsage des raisins est tant suspect aux valetudinaires, aux cacochymes, & à ceux qui ne font que soy releuer de quelque grande maladie : & par ainsi nous les concedons facilement à tous autres, & disons estre vtils à ceux qui ont besoin d'auoir le ventre libre. Quelques vns sont curieux de sçauoir, s'il est meilleur, de manger les raisins sans pain qu'avec iceluy, lesquels doyuent entendre, que ceux qui mangent les raisins, plus pour se nourrir ou pour saulse, que pour lâcher leur ventre, les doyuent mesler avec le pain, & peuuent manger tout le raisin avec sa graine & escorce ; ceux dis-je qui ont le ventre naturellement libre,

mais les autres qui les mangent plustost pour faire bon ventre, que pour estre nourris (pourueu que les empeschemens cy dessus mentionnez n'y soyent) en doyuent vser simplement, sans meslange d'aucune autre viande, & tout au commencement du repas : comme aussi tous les fruiçts semblables doyuent estre prins a l'entree : contre la coustume ordinaire, de presenter les choses succrees, & toutes sortes de fruiçts : lesquelles viandes si seiournent guieres dans l'estomach, se corrompent facilement : ceux là experimenteront la vertu laxatiue des raisins, qui se trouuent aux vignes la matinee, deuant que le Soleil commence à esclairer, s'ils en mangent avec toute la rosee.

Quant aux passerilles, elles ont quelque affinité avec les raisins pendus, si ce n'est qu'aux premiers moys les raisins sont plus laxatifs, pource qu'ils ont encores, vne bonne partie de leur suc aquatique : la vertu solutiue tant des raisins que des passerilles, est augmentee par l'abstraction de leurs pepins, par leur maceration seule dans l'eau ; ou par leur decoction ensemble, laquelle celuy qui humera deuant toute autre viande, à peine se plaindra-il du ventre constipé : & mesmement si ladite maceration ou decoction se fait avec quelqu'une des choses plus laxatiues auparauant descrites.

Des

Des cerises & meures.

CHAPITRE XI.



Es cerises sont tesmoins, entre plusieurs autres plantes, que la culture peut rendre nostres, les arbres & herbes, quoy qu'elles soyent estrâgeres, & esloignees de nostre terroir: car la terre Provençale en est maintenant si feconde, qu'il n'y a aucune contree en tout ce païs, soit aux montaignes, vallees & plaines, qui ne soit tres-fertille en toutes sortes de cerises (accommodât ce nom de cerise à plusieurs especes de ce fruit) & toutesfois nous les auons receües des estrangers: car Lucullus general de la gendarmerie Romaine, apres auoir surmonté Mithridate, les transporta de Cerasonte (d'où est venu le nom de cerise) en Italie: & de là de main en main, par le moyen des voisins plus proches, elles sont venues iusques à nostre Prouence, là où elles sont nourries & cultiuees des long temps, comme propres & naturels fruits. Toutes les especes de cerises, ne sont pas conuenables pour lâcher le ventre, ny aussi celles qui le lâchent, ne le font pas en tout tēps, c'est à dire en tous leurs aages (ce qui peut estre dit aussi des autres fruits automnales:) car celles qui sont austeres & aspres, tant s'en faut que elles portent ceste commodité, que plustost elles arrestent le ventre. Aussi les cerises chacune en son espece, pour ce faire doyuent auoir leur par-

faicte maturité : & meſme que celles, qui de leur naturel ſont aigres , peuuent recevoir telle elaboration, que leur complexion approchera de la qualité douce , tellement qu'elles auront puisſance de nourrir le corps : & encores leur ſuc aigre & adſtringent , eſtant corrigé & cuit par la chaleur du Soleil, recevra la vertu laxative. Cela ſe pratique à celles que les François appellent guines, & en Prouëce agriottes, non pas en toutes eſgalement , car nous en auons de trois ſortes : l'une eſt de celles qui nous ſont plus communes , lesquelles pour auoir leur ſubſtance molle, rare, & fort ſucculente, ſont plus laxatives que les autres : l'autre eſt de celles qui ſont d'une ſubſtance ſolide & plus dure, & ſurmontent les autres en groſſeur , lesquelles ont plus de quoy nourrir que les premières, ſe corrompent plus difficilement & ſont moins chargées de ſuc : & par conſequent ſont moins laxatives : la troiſieſme, eſt de celles, qui eſtant arriuees en maturité, ſont ſemblables en ſubſtance , & quaſi en groſſeur aux ſecondes : mais elles ſont extrêmement aigres, & par conſequent moins nourriſſantes , & du tout point laxatives. Quant aux ceriſes douces , elles ſont auſſi plus ou moins laxatives, & nourriſſantes : car nous en auons auſſi de pluſieurs eſpeces, entre lesquelles , il en y a qui ont leur chair dure ſeche & amasſee , avec une liqueur douce , lesquelles ſont prou nourriſſantes & moins laxatives : & outre qu'elles ne reçoivent pas facilement la corruption, l'eſtomach en eſt aucunement forſifié : & ſont proprement celles là que Plin appelle

pelle *cerasa Aelia, Cecilia*, nous les entédons par le nom de graphion: pource que (comme ie croy) ils ont esté traduits en ce païs, par le moyen de l'insertion & grepheure, desquels les vns sont rouges, & les autres noirs, & aucuns blanchastres. L'autre sorte de cerises est de celles qui ont vne humidité superflue & corruptible, en vne substance rare, laxé & molle, qui cause qu'elles sont beaucoup plus laxatiues que nutritiues: & d'abondant si faciles à s'alterer & corrompre, qu'à peine peuuent elles faire long seiour dans l'estomach, sans estre changees en excremens deprauez & malins: & c'est pourquoy leur vsage est tant pernicieux & dommageable, principalement aux debiles d'estomach, aux mal habitez & cachochimes, & à ceux qui ont desja le ventre plein d'autres viandes.

Les meures sont aussi tres-frequentes en ce païs, & de plusieurs sortes: car les vnes sont agrestes, les autres domestiques: ie laisse les champestres, pource qu'on n'a pas de coustume d'en vsfer pour ce respect: combien que suis asseuré, qu'elles ne seroyent inutiles, & principalement celles qui croissent en vne sorte de ronce, que Dioscoride appelle *rubus idæus*, laquelle est differente des autres, n'ayant point, ou fort peu d'épines. Ces meures cy, sont si plaisantes, & à la veüe, (car elles ont la couleur d'escarlata) au goust & à l'odorat, qu'elles surmontent toutes les autres en suauité: c'est la ronce que vulgairement on nomme framboisier & son fruiët framboises, desquelles plusieurs ont commencé à embellir

leurs iardins. Retournant donc aux meures domestiques: nous en auons de deux especes, blanches & noires: quant aux blanches, elles ne nous seruent de rien en la medecine (à faute possible de n'auoir cogneu leur pouuoir, car elles ne sont pas faictes en vain) sont assés ingrates à l'estomach. faciles à s'alterer & corrompre, voire aux plus robustes & purifiez: les noires au contraire outre la douceur accompagnée de quelque acetosité, ont vn téps est de vertu adstringente qui cause qu'elles sont plus agreables à l'estomach. Toutesfois l'opinion de Galen & Oribase (confirmée par l'experience) est que si elles deuiennent en vn estomach plein, ou de viandes, ou de mauuaises humeurs: (car alors leur seiour dans iceluy est plus long, que leur fresle & corruptible substance ne requiert) elles degenerent en vne si estrange corruption, qu'à peine se peut expliquer: & cela leur est commun (comme auôs dit) avec beaucoup d'autres fruiçts.

Les meures donc, de quelque espece qu'elles soyent, ont diuerses & contraires qualitez, mais en diuers aages, car estant encores vertes, sont adstringétes: mesmes que Dioscoride baille leur poudre meslée avec les viandes aux celiagues & à tous flux de ventre immodéré, & mesmement aux dysenteries. Mais celles qui sont venuës à leur parfaite maturité, outre la puissance laxative, laquelle consiste en vne humidité suaue & douce, elles sont aussi aucunement corroboratiues, & restringentes, comme il appert à leur ius, duquel on vlc coustumierement aux exulcerations

tions de la bouche, & autres indispositions, qui ont besoin de mediocre adstriction. Nous vserons donc des meures domestiques noires plus ou moins venuës à leur maturité: car ceux qui ont le ventre autrement assés libre, doyuent vser de celles qui sont verdelettes: au contraire les durs de ventre, doyuent choisir les plus meures. Oribase apres Galen conseille de les manger tout au commencement du repas, sans les mesler avec aucunes autres viandes, & s'en doyuent bien garder ceux qui ont l'estomach impur & plein de cacochimie, à cause que les meures iointes à telle impurité, la disposition en est d'autant empiree, que le nombre que l'on en mangera, sera excessif: ne sera toutesfois sans profit d'en vser lors que l'estomach est trauaillé de quelque chaleur & secheresse moleste, en temps d'esté, au mois de Iuillet & au commencement d'Aoust: car alors l'air estant fort eschauffé engendre vne secheresse, (quoy que par accident) au corps & mesme à l'estomach, auquel toutes les autres parties ont leur refuge, en temps de necessité: à laquelle intemperature, les meures remedieront bien à propos, tant pour estre humides, que pour auoir vne froidure assés insigne, pourueu que soyent fraichement cueillies: lesquelles commoditez seront aussi suiuiues d'une notable liberalité de ventre.

Des melons & cocombres.

CHAPITRE XII.



Ombië que Dioscoride attribue aux cocombres domestiques la vertu solutive, avec cōsolation de l'estomach, toutesfois nous expetimẽtons le contraire aux nostres : car il est manifeste qu'estans icetux pleins de certaine liqueur froide & gluante, & de tres-dificile digestion, qu'il se puisse faire, qu'ils ne fassent long seiour dans l'estomach. Au cōtraire est des citrouilles lesquelles passent facilement par le ventre, à cause de leur humidité aqueuse : & de là vient, que le vulgaire pour remédier à telle vitiosité, trempe les cocombres, long temps auparavant, dans le vinaigre, ou quelque portion de sel a esté fondue, par lequel apprest il est rendu plus agreable à l'estomach, & plus prompt à estre distribué, sans toutesfois prouoquer le ventre d'aucune chose notable. De ces choses nous concluons que les cocombres domestiques de Dioscoride, sont d'autre naturel que les nostres : & combien que Mathiol en son commentaire sur Dioscoride en depeint deux especes, nous n'auons toutesfois que d'une sorte, laquelle s'accorde en cela avec celle de Dioscoride, que sa graine prouoque les vrines, aux ardeurs desquelles elle est de grande vtilité, & aux exulcerations de la vessie. Ce que nous disons en passant, depuis que ne trouuons rien que vaille à

nos cocombres pour faire bon ventre, & encores moins pour la nourriture : & de là vient que Galen confeille de s'abstenir d'iceux & de toutes semblables viâdes : lesquelles quoy que l'estomach digere, si est-ce que par succession de tēps, elles engendrent vn amas d'humeurs froids, cras & glutineux, qui en fin ne pouuant estre changez en bon sang, facilement à la moindre pccasion, se pourrissent : d'où s'ensuiuent de fieures malignes, & d'autres maladies dangereuses.

A ce rang d'alimens ie mettrois aussi les poupons & melons, n'estoit qu'ils sont aucunement de meilleur suc, de plus facile digestion, & lachent le ventre, sans faire (selon l'experience & autorité de Galen) trop grād seiour dans l'estomach : toutesfois ces qualitez cy, ne sont pas esgales en toutes les sortes de poupons ou melons : ce que nous treuuerons veritable en examinant chacun en son espee: car en ce païs nous en auôs de trois sortes, distinguees selon leurs formes & saueurs : l'vne est de ceux qui sont fort ventreux, & de figure d'ouale, les caneleures & rayes desquels sont continuees d'vn bout à l'autre, & sont ceux qui sont entendus par le nom de poupon : l'autre est de ceux qui sont plus longs, ayans leur rayes moins eminentes, & plus petites, lesquels le vulgaire nomme au genre femenin poupones : la troisieme espee est de ceux, qui pour estre de la forme d'vn coing, sont appelez en Latin *melo pepones*, portans le nom de melon & coing ensemble : ceux cy sont proprement entendus par le nom de melon, & sont differens

des premiers, en la forme & figure extérieure: car leur caneleure est beaucoup moindre. En la grandeur, estans pour la plus part fort petits en la chair, laquelle est en ceux cy dure, amassée & blanchastre, & en leur cavité, qui est en ceux cy plus petite, sans eau, & avec beaucoup de graines: lesquelles choses abondent plus aux poupons, & finalement au goust, qui est en ceux cy beaucoup plus plaisant & agreable. Pour raison desquelles proprieté, nous concluons que les melons sont plus propres pour la nourriture, que pour la purgation, pouuât leur chair sejourner quelque temps dans l'estomach sans encourir aucune corruption: si ce n'est que l'estomach soit si mal disposé qu'il gaste aussi les autres viandes. Ce que ne peut pas estre ainsi verifié des poupons, tant masles que femelles, lesquels sont si abondans en humiditez superflues avec froidure & grande crudité, qu'à peine peuvent ils estre vne heure dans l'estomach, qu'il ne s'ensuiue vne corruption manifeste: & mesmement s'ils tombent en ventre plein de mauuaises humeurs, ou autrement intemperé. C'est pourquoy Galen dit de luy qu'il dispose les hommes à la maladie appelée *cholera*, autrement *miserere mei*. Ce que craignans les hommes, ont prins coustume de les manger tout à l'entree de table & avec le sel, tant pour diminuer & corriger leur superflue humidité, que pour haster leur descéte dans les boyaux, & de là leur sortie hors du corps: laquelle pourroit estre retardée par les alimens premierement ingerez.

Les melons donc estans mangez avec les circonstances requises, par ceux qui n'ont l'estomach impur & alteré, de quelque intemperature, chaude ou froide difficile à corriger, ne permettent iamais que le ventre soit chiche & constipé, lequel benefice est tres-necessaire pour la precaution de toutes maladies.

Des oignons domestiques.

CHAPITRE XIII.



Entre les choses desquelles les hommes vsent pour leur nourriture, les vnes seruent seulement de confiture & fausse, n'ayant en soy aucune chose pour nourrir, comme sont toutes espices, le vinaigre, le verjus, le sel & semblables choses, desquelles on se sert plus pour corriger les viandes, & pour leur donner bonne odeur & bon goust, que pour autre intention. Les autres qui ayant autremét en soy tout ce qui est besoin pour l'aliment & refection, ont neantmoins, besoin d'estre apprestez avant leur vsage, par le ministère du cuisinier avec le feu, lequel est le principal correcteur de nos alimens: en troisieme lieu il s'en treuve beaucoup, qui estans receus sans elaboration & preparation aucune, n'engendrét autre effet dans le corps, que de l'alterer, en eschauffant, refroidissant, humectant & desechant, avec autres dependances de ces qualitez cy: &
 outre

outre ces operations , quelques vns ont ce pou-
voir de lacher le vêtre, aufquels toutesfois, apres
leur diligente preparation , se treuve quelque
portion pour la nourriture. De ce genre sont les
pourreaux, les aulx, les raues, les naueaux, les es-
pinars, les blettes : brief presque toutes les her-
bes & racines potageres, & principalement les
oignons, pour lesquels nous auons dressé ce cha-
pitre. Car Oribase apres Galen, & encores l'ex-
perience tesmoignent, que la preparation est de
telle efficace en iceux, qu'au lieu qu'au parauant
ils n'auoyent rien que pour eschauffer, attenuer,
inciser la crassitude & viscosité des humeurs:
apres estre industrieusement apprestez, acquie-
rent quelque force de nourrir: & quant à la pur-
gation, pour le regard de laquelle nous parlons
seulement des oignons en ce lieu, elle est si ma-
nifeste & asseuree, qu'en quelque façon qu'on
les mange, ne permettent iamais la constipation
du ventre. Il est vray que ce pouuoir la est fort
affoibli par la coction desdits oignons, & mes-
mement si on les fait bouillir en deux ou trois
eaux: car alors ils laissent totalement leur acri-
monie, retenans tousiours quelque portion inci-
sive, attenuatiue, & encores pour faire bon ven-
tre. Lesquelles vertus se treuent beaucoup plus
vigoreuses quant elles sont coniointes avec leur
acrimonie, laquelle aide manifestement à l'atte-
nuation & incision susdite, & encores à la puis-
sance laxatiue: ce qu'est confirmé par l'autorité
de Dioscoride, disant que toutes les especes des
oignons, entre autres proprietéz signalees pur-
gent

gent & font bon ventre. Ceste propriété n'est pas esgale en toutes les sortes des oignons, aussi ne sont elles pas esgales en fortitude : car pour-
 autant que les rondes sont plus acres, que les
 longues, les seches & des-ja meures, que les re-
 centes, les rouges que les blanches, s'en suit que
 elles ayent plus d'efficace pour la purgation.

Et combien que les oignons longs de Diosco-
 ride, surmontent en acrimonie les ronds, toutes-
 fois nous experimentons le contraire en ceux de
 nostre Prouence : car l'experience journaliere
 nous fait voir, que les longs en figure d'ouale,
 (tels que croissent au terroir de Bouc & de Gar-
 dane) cedent en acrimonie aux ronds & aplatis
 en forme de lentille : il s'en treuve quelque fois
 de si debiles, qu'on les mange sans appercevoir
 aucune ingratitude pour raison de l'acrimonie,
 voire tous crus, n'estans aucunement preparez.

Et combien que les oignons crus (selon le tes-
 moignage d'Isaac apres Galen) n'apportent rien
 pour la nourriture du corps, toutesfois n'est pas
 sans profit que ceux qui ont l'estomach refroidi,
 plein de pituite cruë, crasse & gluante, en man-
 gent quelquefois : & principalement au moys
 d'Auril, May, & au commencement de Iuin, car
 alors ils sont moins acres, & plus proches de
 leur premier aage : d'autant qu'avec la prepara-
 tion desdites humeurs, s'en suit aussi leur euacua-
 tion : de sorte que nous pouons dire sans men-
 tir, auoir veu plusieurs, auxquels par l'usage mo-
 deré des oignons recens & tendrelets, la dou-
 leur d'estomach, causee par cruditez & humeurs
 phlegma

phlegmatiques, estre du tout appaisée. Quant à ceux qui sont de naturel chaud & bilieux, suyuant le conseil de Galen, doyuent s'abstenir, non seulement des oignons, mais aussi de toutes choses picquantes, acres & mordicantes, telles que sont les aulx, les pourreaux, les oignons & semblables.

Ce que nous auons dit cy dessus des oignons, peut estre entendu des pourreaux, & des aulx, veu que Oribase & Galen ont parlé en mesme chapitre de leurs facultez, & sous vn mesme propos: ioint aussi que Dioscoride recognoit à tous vne mesme puissance de lascher le ventre: bien est vray qu'en nostre Prouence l'usage des aulx n'est pas si frequent, que celuy des oignons & pourreaux: car nous contentans des deux derniers, sommes contents de quitter la possession du premier aux Gascons.

Des bettes.

CHAPITRE XIII.



UL n'y a pas vne herbe, de celles que nous appellons potageres, qui soit plus commune en ce pais, en tout temps, que les bettes, & mesmement par toute la basse Prouence, combien que les montagnes n'en sont pas destituees: car il n'y a lieu si froid, là où on ne puisse auoir ce simple
toutes

toutes les parties de l'année : c'est l'herbe que les François appellent la porree, aucuns Latins la nomment *siclam*, quoy que par ce nom de *sicla*, on entend principalement les bettes rouges, selon le *predium rusticum* de Charles Estienne. Et combien que Dioscoride ne face mention que de deux especes : si est-ce qu'en ce país nous en auons presque par tout de trois sortes : car outre les blanches & noires de Dioscoride, on en trouue en plusieurs lieux de rouges, tant de racine (qui est quasi si grosse, que les raues longues) que de feuilles, lesquelles sont en icelle plus larges qu'en aucune autre espece : & ceste cy est plus rare en ce país que les autres. Or qu'en la porree on trouue quelque portion bonne pour nourrir, moyennant l'elaboration du feu, & de quoy lacher le ventre, il est tres-manifeste : quant au premier nous auons l'experience, d'autant qu'il n'y a herbe plus commune & aux riches, & aux pauvres, pour les potages ordinaires, que les bettes : pour la purgation, il n'est besoin de l'autorité d'Hippocrate, ny d'aucun autre, depuis que l'experience le monstre : toutesfois nous dirons, que Hippocrate a cogneu ceste puissance laxatiue aux bettes, disant que leur ius ou decoction fait bon ventre, & leur corps l'arreste plustost : luy mesme baille ledit ius à la troisieme espece de phtisis, pour la purgation de l'humeur bilieux, avec toute facilité, & sans aucune violence.

Martial a recogneu la mesme puissance à ce qu'il dit, & *pigro ventri non inutiles betas*, & ne se faut esmerueiller, si en vn mesme simple se

trouue

L. 2. de la
diets.

trouue dequoy faire le ventre lasche, & le restreindre, car comme auons touché auparauant, la raison ne repugne rien à cela, & l'autorité de Galen est confirmee par l'ordinaire experience.

Cha. 40. l. 2. des aliments, com. en la sent. 46. sect. 1. liure des fractures.

Galen en plusieurs parts fait grand cas des bettes, & mesmement au liure 8. des simples, disant qu'elles ont vne qualité nitreuse, par le moyen de laquelle, elles sont resolutiues, absterfues, & purgatiues, tant par le nez si on reçoit leur ius, par les narines, que par le fondement: & mesme que ledit ius (ce que nous experimentons souuēt) adiousté aux clisteres, n'est de peu de valeur, pour attirer les excremens du ventre, voire lors qu'ils sont si endurcis, que les autres clisteres, qu'on appelle lenitifs, sont de nulle efficace. Quant à la portio aliméteuse elle est fort debile aux bettes, comme aussi à toutes herbes potageres, tellemēt qu'on en vse plus pour accompagner le pain, que pour aliment: & Galen mesme les a mises en ce rang là, suivant l'intention de son maistre & le nostre Hippocras. Le vulgaire a par experience aussi, que ce simple fait bon ventre, non seulement prins en breuuage, mais aussi mis en iniection par le fondement, comme auons des-jà dit: & pource que le corps & substance de bettes, est plus adstringente que laxative, (car par la coction, elles perdent leur introsité & acrimonie, qui est la principale cause de la purgation) de là vient qu'on ne les peut donner en autre forme de medicamens qu'en breuuage. Il est certain que du ius simple & depuré, on feroit avec le miel vn bon sirop laxatif: le mesme pourroit-on faire
des

des infusions multipliees, tout ainsi qu'on fait des violettes de Mars, des roses & semblables.

Des arroches & blettes.

CHAPITRE XV.

GAlen au second liure des alimens, conioint ces deux simples ensemble, comme estans d'une mesme puissance: car (dit-il) elles sont si fades & destituees de saueur, qu'on les iugeroit estre destituees de toutes proprietiez. Plin en escrit au-
L. 20. cha.
22.
 tant des blettes, disant la blette est vne herbe fade & sans saueur & acrimonie aucune, & de là est venu que dans Menander, les maris voulans outrager leurs femmes, les appellent blettes. Plautus aussi *in truculento bliteam meretricem nominat*: les Latins aussi à l'imitation des Grecs appellent *bliteos homines*, ceux qui sont sans industrie, acroupis & feneans.

Il n'est pas assés liquide qu'est ce que nous devons entendre par le nom de blette, ou bliton, car Dioscoride en depeint de trois sortes, tout ainsi que des bettes, assavoir des noirs, des blancs & des rouges: combien que nous n'ayons en ce país qu'une sorte de simple, laquelle nous entendons par le nom de bliton, aussi l'appellons nous en nostre langue blet, qui est vn simple tât cogneu, que la populace en vse pour faire potages, à faute des espinars, bettes, & autres herbes

potageres, venât sans culture copieusement parmi les autres ortolailles, desquels aussi les châps cultivez sont quelquesfois bien peuplez. Le *prædium rusticum* de Charles Estienne, pense que le bliton soit ce que le vulgaire appelle espinard; mais il y a bien grande difference, entre nos espinars & le bliton. Quoy qu'il en soit il est verifié, que ce que nous entendons par le nom de blette, ou bliton, à les mesmes facultez que Galien remarque au sien. Tous les auteurs Grecs attribuent à ce simple la vertu de lascher le ventre. On n'a pas expérimenté en nostre bliton, ce que Pline a recogneu au sien, disant qu'il est si mauuais à l'estomach, & trouble si fort le ventre, qu'il engendre la maladie appelée *cholera morbus*: on en peut vser de mesme façon, comme de la porree, cy dessus escrite, bien est vray qu'en ceste cy n'y a rien d'astringent.

Quant aux arroches, elles sont plus vsitees & plus communes, encores qu'elles ne croissent que par la culture, aussi sont elles meilleures, & reçoivent plus fidellement le goust de la faulse qu'on leur adioust, que les blettes: aussi sont elles nommées en France bonnes dames. Nous en remarquons en ce pais de deux sortes: vne domestique, qui croit seulement aux iardins par la culture, tout ainsi que les autres herbes potageres: l'autre sauvage, de laquelle le vulgaire vse aussi, comme de plusieurs autres herbes champêtres. Quant à la puissance solutive, elle n'est pas esgale en l'une & en l'autre espece: car nous auôs par experience, que les arroches sauvages (lesquelles

Liv. 2. des
alimens,

quelles le vulgaire en Provence entend sous le nom de cennions ou cinniscions) sont beaucoup plus laxatives que les domestiques : aussi ont-elles certaine amertume & amertume, que les susdites, desquelles degenerated touchant l'insipidité que les arroches ont : & c'est pourquoy aux inflammations, qui demandent la refrigeration (comme sont les erisipeles) on use plustost des arroches domestiques que des autres: au contraire, pour lâcher le ventre, les champestres sont plus convenables. Et pource que nous traitons en ce liure des simples, qui outre le pouvoir de faire bon ventre, ont aussi quelque chose pour alimenter le corps: en ce fait nous preferons les arroches des iardins, desquelles l'une & l'autre commodité peut réussir: quant à leur graine, elle degenerated des feuilles, car en elle ne se trouve rien pour nourrir: & neantmoins elle est estimée d'une puissance tres-laxative, laquelle n'a pas long temps a esté reconnuë par aucuns Empiriques, en apres practiquee par plusieurs Medecins rationels: & mesme qu'aux potions vomitives, nous avons de coustume de mettre ladite graine en decoction, laquelle purge aussi par le fondement, non sans grande fascherie & trouble de l'estomach: qui est cause qu'elle a besoin de la correction propre aux medicamens du premier catalogue: nous userons des feuilles comme des autres herbes potageres.

Des espinars.

CHAPITRE XVI.



Vx liures de la matiere medicinale de Dioscoride , nous ne trouuons (à mon aduis) aucun nom , soubz lequel nous puissions entendre les espinars , quoy qu'ils soyent si vulgaires & familiers par tout, & mesmement en ce païs. qu'il n'y a contree en iceluy , en laquelle , voire l'hyuer (car on les defend facilement du froid) on n'en puisse recouurer. Quelques vns veulent dire, que Dioscoride a compris soubz le nom de *chrisolachanon* , tant les arroches que les espinars: mais ce nom ne conuient aucunement aux espinars, lesquels n'abandonnent iamais leur verdure, non seulement aux fueilles & à leur tige, mais aussi aux semences , & toutesfois le nom de *chrisolachanon* , signifie herbe doree , ce que me fait croire que les anciens Grecs, & mesme ceux qui sont venus apres Galen, comme Oribase , Paul Æginette, n'ont point eu en vsage les espinars, à cause que peut estre ils ne croissoient pas pour lors aux prouinces qu'ils ont frequêtees: & mesme que quelques vns sont d'opinion que ceste herbe a esté premieremēt veuë en Espagne, d'où elle semble auoir retenu le nom de *spanaceum*, ou *hispanicum olus* , combien qu'il est vray semblable, qu'on les appelle espinars, pour raison de leur semence espineuse. Donc des espinars, les

vns sont agrestes, les autres domestiques : quant aux agrestes, ils se treuvent seulement aux montagnes du Dauphiné, de terre neufue, & de la haute Prouence, desquels les plebees de ces contrées là, vsent comme des herbes potageres, les appellans vulgairement *sanguaris*, ausquels recognoissent quelque pouuoir de nourrir & de laxer le ventre. Des espinars domestiques nous en auons aussi deux sortes, l'une femelle qui est sans graine, ou si en a, est sterile sans pouuoir d'engendrer son semblable : l'autre masle qui en son temps est tousiours chargé de semence espineuse & picquante, propre pour la purgation : de tous les deux on vse coustumierement aux repas ordinaires, au printemps & l'automne, & mesmement en carefine & vne bonne partie de l'hyuer : en quelque façon qu'on les appreste, ils gardent tousiours leur vertu laxatiue. Bien est vray qu'elle est de beaucoup diminuee, lors que par expression, on tire vne bonne partie de leur ius, auant que les apprestet par le feu : de sorte que celuy qui vsera des espinars, plustost pour auoir bon ventre, que pour s'en nourrir, les doit manger avec tout leur ius, duquel ils sont si pleins, qu'ils peuent estre cuits sans eau en leur propre humidité : laquelle pour estre accompagnée de certaine acrimonie, fait que les espinars sont autant, ou plus laxatifs, qu'aucune des herbes potageres : & si n'estoit que la meslange des passerilles, des figues, du sucre & autres choses, & la diuersité de les aprestet, les rend familiares à nostre naturel, seroit bien peu de chose leur portion

nourriffiere, & beaucoup la vertu laxatiue. Parquoy les espinars (comme dit est) prins avec tout leur ius, sans meslange, ny apprest trop laborieux, sont tres-bons pour tenir le ventre lasche: toutesfois pource que leur puissance solutiue, n'est pas beaucoup arrestee, par la preparation avec les figues, raisins, ou panfes, prunes, & avec l'huile, ioint aussi qu'autrement ils ne sont guieres amis de l'estomach, & engendrent au ventre de vapeurs & ventositez molestes: leur vsage sera plus asséuré pour les delicats, moyennant les preparations susdites, faictes toutesfois de sorte que les espinars retiennent tousiours leur ius.

Des chous.

CHAPITRE XVII.

LEs anciens ont eu en si grande estime les chous, qu'ils ont avec toute assurance proferé, ne pouuoir estre aucun malade, qui ne peut receuoir quelque roulagement, par l'administration des chous. Chrisippe Medecin tres-ancien, est dit auoir occupé vn assés insigne volume en la description des remedes, que les hommes peuuent receuoir de ce simple en toutes les maladies du corps: tellement qu'on a estimé, n'estre chose digne d'admiration, si les Romains par l'espace de six cés ans (quoy que soit faux que les Medecins en ayent

en ayant tant de temps esté absens) se sont contentez des chous seulement , pour medecines en toutes leurs maladies. Ce que ne peut estre vray, qu'à nostre confusion: nous dis-je à qui non seulement la terre Prouençale, mais aussi toutes les provinces de la France, sont insuffisantes pour treuver dequoy faire la medecine au moindre malade du monde: tellement que si les pharmacepes & dispensaires des Arabes estoient perdus, ou que la nauigation & traffique en terre estrange, fusse interdite, nous serions empeschez de faire la medecine. Retournans donc aux chous, tout au commencement noterons qu'il en y a de trois sortes, desquelles Dioscoride parle en trois diuers chapitres: l'une est des domestiques: l'autre des sauages: la troisieme des marins, desquels auons parlé au premier liure. Quant aux sauages, nostre intention n'est pas d'en parler en ce lieu, combien que nous ayons remarqué autresfois en iceux la faculté laxatiue: & Dioscoride recognoit aux cimes d'iceux, quelque chose bonne pour nourrir: c'est donc pour les domestiques que ce chapitre a esté commencé, desquels nous auons en ce pais de plusieurs especes: car les vns sont blâcs, les autres verds, & quelques rouges: les vns ont les fueilles larges & crâsses, les autres minces & crespes: les vns les ont esparfes & esgarees, les autres vnies & amassees quasi comme en vn globe, lesquels on nomme chous cabus ou capus: toutes ces especes de chous semblent auoir mesme force laxatiue. *L. 2. de la diete.* Car Hippocrate, Galen, Oribase, & les autres

*L. 2. ch. 43.
des ali-
mens.
Cha. 5. l. 2.*

qui parlent de la vertu de ce simple, disent sans rien spécifier, qu'aux chous se treuve dequoy faire bon ventre: toutesfois nous qui auons conferé les vns avec les autres, treuons que les rouges, & ceux qui ont la couleur verte obscure, sont beaucoup plus laxatifs que les blancs, ny que les capus: ce que faut entendre de leur ius ou du bouillon premier, pourautant que leur corps & la portion plus materielle d'iceux, est plustost adstringente que laxatiue: car il est tres-clair en nostre medecine, que les choses ou plus materielles & crasses elles sont, tant plus tardiues se monstrent en leur distribution, & par mesme moyen arrestent le ventre: d'où est confirmée l'opinion de Galen, disant que plusieurs plantes sont saisies de contraires facultez, lesquelles sont manifestees selon la diuersité de leur preparation. Et c'est pourquoy Dioscoride tient que les chous des iardins, legerement bouillis, font bon ventre, & au contraire, s'il est largement cuit l'arreste, tellement qu'il est de tant moins laxatif, & plus adstringent, d'autant qu'on le fait bouillir plus long temps: car par la longue coction il laisse certaine acrimonie qu'il a, laquelle facilement s'esuanouyt: ioint aussi que (comme dit Galen,) il est impossible que les choses qu'on cuit gardent leur propre naturel, & principalement si elles sont cuittes en quelque humidité estrangere, & non à la leur naturelle.

*Li. 5. simp.
med.*

Galen enseigne deux façons d'aprester les chous, vne pour lascher le ventre, l'autre pour l'arrester. A la premiere il fait bouillir les feuilles
des

des chous en l'eau legerement, bien tost apres il iette lefdites fueilles dans vn autre pot qu'il a preparé avec l'huile & le garum, duquel auons parlé auparauant: au lieu duquel nous pouuons aussi mettre le sel commun: en la seconde qu'il fait pour arrester le flux de ventre, il met lefdires fueilles des-ja cuittes & bouillies, derechef dans vn autre vaisseau plein d'eau chaude, en laquelle estant cuittes vne autrefois, laissent totalement l'acrimonie & introfité qu'elles auoyent auparauant, & avec elle toute leur puissance laxatiue.

Parquoy la premiere & legere decoction des chous est tres-bonne pour laxer le ventre, comme aussi le chou mesme ainsi cuit & mangé avec le sel & l'huile: lesquels cuits plus que d'une fois, sont adstringens. Le ius des chous non cuits est de plus grande vertu pour faire bon ventre: mais en iceluy ne se trouue rien pour nourrir, sinon qu'il tombat en vn estomach famelique (comme en temps de cherté de viures) lequel se satisfait de tout ce qu'il rencontre: d'où vient que tels estranges alimens engendrent d'humeurs depravees si faciles à recevoir la corruption, que souuent ils sont causes des fieures pestilentiellles, & des autres maladies populaires.

Il y a vne infinité d'autres simples en ce pais, de mesme vertu & efficace, que ceux que i'ay rangez au premier, second & en ce troisieme liure, lesquels i'eusse adioustez pour la preuue de ma proposition, n'estoit que i'auois peur d'estre trop prolix, & de sembler decrire de

choses qui sont de soy assés manifestes & probables. Joint aussi que tant de testmoins inobietables que i'ay produits, doyuent suffire pour la confirmation de ceste verité, laquelle i'espere avec l'aide de Dieu, d'establir & renforcer encores mieux, tant par le denombrement des remedes particuliers & chirurgicaux, repellens, attirans, suppuratifs, mondificatifs, aglutimatifs, &c. & sudorifiques, pour chasser hors de nos boutiques le gaïac, la sarza parille, la racine de cinna, & autres piperies que les estrangers nous ont faites aualler auparauant, que par vn dispensaire, qui sera dressé, non seulement pour la nation

Prouençale: mais aussi pour toutes les autres prouinces de ce Royaume de France.

Là où nous ferons vn paradigme & exemplaire de tous les medicamens vniuersels & topiques, qui sont necessaires pour la curation de tous les genres des maladies.

Fin de la premiere partie de la Pharmacie Prouençale.

